

বাংলাদেশ

AMARBOI.COM

AMARBOI.COM

এই নয় মাসে যা ঘটেছে সেটা পৃথিবীর ইতিহাসে তুলনাহীন। পাঠক সাধারণ যেন না ভাবেন এটা একটা কথার কথা মাত্র। ঠিক দু-মাস পূর্বে ১৫ জানুয়ারিতে আমি এখানে এসেছি। দীর্ঘ সাড়ে তিন মাস ধরে আমার অগণিত আত্মীয় আত্মজনের আপন আপন ব্যক্তিগত অভিজ্ঞতার কথা দিনের পর দিন শুনে গিয়েছি। এমন একটি মাত্র প্রাণী পাইনি যার কোনো-কিছু বলার নেই। মাত্র চার বছরের শিশুরও তার আপন গল্প আছে। সে আদৌ বুঝতে পারেনি ব্যাপারটার কারবার জীবন মৃত্যু নিয়ে। আমাকে বললে, “মা আমার হাত চেপে ধরে চানের ঘরে নিয়ে গিয়ে ফিস্-ফিস্ করে বললে, ‘চুপ করে থাক, কথা বলিস নি, টু শব্দটি করবি নি।’ সমস্তক্ষণ কানে আসছে বোমা ফাটার শব্দ। আমি ভেবেছি, একসঙ্গে অনেকগুলো বিয়ের আতশ বাজি ফাটছে। মা এত ভয় পাচ্ছে কেন?” ...প্রাচীন দিনের এক বন্ধু তাঁর বাড়ি নিয়ে গেলেন—তাঁর আত্মীয়েরা আমার সঙ্গে পরিচিত হতে চান। গিয়ে দেখি, প্রাচীনতর দিনের সখা আমার প্রিয় কবি আবুল হোসেন বৈঠকখানার তক্তাপোশে বসে আত্মচিন্তায় মগ্ন। আমাকে দেখে মুচকি হেসে বললেন, “এই যে।” যেন ইহসংসারে এই ন-মাসে বলার মত কিছুই ঘটেনি। আর পাঁচজন আশ-কথা পাশ-কথা বলছিলেন। বর্বর না-পাকদের সম্বন্ধে মামুলী কথা। আমি কেন জানিনে কবির দিকে একবার তাকালুম। তাঁরই পাশে আমি একটি কৌচে বসেছিলুম। অতি শাস্তকণ্ঠে ধীরে ধীরে বললেন, “আমার চুয়াত্তর বছরের বৃদ্ধ আক্কা গায়ের বাড়ির বৈঠকখানায় চুপচাপ বসেছিলেন। জানতেন না-পাকরা গায়ে ঢুকেছে। তিনি ভেবেছেন, আমি চুয়াত্তর বছরের বুড়ো। আমার সঙ্গে কারোরই তো কোনো দুষমনী নেই!...না-পাকরা ঘরে ঢুকে তাঁকে টেনে রাস্তায় বের করে গুলি করে মারলো।”

আমি কোনো প্রশ্ন শুধোইনি। কোনো কিছু জানতে চাই নি।

আমার নির্বাক স্তম্ভিত ভাব দেখে আর সবাই আপন আপন কথাবার্তা বলা বন্ধ করে দিলেন। কিছুক্ষণ পরে সে জড় নিস্তব্ধতা ভাঙবার জন্য আমিই প্রথম কথা বলেছিলুম। মনে মনে সৃষ্টিকর্তাকে স্মরণে এনে প্রার্থনা করছি, “হে আল্লাতাল্লা, এ-সম্মুখি তুমি আমাকে কাটিয়ে দিতে দাও, কোনো গতিকে।”

আমার বিহ্বলতা খানিকটে কেটে গিয়েছে ভেবে—আল্লা জানেন, এ-বিহ্বলতা কালধর্মে ক্রমে ক্রমে ক্ষীণতর হবে কিন্তু এটাকে সমূলে উৎপাটিত করার মত যোগীশ্বর আমি কখনো হতে পারবো না—এক দরদী শুধোলে, “আপনারও এ ন-মাস নিশ্চয়ই দৃষ্টিভঙ্গি কেটেছে। আপনার স্ত্রী আর দুটি ছেলে তো ছিল ঢাকায়।”

আমি বললুম, “আপনাদের তুলনায় সে আর এমন কি? সে কথা না হয় উপস্থিত মূলতুবী থাক।”

নানা জাতের আলোচনা ভিড় জমালো। তবে ইয়েহুয়ার আহাম্মুখী, ভূট্টোর বাদরামী, পাকিস্তানের (বাংলাদেশ রাষ্ট্রমুক্ত হওয়াতে পাকিস্তানের যে-অংশটুকু “বাকি” আছে তাই নিয়ে এখন “বাকিস্তান”) ভবিষ্যৎ মাঝে মাঝে ঘাই মেরে যাচ্ছিল। কথাবার্তার মাঝখানে আমার মনে হল, এঁরা যেন আমাকে স্পেয়ার করতে চান বলে আপন আপন

বীভৎস অভিজ্ঞতার কথা চেপে যাচ্ছেন।

এমন সময় গৃহকর্তা আমার সখা এসে সামনে দাঁড়িয়ে বললেন, “আমার ছোট বোনটি আপনাকে দেখতে চায়।” আমি এক গাল হেসে বললুম, “বিলক্ষণ, বিলক্ষণ। নিশ্চয়, নিশ্চয়।” আমি যে অত্যন্ত গ্যালাস্ট সে তো সবাই জানে।

সাদামাটা গলায় বন্ধু যোগ করলেন, “এঁর উনিশ বছরের ছেলোটিকে পাকসেনারা গুলি করে মেরেছে।”

পাঠক ভাববেন না, আমি বেছে বেছে কতকগুলো বিচ্ছিন্ন বিক্ষিপ্ত উদাহরণ দিয়ে ন-মাসের নির্মমতার ছবি আঁকছি। তা নয়। এ মঘস্তর এ-মহাপ্রলয় এমনই সর্বব্যাপী, এমনই কল্পনাভীত বহুমুখী, প্রত্যেকটি মানুষের হৃৎপিণ্ডে এমনই গভীরে প্রবেশ করেছে, এক একটা শাণিত শর, যেন এক বিরাট প্রাবন সমস্ত দেশটাকে ডুবিয়ে দিয়ে সর্বনরনারীর হৃৎপিণ্ডের প্রতিটি রক্ত কর্দমাক্ত জলে ভরে নিরস্ত্র করে দিয়ে এই দুখিনী সোনার বাংলাকে এমনই এক প্রেত-প্রেতিনী গৃধ-শৃগালের সানন্দ হৃৎকার ভূমিতে পরিণত করে দিয়ে গিয়েছে যে তার সর্বব্যাপী সর্বাঙ্গিক বহুবিচিত্র রূপ আপন চৈতন্যে সম্পূর্ণরূপে সংহরণ করতে পারেন এমন মহাকবি মহাত্মা কোনো যুগে জন্মাননি। এরই খণ্ডরূপ আয়ত্ত করে প্রাচীনকালে কবি-সম্রাটগণ মহাকাব্য রচনা করেছেন। আমার মনে হয় একমাত্র মধুসূদন যদি এ-যুগের কবি হতেন তবে তিনি “মেঘনাদ-বধ” না লিখে যে মহাকাব্য রচনা করতে পারতেন তার তুলনায় মেঘনাদ ঝিল্লিধ্বনির ন্যায় শোনাতো।

হয়তো বহুযুগ পরে, মহাকালের পরিপ্রেক্ষিতে, চক্রনেমির পূর্ণাবর্তন সম্পূর্ণ হলে মানুষ পুনরায় মহাকাব্য রচনা করতে সক্ষম হবে। যদি হয়, তবে সে-মহাকাব্যের সম্মুখে অন্য সর্ব মহাকাব্য নিস্প্রভ জ্যোতিহীন হয়ে যাবে। একমাত্র মহাভারতই তখনো ভাস্বর থাকবে। তবে সঙ্গে সঙ্গে বলি সম্পূর্ণ নিরর্থক পৈশাচিক নিষ্ঠুরতায় বাংলাদেশের সে-মহাকাব্য পরবর্তী সর্ব মহাকাব্যের অগ্রজরূপে পূজিত হবে।

জানি, ভীমসেন দুঃশাসনের রক্তপান করেছিলেন। কিন্তু সেটা প্রতীক। এস্থলে পাকসেনারা নিরীহ বালকের আধখানা গলা কেটে ছেড়ে দিয়েছে। বালক ছুটেছে প্রাণরক্ষার্থে, হুমড়ি খেয়েছে, পড়েছে মাটিতে, আবার উঠেছে আবার ছুটেছে। বধ্যভূমি অতিক্রম করার পূর্বেই-তার শেষ পতন।

খান সেনারা প্রতি পতন, প্রতি উত্থানে খল-খল করে অট্টহাস্য করেছে।

গুনেছি কে কজনকে এ-পদ্ধতিতে নিধন করা হয়েছে তার রেকর্ড রাখা হত এবং পদোন্নতি তারই উপর নির্ভর করতো।

মহাকাব্য লেখা হোক, আর নাই হোক, এ-দেশের দাদী নানী এখনো রূপকথা বলেন। মরগোন্ধুখ রাক্ষসী পাগলিনী প্রেতিনীপারা, দক্ষিণে বামে সর্ব লোকালয় জনপদ বিনাশ করতে করতে ছুটে আসছে যে ভোমরাতে তার প্রাণ লুক্কায়িত আছে সেটাকে বাঁচাতে। এ-সব রূপকথা ভবিষ্যতের “কদ্রুপ-কথার” সামনে নিতান্তই তুচ্ছাতুচ্ছ বলে মনে হবে। যে চার বছরের মেয়েটির কথা বলেছিলুম সে যেদিন দাদী নানী হবে—ইতিমধ্যে সমস্ত জীবন ধরে বিকট বিকট দুঃখ-দুর্দৈবের প্রত্যক্ষ অভিজ্ঞতার বয়ান যার জীবনে জমে জমে হয়ে উঠবে পর্বতপ্রমাণ—সে যে রাক্ষসীর বর্ণনা দেবে সে রাক্ষসী সংখ্যায়

ক্রমবর্ধমান অগণিত। মাঙ্কাতার আমলের সাদা-মাটা রান্ধসী রাস্তায় দাঁড়াত না—এ-সব রান্ধস ছোট ছোট বাচ্চাদের আধখানা গলা কেটে ধ্বংসস্থাপে পরিণত করে, গ্রামের মসজিদ দেউলের সামনে ছেড়ে দিয়ে হাসতে হাসতে ভস্মশয্যায় গড়াগড়ি দেবে। অশ্লুপ্রাপ্তা শিশুকন্যাকে পাশবিক অত্যাচারে অত্যাচারে নিহত করে প্রেতার্চনার থালা সাজাবে নরখাদক পিশাচরাজ ইয়েহিয়ার পদপ্রান্তে।

অন্তরীক্ষে শব্দর স্তম্ভিত হয়ে তাণ্ডব নৃত্য বন্ধ করবেন।

লক্ষ বিষাগে ফুৎকারে ফুৎকারে কর্ণগটহবিদারক ধ্বনিতে ধ্বনিতে আহ্বান জানাবেন
লক্ষ লক্ষ চক্রপাণিকে—এবারে মাত্র একটি সতীদেহ খণ্ডন নয়।

লক্ষ লক্ষ উন্মত্ত পিশাচ বহির্গত বন্দীশালা হতে

মহাবৃক্ষ সমূলে উপাড়ি ফুৎকারি উড়ায়ে চলে পথে—

সে নিধন ভবিষ্যতের পুরাণে কী রূপ নেবে সে তো এ যুগের নরনারীর দৃষ্টি-চক্রবালের বহু সুদূরে।

পুরাণের উপাদান যখন নির্মিত হয়েছিল তখন কি সেকালের মানুষ জানত ভবিষ্যতের মহাকবি পুরাণে তাকে কিভাবে বর্ণাবেন?

পুরাণ পড়ে একদা আমার মনে হত এসব সম্পূর্ণ অবিশ্বাস্য। শুধু প্রশংসা করেছি পুরাণকারের কল্পনাশক্তি। আজ জানি, নিশ্চয়ই এমন কিছু ঘটেছিল যার জন্য কল্পনার আশ্রয় নিতে হয়নি।

আগামী দিনের রূপকথার প্রসঙ্গে এসে গেল পুরাণের—নব-“ভবিষ্য পুরাণের” স্বরূপ-কাহিনী। কিন্তু এ-দুই ইতিহাস কাব্যের সংমিশ্রণ একই উপাদানে নির্মিত হয়। একটি সম্মান পায় সাহিত্যের সিংহাসনে, অন্যটি আদর পায় ঠাকুরমার কোলে।

সাধারণজনের বিশ্বাস, মুসলমানদের পুরাণ নেই। আছে :—

“রাণীর আকৃতি দেখি বিদরে পরাণ।

নাকের শোয়াস যেন বৈশাখী তুফান॥

দুধে জলে দশ মণ করি জলপান।

আশী মণী খানা ফের খায় সোনাডান॥

শৃঙ্গার করিয়া বিবি বামে বাজে খোঁপা।

তার 'পরে গুঁজে দিল গন্ধরাজ চাঁপা।”

যে রাণীর স্বাস কালবৈশাখীর মত, যিনি নাশ্তা করেন দশমণ ওজনের দুধ-জল দিয়ে এবং মধ্যাহ্ন ভোজনের ওজন যাঁর আশি মণ, তিনি যদি পুরাণের নায়িকা না হন, তবে কিসের? তাই সোনাডানের পুঁথি কেচ্ছা-সাহিত্যের অনবদ্য কুতুবমিনার।

আর রূপকথা?—তার তো ছড়াছড়ি। কোন্টা ছেড়ে কোন্টা বলি!

গালেবুতুরুম্ বাশ্শা (বাদশাহ)—পাঠক, “গালেবুতুরুম্” নামটার দিকে তোমার দৃষ্টি আকর্ষণ করি—অবশ্য বস্তুতাত্ত্বিক সমালোচক আপত্তি জানিয়ে বলবেন, “গালেবুতুরুম্ গাল-ভরা নাম; এটা শোনার জিনিস, দেখার নয়—অতএব পাঠকের কর্ণ আকর্ষণ কর।” কিন্তু করি কি প্রকারে? ব্যাকরণসম্মত বাক্যই যে সুজনতাসম্মত কর্ম হবে শাস্ত্রে তো সেরকম কোনো নির্দেশ নেই।

“গালেবুতুরুম্ বাশ্শা; মক্কাশ্শর (মক্কা শহরে) তার বারি (বাড়ি)।” পাঠক সাবধান,

আরব ভূমির প্রামাণিক ইতিহাস অনুসন্ধান করতে যেয়ো না। এ-বাশা, এ-মক্কাশর বাস্তব জগৎ ছাড়িয়ে চিন্ময় দুলোকের চিরঞ্জীব আকাশকুসুম রূপে পরিবর্তিত হয়ে গিয়েছে।

এবং এ ন-মাসের কাহিনী তার সর্বশ্রেষ্ঠ রূপ পাবে ভাটিয়ালি গীতে। কত বিচিত্র রূপ নেবে সে আমার কল্পনার বাইরে। একটা মোতিফ যে বার বার ঘুরে ফিরে আসবে সে বিষয়ে আমার মনে কোনো দ্বিধা নেই।

মুজ্জিফৌজ্জে ডাকে মোরে,

থাকুন্ ক্যাম্বে কও!

গামছা দিয়া পরানডারে

বাইন্থা তুমি লও।

পাঠক আমার অনধিকার চর্চা ক্ষমা করো।

কিন্তু যে-সব সমসাময়িক সাহিত্যস্রষ্টা এ-যুগের ক্ষুধা এ-যুগের চাহিদা মেটাতে পারতেন তাঁদের অনেকেই তো আজ আর নেই। হায়দার কোথায়, কোথায় মুনীর? আমি শুধু আমার অন্তরঙ্গজনের কথাই বলছি। এ-সব বাংলাদেশী-সাহিত্যিকদের প্রতিই তো ছিল ইয়েহিয়ার বিকটতম আসুরিক জিঘাংসাবৃত্তি।

আমার পিঠিয়া ছোট বোনের ছেলে একটি চাটগাঁয়ে ব্যবসা করতো। ভালো ব্যবসা করতো। সে যত না সাহিত্য সৃষ্টি করতো, তার চেয়ে বেশী করতো সাহিত্যসেবা। ব্যবসা থেকে দু-পয়সা বাঁচাতে পারলেই বের করতো ত্রৈমাসিক—‘প্রাচী’।

এপ্রিলের গোড়ার দিকে না-পাকরা তাকে ধরে নিয়ে গিয়ে গুলি করে মারে।

অবতরণিকা

॥ ২ ॥

না-পাক অফিসারদের ভিতর এক ধরনের চটি ত্রৈমাসিক বিলি করা হয়। আটপেঠে কড়া পাঠনাই জ্বানে ছাপা থাকে “অনধিকারীর হস্তে এ কেতাব যেন কস্মিনকালেও না পড়ে : ফলতো কপি যেন ফলানা ঠিকানায় পাঠানো হয়।” কিন্তু প্রাণের ভয়ে যখন মোগল পাঠান তুর্ক আফগান (অবশ্য পাকিস্তানীরা) মুক্ত কণ্ঠ হয়ে “বাপ্পো-বাপ্পো” রব ছেড়ে পালচ্ছেন তখন টপ সিক্রেটই হয়ে যায় বটমলেস। শুনেছি, শেষ খালাসি লাইফবোটের শরণ না পাওয়া পর্যন্ত মাল জাহাজ এমন কি আধা-বোটের কাপ্তেন তক্ জাহাজ ছাড়ে না—মানওয়ারী জাহাজের কথা বাদ দিন। আর এ-সব “কাপ্তেন”-রা জোয়ানদেরও না জানিয়ে রেতের অন্ধকারে, অ্যারোপ্লেন হেলিকপ্টার যা পান তাই চুরি করে বর্মা বাগে পাড়ি দেন—এগুলো যুদ্ধের কাজে এমন কি আহত সৈন্যদের সরাবার জন্যও যে দরকার হতে পারে সে-কথা মনের কোণেও ঠাই না দিয়ে। জোয়ানরা তাই টপসিক্রেট চোখের মণি এই সব বুলেটিন ঠোঙাগুলাদের কাছে বিক্রি করেছিল কি না জানিনে।^[১] কিন্তু পাকেচক্রে এরই দু-চারখানা আমার হাতে ঠেকেছে। “যে খায় চিনি তারে যোগায় চিন্তামণি।”

(১) সে-বারে (১৯৭১-এ) ঈদ পড়েছিল ২০।২১ নভেম্বরে। সেই বাহানায় পাঞ্জাবী মহিলারা

যেমন আপিসারকে উপদেশ দেওয়া সেই টপসিক্রেট চোখের মণিতে “তুমি যদি কোনো নদীপারে পোস্টেড হও তবে জোয়ানদের সাঁতার শেখাবে।” ওঃ। কী জ্ঞানগর্ভ উপদেশ।

এক ওকীবহল গুণী ব্যক্তিকে সাঁতার কাটা সম্বন্ধে সেই সদুপদেশের উল্লেখ করতে তিনি মুদু হেসে বললেন, “অইছে, অইছে—জ্ঞানতি পারেন না। এই যে আপনাদের বাড়ির পিছনে ছোট্ট একটি নালা এসে খিলের মত হয়ে গিয়েছে এট্টে ইস্ট পাকিস্তান রাইফেলসের হেড-কোয়ার্টার। ২৫ মার্চের গভীর রাত্রে না-পাকরা কেন্টনমেন্ট থেকে বেরিয়ে ট্যাঙ্ক মর্টার মেশিনগান কামান দিয়ে আক্রমণ করে বাঙালি জোয়ানদের। ওরাও রুখে দাঁড়িয়েছিল। কিন্তু ওরা পারবে কি করে? ওদের ফায়ার পাওয়ার কোথায়? আট আনা পরিমাণ কচুকাটা হয়—ভাগ্যিস বাকিরা পেছন বাগে গুলি ছুঁড়তে ছুঁড়তে ঘাঁটি থেকে বেরিয়ে বুড়ীগঙ্গা সাঁতার কেটে পেরিয়ে—”

“সাঁতার কেটে?”

“এস্কে হ্যাঁ। তার থেকেও না-পাকদের শিক্ষে হয়, এ-দেশে সাঁতার না-জানাটা কত বড় বেকুবী—রীতিমত বেয়াদবী!!”

আমি তাড়াতাড়ি বললুম, “তা বটেই তো, তা বটেই তো! তবে ‘ভাগ্যিস চলে গিয়েছিল’ বললেন কেন?”

গুণী বিরক্তির সুরে বললেন, “ঝকমারি! ঝকমারি—আপনাকে এ ন-মাসের ইতিহাস শেখানো। এ বি সি দিয়ে তাবৎ বাৎ আরম্ভ করতে হয়। এ-দেশের শিশুটি পর্যন্ত জানে, এরা এবং (দুই) পুলিশের যে কটি লোক ঐ একই ধরনের কিন্তু অনেক মোক্ষমতর হামলা থেকে গা বাঁচাতে পেরেছিল, (তিন) বেঙ্গল রেজিমেন্ট থেকে যারা এসে জুটলো—এরাই ট্রেনিং দিল ছাত্রদের—তারাও ইতিমধ্যে এসে জুটে গিয়েছে এদের সঙ্গে, খুঁজে বের করেছে ওদের। আর কশ্মিনকালেও চাষাভূষা, ছেলে-ছেলেদের কথা ভুলবেন না। ওদের সাহায্য না পেলো—ঐ যে তেসরা ডিসেম্বরে মরণকামড় দিলে তিন দল, মুক্তিবাহিনী, ভারতীয় সেনা, পেছনে সামনে চাষাভূষার মদ—সেটা না থাকলে সেটা তেরো দিন না হয়ে কত দিন ধরে চলতো কে জানে!”

আমি সোপানাসে বললুম, “বর্ হক্ বর্ হক্! একদম খাঁটি কথা। এটা মেনে নিতে আমার রক্তভর অসুবিধা হচ্ছে না। এই ফেব্রুয়ারিতে দেখা হয় আমাদের সিলটা কর্নেল রব-এর সঙ্গে। ইনি ছিলেন জেনারেল ওসমানির চীফ অব স্টাফ। ঐর উপর ছিল চাটগাঁ-নোয়াখালি-সিলেটের ভার। প্রধান কাজ ছিল, চাটগাঁ বন্দরে না-পাকরা জাহাজ

স্বদেশে “প্রত্যাবর্তন” করতে আরম্ভ করেন। কিছু কিছু অফিসারও সময় থেকে গা-ঢাকা দেবার প্র্যাকটিস রপ্ত করতে থাকেন। ১৬ ডিসেম্বর না-পাক জাঁদরেলরা আত্মসমর্পণ করেন। আপিসরেরা তার আগের থেকেই দুই দল নারায়ণগঞ্জ খুলনা থেকে জেলেনৌকোয় করে, তৃতীয় দল প্লেনে করে পালাতে শুরু করেছেন দেশে তাঁদের বাড়ির পাহারাওলা সেপাইরা হজুরদের মালপত্র বিক্রি করতে থাকে। পরে আত্মসমর্পণ করার প্রাক্কালে কেউ কেউ গাদা গাদা নোট বাঙালীদের সামনে পোড়ায়—“বরঞ্চ যমকে সোয়ায়ী দেব, তবু সতীনকে না”—ভাবখানা অনেকটা ঐ। অন্যরা গোপন জায়গায় পুঁতে রেখে যায়। শান্তি তো একদিন ফিরে আসবেই; তখন কাবুলীওলার ছয়বেশে কিংবা তীর্থযাত্রী রূপে—মরে যাই, কী ধর্মপ্রাণ।—এদেশে এসে উদ্ধার করবে।

থেকে যে-সব জঙ্গী মাল-রসদ নামাবে সেগুলো যেন ঢাকা না পৌছাতে পারে। সে-কমটি এর নেতৃত্বে সুষ্ঠুরূপে ন-মাস ধরে সুসম্পন্ন হয়। বিদেশী সাংবাদিকরা এক বাক্যে স্বীকার করেছেন, মার্চ থেকে ডিসেম্বর না-পাকরা জঙ্গী রেল-লাইন মেরামত করতে না করতেই এঁরা উড়িয়ে দিতেন আবার রেলের ব্রিজ।...তিনি আমাকে বলেছিলেন, ২৬-২৭ মার্চ থেকে ১৭ এপ্রিল পর্যন্ত গেছে সবচেয়ে সঙ্গীন সময়। ‘স্বাধীন-বাংলাদেশ সরকার’ তখনো তৈরি হয়নি। দেশের ভবিষ্যৎ কোন্ দিকে, প্রত্যেকের আপন কর্তব্য কি সে-সম্বন্ধে সুস্পষ্ট ধারণা না থাকা সত্ত্বেও সেই দিনাজপুর থেকে সিলেট চাটগাঁ বরিশালের লোক অগ্রপশাৎ বিবেচনা না করে যদি সম্পূর্ণ স্বতঃস্ফূর্তভাবে জ্ঞান কবুল করে শয়তানের মোকাবেলা না করত তবে পরিস্থিতিটা কী রূপ নিত কে জানে?”

“তা সে কথা থাক। আপনি বলছিলেন—”

“হঁ। সে-কথা থাক। তবে এ বিশ-বাইশ দিনের ইতিহাস তার পরিপূর্ণ সম্মান তার পরিপূর্ণ মাহাত্ম্য দিয়ে লেখা উচিত। আমি বিশেষ করে জানতে চাই, তারা এ মনোবল পেল কি করে, কোথা থেকে?”

“না, না। সাঁতারের কথা বলছিলুম। হারামীরা স্পষ্ট চোখে দেখতে পেল, বাঙালী সমুচা বন্দুক হাতে নিয়ে গপাগপ ডুবসাঁতার দিয়ে বুড়ীগঙ্গার জল পেরুল তথাপি বাবুদের কানে জল গেল না। কে জানে, কে বোধ হয় হুকুম দিয়েছিল—ব্যবস্থা করা হল, জোয়ানরা সাঁতার কাটা শেখবেন! আরে মশায়, কাঁচায় না নুইলে বাঁশ—! তদুপরি আরেক গেরো। যে-আপিসর হুকুরা ডেকায় দাঁড়িয়ে দাঁড়িয়ে হুকুম কপচাচ্ছেন, তেনারাই যে জলে নাবলে পাথরবাটি। বাঁজী ছুঁড়ি পয়লা পোয়াতীকে শেখাচ্ছে বাচ্চা বিয়োবার কৌশল।

তদুপরি আরেক মুশকিল, জল পদার্থটা বড্ড ভেজা।”

আমি বললুম, “হ্যাঁ, আইরিশম্যান রবারের দস্তানা দেখে বলেছিল, খাসা ব্যবস্থা। দিব্য হাত ধোওয়া যায় জলে হাত না ভিজিয়ে।”

গুনী বললেন, “আইরিশম্যানের ‘হেড-আপিসে’ বিস্তর ঘিলু। এদের আঙা সাইজের মাথা ভর্তি ঠকঠকে ঘুটে। এদের বেশ-কিছু জোয়ান অনেকদিন ধরে এদেশে আছে কিন্তু কোনো প্রকারের কৌতূহল নেই। শোনে নি বুঝি সেই কুট্রি রসিকতা? ওদিকে কখন যে গুলির ঘায়ে ঘায়েল হবে সে খেয়াল আছে নসিকে, এদিকে কিন্তু মস্তুরা না করতে পারলে পেটের ভাত চালভাজা হয়ে যায়।... কুট্রির গণিভাই বাড়ি থেকে বেরুতে ভয় পাচ্ছে। মোগলাই কষ্ট বললে, পাঠানগো অত ডরাইস ক্যান—বুদ্দ, বুদ্দ, বেবাক গুলাইন বুদ্দ। হোন কথা। কাইল আমাগে আটকাইছে ইস্কাটনের ধারে। একেক জনরে জিগায়, নাম কিয়া হায়? হিন্দু নাম অইলৈই সর্বনাশ—তার লাইগ্যা সাক্ষাৎ কিয়ামৎ (মহাপ্রলয়)। পয়লা তারে দিয়া কবর খোরাইবো। তার বাদে একডা গুলি। যদি না মারে—বাবুগো হাতের নিশানা, হালা আইনুধারে তেলা হাতে বিল্লির নেঙ্গুর ধরার মত—তো বন্দুকের কোন্দা দিয়া ঠ্যাঙাইয়া ঠ্যাঙাইয়া মারে, নাইলে হালা জিন্দা মানুষ কবরে পুত্যা দেয়।... আমার পিছে আছিল আমাগো মহল্লার বরজো। মনে মনে কই, ইয়ান্না, এর তো কিয়ামৎ আইয়া গেল আইজই। আদিশা করলুম, দেহি, না, হালা, আমাগো পাঠান সম্বন্ধী কোন্ পয়লা নম্বরী পাক মুসলমান—হিন্দু মাইরা দাবরাইয়া বেরাইতাছে?...আমাকে যে-ওন্তে জিগাইল ‘তুমারা নাম কিয়া হায়?’ আমি কইলাম—‘কিয়ামৎ মির্জা, বুক চিতাইয়া!

হোনো কথা—কিয়ামৎ বুঝি নাম অয়? কইল, ‘বোহৎ ঠিক হয়। যাও।’ তার বাদে আইল বরজো-বিবি শিরনীর পাঁঠিটার মতন কাঁপতে কাঁপতে। আমি তার চেহারার বাগে মুখ তুল্যা চাইতা পারলাম না। ক্যা নাম হয়? আরে মুসলমান নাম কইলে কি হয়? না ডরের তাইশে আচরিতে কইয়া ফালাইছে ব্রজবিহারী বসাক। খান সায়েব খুশী অইয়া কইল, বিহারী হয়? তো যাও, যাও। বাচ্যা গেল বরজো হালা। তারে কইলাম, আ মে বরজা, বিহারী হইয়া বাচ্চা গেল।...” গল্প শেষ করে গুণী বললেন, কিন্তু মাঝে মাঝে বিপদও আসে প্রদেশের নামে। সাঁজের বৌকে মসজিদে ঢুকছে এক মোল্লাজী। পাশের পকেটটা বড্ড ফোলা-ফোলা দেখাচ্ছে বলে খানের মনে হল সন্দেহের উদয়। হাঁক ছেড়ে গুধালে, “জ্বেমো ক্যা হয়।” ধতমত খেয়ে বললে, “কুছ নহী হুজুর, একঠু পাঞ্জাবি হয়।” খান তো রেগে খান খান। “কী! তোর এত গোস্তাকী! পাঞ্জাবের খানদানী একজন মনিষ্যিকে তুই পুরেছিস জ্বে! ” মসজিদের ইমাম তখন ছুটে এসে এক হ্যাঁচকা টানে বের করলেন পাঞ্জাবিটা। খানকে বললেন, “হুজুর, আপনারা—পাঞ্জাবীরা—প্রথম আমাদের কুর্তা পরতে শিখিয়েছিলেন কি না, তাই আমরা সব কুর্তাকেই পাঞ্জাবি বলি—আপনাদের ফখরের তরে।”

গুণী বললেন, “আপনি খবর নিন, জানতে পারবেন, শুধু যে পাঠানরা, পাঞ্জাবীরা, বেলুচরা এদেশে সম্বন্ধে কিছুই জানতো না তা নয়, এদেরকে দিনের শব্দ দিন শেখানো হয়েছিল, বাঙালিরা পাকিস্তানী নয়, এবং তার চেয়েও বড় কথা মুসলমান নহ্ন। এরা হিন্দুদের জারজ সন্তান। এরা আল্লা রসুল মানে না, নামাজ রোজার ধার ধারে না—”

আমি বললুম, “বা রে! এ আবার কি কথা! শুধু বললেই হল। পাঞ্জাবী পাঠান কি মসজিদে চেনে না। গম্বুজ রয়েছে, মিনার রয়েছে, ভিতরে মিহরার রয়েছে, বাইরে ওজু করার জন্য জলের ব্যবস্থা রয়েছে, জানি, ওদের দেশে বাংলার তুলনায় মসজিদ অনেক কম। তাই বলে মসজিদ চিনবে না।”

বললেন, “মসজিদ চেনার কি বালাই ওরা শুনেছে, এককালে এগুলো মসজিদ ছিল কিন্তু ইন্ডিয়ানদের পাল্লায় পড়ে ওসব জায়গায় এখন নামাজতামাজ আর পড়া হয় না। শুধু কি করে পাকিস্তান ধ্বংস করতে হবে তাই নিয়ে ইন্ডিয়ান এজেন্টদের সঙ্গে আলোচনা হয় এখানে। উত্তর বাংলার এক টাউনে এক প্রৌঢ়া মহিলা সন্ধ্যার আধা-অন্ধকারে বেরিয়েছেন তাঁর কিশোরী কন্যার সন্ধানে। পাড়ার মসজিদ পেরিয়ে কিছুটা যেতে না যেতেই—সামনে খান সেনা, জনা পাঁচেক! মহিলা পিছন ফিরে ছুটলেন বাড়ির দিকে। মসজিদের পাশ দিয়ে ছুটে যাবার সময় করলেন চিংকার। মুসল্লিদের নামাজ শেষ হয়ে গিয়েছিল। তারা ছুটে এল বাইরে। খান সেনাদের সন্ধা দেবার চেষ্টা করতেই তারা চালালো গুলি। কয়েকজন পড়ে গেল রাস্তার উপর। বাকিরা দৌড়ে ঢুকলো মসজিদের ভিতর। না-পাকরা সেখানে ঢুকে সবাইকে খতম করলো। ইমাম সাহেবও বাদ যাননি।”

আমি বললুম, “আমার কাছে তো এসব কথা সম্পূর্ণ অবিশ্বাস্য ঠেকছে।”

গুণী বললেন, “কিন্তু এত শত বজ্র-বীধন দিয়ে বাঁধা সত্ত্বেও মাঝে মাঝে ফটল ধরতো।

গাঁ থেকে জোয়ান জোয়ান চাষাদের ধরে আনা হচ্ছে একসঙ্গে গুলি করে খতম করে না-পাকরা “গাজী” হবেন। একটি ছোকরাকে ধরে এনেছিল, সঠিক বলতে গেলে, প্রায় তার মায়ের আঁচল থেকে। সে কান্নাকাটি চিংকার চোঁচামেচি কিছুই করেনি। শুধু যখন

তাকে না-পাকরা দাঁড় করাতে যাচ্ছে, গুলি করার জন্য, তখন ফিসফিস করে সেপাইটাকে বললে, “আমার আশ্বাকে বলো, আমার রুহ (আত্মা)-র মগফিরাতের (সদগতির) জন্য দোয়া (প্রার্থনা) করতে।” রুহ, মগফিরাত (যেমন ‘সাধনোচিত ধামে প্রস্থান’) এগুলো প্রায় টেকনিকাল কথা, সব ধর্মেই থাকে। সেপাই ‘আশ্বা’, ‘রুহ’, ‘দোয়া’ কথাগুলো বুঝতে পেরে একেবারে হতবাক হয়ে গেল। অবশ্যস্বার্থী মৃত্যুর সামনে অতিশয় পাষাণও তো ঝুটমুট ঝুট কথা বলে তার পরকাল নষ্ট করতে চায় না। আবার জিজ্ঞেস করে ব্যাপারটা বুঝতে পেরে তাকে নিয়ে গেল অফিসারের সামনে। বললে, ‘এ তো মুসলমান।’ অফিসার সরকারী নির্দেশমত ইসলামের স্বরূপ সম্বন্ধে তাঁর তোতার বুলি কপচাবার পূর্বেই ইই ইই রব উঠেছে, ‘মুক্তি (গ্রামের লোক “মুক্তি-ফৌজ” “মুক্তিবাহিনী” বলে না, বলে “মুক্তি”) এসে গেছে, মুক্তি এসেছে।’ সঙ্গে সঙ্গে— “ভাগো ভাগো” চিৎকার। আর ধনাধন একই সাথে সে কী সাম্যবাদ। আপিসারকে ধাক্কা মেরে জোয়ান দেয় ছুট, জোয়ানকে ঠেলা মারে অল-বদর, তাদের ঘাড়ে জড়মুড়িয়ে পড়ে অশশম্। এস্থলে রণমুখো বাঙালি আর ঘর-মুখো সেপাই।

ছোঁড়াটাকে আখেরে অফিসার মুক্তি দিত কি না সে সমস্যার সমাধান হল না বটে কিন্তু সে যাত্রায় সে-সুদুর্ভেঁটে গিয়েছিল বেশ কয়েকজন।

এ তো গেল মামুলী উদাহরণ।

আরেক জায়গায় না-পাকরা মেরেছে গাঁয়ের কয়েকজন মুরব্বীকে। তারপর এদিক-ওদিক ঘুরে বেড়াচ্ছে। সেসব মৃতের আত্মার সদগতির জন্য শেষ উপাসনা (জানাজা) করার সাহস কার? মৃতদেহগুলো সামনে রেখে সারি বেঁধে সে জানাজার নামাজ পড়তে হয়। খানেরা তৈরী, জড়ো মাল পটপট গুলি করে ঝটপট গাজী হয়ে যাবে। কিন্তু তবু জনাদেশকে সার বেঁধে নামাজ আরম্ভ করে দিল।

পাঞ্জাবী, পাঠান, বেলুচ পাঁচ ওকতো দৈনন্দিন নিত্য নামাজের বড় একটা ধার ধারে না। চোদ্দ আনা পরিমাণ নামাজের সংক্ষিপ্ততম মস্তও জানে না। বাঙালি মুসলমান ওদের তুলনায় কোটিগুণে ইনফিনিটি পারসেন্ট আচারনিষ্ঠ। কিন্তু পাঠান বেলুচ আর কিছু জানুক আর নাই জানুক মৃতের জন্য শেষ উপাসনায় সে যাবেই যাবে। তার মস্ত জানুক আর না জানুক। ইহসংসারে সর্ব পাপকর্মে সে বিশ্বপাপীকে হার মানায়। তাই এই নামাজে তার শেষ ভরসা। নামাজীদের দোওয়ায় সে যদি প্রাণ পায়।

গুলি করার আগেই তারা লক্ষ্য করলো, এ নামাজ তো বড্ড চেনা লাগছে। এ নামাজ নিয়ে তো কেউ কখনো মস্তুরা করে না। জানের মায়া ত্যাগ করে যারা এ নামাজে এসেছে তারা তো নিশ্চয়ই মুসলমান। মৃতের জন্য মৃত্যুভয় ত্যাগ!

এরা সেদিন গুলি করেনি।

কিন্তু তাই বলে ওরা যে সেদিন থেকে প্রত্নদপালে পরিণত হল সেটা বিশ্বাস করার মত অতখানি বুড়বক আমি নই। এটা নিতান্তই রাঙা শুক্কুবারের, ওয়ান্স ইন এ ব্ল্য মূনের ব্যতায়।

লুটতরাজ বুন-খারাপীর সময় কে হিন্দু কে বা মুসলমান!

কাশ্মীরে ঢোকার পূর্বেই তো পাঠানরা আপন দেশে লুটতরাজ করেছে। আর কাশ্মীরের মুসলমানদের উপর অত্যাচারের তো কথাই নেই। ওদিকে লেট জিন্নাহ তো ওদের দিব্যি দিলিশা দিয়েছিলেন, কসমফতোয়া ঝেড়েছিলেন—পাঠানরাই দুনিয়ার

সবচেয়ে বড়হিয়া মুসলমান, তাদের উপরই পড়লো নিরীহ কাশ্মীরীদের জ্ঞান-মান
বাঁচাবার দায়িত্ব। আমেন! আমেন!!

অবতরণিকা

॥ ৩ ॥

মার্চ থেকে ডিসেম্বরের কাহিনী এমনই অবিচ্ছিন্ন, এমনই অভূতপূর্ব যে সে-কালটা
একাত্তরে গেলে তার পূর্বের ইতিহাস পড়ে খুব একটা লাভ হয় না। কারণ এটা তো
এমন নয় যে তার পূর্বে দু-বছর হক পাঁচ বছর হক বেশ কিছু কাল ধরে পূর্ব বাংলায়
মোতাম্মেদ পাঞ্জাবী-পাঠান পাক সেনা আর সে-দেশবাসী বাঙালিতে আজ এখানে কাল
সেখানে হাতাহাতি মারামারি করছিল এবং একদিন সেটা চরমে পৌঁছে যাওয়াতে এক
বিরাট বিকট নরহত্যা নারীধ্বংস আরম্ভ হয়ে গেল। বস্তুত যে দু-তিন হাজার পশ্চিম
পাকিস্তানী সৈন্য বাংলাদেশে বাস করতো তাদের সঙ্গে কখনো কোনো মনোমালিন্য
হয়েছিল বলে শুনি নি। আমি এ-দেশে ১৯৪৭ খৃষ্টাব্দে একবার “পূর্ব পাকিস্তান” দেখতে
আসি এবং ১৯৫১ থেকে ১৯৭০ অবধি পারিবারিক কারণে প্রতি বৎসর দু-একবার
এসেছি এবং প্রতিবারই একটানা কয়েক মাস কাটিয়ে গিয়েছি। আমার গুণ্ঠিকুটুমে তাবৎ
বাংলাদেশ ভর্তি। তাই রাজশাহী থেকে চাটগাঁ-কাপ্তাই, সিলেট থেকে খুলনা অবধি মাকু
মেরেছি। মাত্র একবার দুজন পশ্চিম পাকিস্তানী জোয়ানকে রাজশাহীতে পদ্যার একটা
খাড়ির পারে ভিড়ের মধ্যে দাঁড়িয়ে থাকতে দেখি—অতি অবশ্য পাড় থেকে হাত দশেক
দূরে জল থেকে খুব সস্তর্পণে গা বাঁচিয়ে; একটি কিশোর সেখানে জলে ডুবে মরেছে
শুনে সে “তামাশা” দেখতে এসেছিল।

আরেকবার ট্রেনে ঢাকা থেকে মৈমনসিংঘার সময় ক্যান্টনমেন্ট স্টেশনে দুজন
সুবেদার উঠেছিল। তার একজন মৈমনসিংঘার লোক, অন্যজন বেচুচ। এটা ১৯৬৬
সালের কথা। মৈমনসিংহী আর পাঁচজনের সঙ্গে গালগল্প জুড়ে দিল এবং স্বভাবতই
৬৫-র যুদ্ধের কথা উঠলো। “বাঙালরা” তখন পশ্চিম পাকিস্তানে কি রকম জোর লড়াই
দিয়েছিল সে-কাহিনী সে যেমন-যেমন দফে দফে বলে যায়, সঙ্গে সঙ্গে বেচুচ “ঠিক বাৎ,
বিলকুল সহী বাৎ” “ম্যায় ভী তো থা, ম্যায় নে ভী দেখা” মন্তব্য করে। এস্থলে সম্পূর্ণ
অবাস্তব নয় বলে উল্লেখ করি, ঐ যুদ্ধে বাঙালি রেজিমেন্টই আর সব রেজিমেন্টের
চেয়ে বেশী মেডেল ডেকোরেশন পায়। এবং অগ্রাসঙ্গিক হলেও উল্লেখ করি, ১৯৭১-এর
পরমিকালে রাজশাহীতে বেচুচ জোয়ানদের এক বাঙালি প্রসেশনের উপর গুলি চালাবার
ধুম হলে অগ্রবর্তী জোয়ানরা শূন্য গুলি মারে, আর জনতাকে বার বার বলতে থাকে,
“ভাগো, ভাগো!”...সে যাত্রায় বিস্তর লোক বেঁচে গিয়েছিল।

মোদ্দা কথা সেপাইদের সঙ্গে এ দেশবাসীর কোনো যোগসূত্র ছিল না। কোনো
প্রকারের মনোমালিন্যও ছিল না। সেটা হয়েছিল মার্চ মাসের গোড়ার দিকে—সে কাহিনী
গথাস্থানে হবে।

আর আর্মি অপিসারদের তো কথাই নেই। যে সামান্য কজন আপন মিলিটারি গণ্ডি
থেকে বেরিয়ে এদের সিভিলিয়ান অপিসারদের সঙ্গে মেলামেশা করতেন তারা ছিলেন
৬৫, খামোখা গায়ের জোরে যেখানে কমন ল্যাঙ্ক ইংরিজিতে কথাবার্তা হচ্ছে সেখানে

“উর্দু ভাষা চালিয়ে উঁচু ঘোড়া চড়তে যেতেন না।

‘প্রভু ইতর ছিল পাঞ্জাবীরা এবং তৎসঙ্গে যোগ করতে হয় দম্ভ, অহংকার, গায়ে পড়ে অপমান করার প্রবৃত্তি। বেহারীদের—এরা অসামরিক। ভাবখানা, এনারা খানদানী মনিষি, কুরানশরীফের আরবী, রুমীহাফিজের ভাষা ফার্সী এগুলোকে প্রায় ছাড়িয়ে যায় তেনাদের নিকষি কুলীন উর্দু ভাষা। পাটনা, বেহারে এনাদের অন্য রূপ! ঢাকাতে একদা এক বাঙালির ড্রইংরুমে যখন উর্দু নিয়ে এনাদের এক প্যাকম্বর বড্ড বেশী বড়ফাট্টাই করতে করতে থামতেই চান না তখন আমি তাঁর নভলোকে উড্ডীয়মান বেলুনটিকে চুবসে দেবার জন্য মাত্রাধিক মোলায়েম কণ্ঠে শুধালুম, “আচ্ছা আপনার সঠিক মাতৃভাষাটি কি? ভোজপুরী মৈথিলী না নগ্‌ই?” আর যাবে কোথায়? ছাতুখোর তো ফায়ার! হাজার দুই ফারেনহাইট। ...উপস্থিত সেটা থাক।

‘তাই পঁচিশের “পিচেশিমির” পয়লা নম্বরী মদী ছিলেন এঁরাই। অল-বদর, অশ-শমস এবং প্রধানত রাজকরদের সম্মানিত সভ্য ছিল এঁরাই। পঁচিশের পিচেশিমির পটভূমি অধ্যয়ন করলে মাত্র এইটুকু আমাদের কাছে লাগে। কিন্তু ভুললে চলবে না, এই বাহ্য। কারণ গণনিধনের প্রধান পাণ্ডা-পুরুত না-পাক সেনা এবং ইসলামবাদ-নশীন ফৌজী জাঁদরেলরা।[১] এঁরা যদি পুরো মিলিটারি তাগদ খাটিয়ে নিরস্ত্র সিভিলিয়ানদের কচু-কাটা (কৎল-ই-আম) কর্মে সমস্ত শক্তি নিয়োগ না করতেন তবে এ দেশের নুন নেমক খেয়ো পোস্টাইপেট জারজ বিহারীদের (আমি বিহার বাসিন্দা, বিহারী বা কলকাতাবাসী বিহারীদের কথা আদৌ ভাবছি না, এবং বাংলার বিহারীদের ভিতরও যে আদৌ কোনো ভদ্রসন্তান ছিলেন না সে কথা বলছিনে) কী সাধ্য ছিল বাংলাদেশীর সঙ্গে মোকাবেলা করে!

এটা নিয়তির পরিহাসই বলতে হবে, যে-জোয়ান, যে-অপিসারদের সঙ্গে বঙ্গজনের কোনো দূশমনী ছিল না তারাই নাচলো তাণ্ডব নৃত্য, বেহারীরা শুধু বাজালো শিঙে। বেঙ্গল অর্ডিনেনস বঙ্গদেশের উপর চাপানোর সময় রবীন্দ্রনাথ লিখেছিলেন :

“হিমালয়ের যোগীশ্বরের রোষের কথা জানি
অনঙ্গেরে জ্বালিয়েছিলেন চোখের আগুন হানি।
এবার নাকি সেই ভূধরে কলির ভূদেব যারা
বাংলাদেশের যৌবনেরে জ্বালিয়ে করবে সারা!
সিমলে নাকি দারুণ গরম, শুনছি দার্জিলিঙে
নকল শিবের তাণ্ডবে আজ পুলিশ বাজায় শিঙে।”

এই অগ্নিগর্ভ মৃত্যুঞ্জয় কবিতাটি থেকে এ প্রবন্ধে আরো উদ্ধৃতি দিতে হবে। কিন্তু এটি এতই অনাদৃত যে আমি—অভিমানভরে তার নির্দেশ দিই না। রচনাবলী থেকে খুলে বের করুন।

(১) এঁদের নাম টুকে রাখলে পশ্চিমবঙ্গীয় পাঠক রেসকর্সে না গিয়ে, রক-এ বসেই বাজী খেলতে পারবেন শ্রীযুত ভূটোর পর কোন্ বাজীরাজ পাকিস্তানের গদীতে সোওয়ার হবেন—বাংলাদেশে এঁদের নাম ডাল-ভাত, খুড়ি!—ছাইভস্ম। লেফ-জেনারেল পীরজাদা হামিদ খান টিক্কা খান (এর গৌরবার্জিত খেতাব “বমর অব বেলুচিস্তান”), (“বুচর অব বেঙ্গল”) মেজর জেনারেল আকবর খান, মেজর জেনারেল উমর খান, লেফ-জেনারেল গুল হাসান।

পটভূমি নির্মাণের জন্য একাধিক চিত্তাশীল লেখক অন্যান্য কারণ দেখান। সেগুলো একটা জাত একটা দেশকে স্বাধীনতা সংগ্রামের জন্য উদ্বুদ্ধ করতে, এমন কি ক্ষেপিয়ে তুলতেও যথেষ্ট। প্রত্যন্তরে দমননীতি বরণ করে শোষণেরা। এমনতরো কাণ্ড তো বার বার সহস্রবার হয়েছে পৃথিবী জুড়ে। কিন্তু প্রত্যন্তরে পিচেশিমির যে উলঙ্গনৃত্য হল তার হৃদিস তো বড় একটা পাওয়া যায় না—আমি কোথাও পাইনি। মাত্র একবার একজন একটা প্ল্যান করেছিলেন যার সঙ্গে ইয়েহিয়ার প্ল্যান মিলে যায় কিন্তু সেই পূর্বসূরীও সেটা কার্যে পরিণত করার জন্য এতখানি পিচেশিমি করার মত বুক বাঁধতে পারেননি। কিন্তু সে-প্ল্যান এ ভূমিকার অঙ্গ নয়। সেটা ঘটনাবলীর ক্রমবিকাশের সঙ্গে এমনই অঙ্গাঙ্গি বিজড়িত যে সেটাকে বিচ্ছিন্ন করে এত্থলে সুষ্ঠুভাবে পরিবেশন করার মত শক্তি আমার নেই—সহিষ্ণুতম পাঠক পর্যন্ত বিরক্ত হবেন। সেটি যথাস্থলে নিবেদন করবো।~

পূর্ব বাঙলাকে পশ্চিম পাকের একুশটি কোটিপতি পরিবার কী মারাত্মকভাবে শোষণ করেছে সে সম্বন্ধে প্রামাণিক গ্রন্থ প্রকাশিত হয়েছে। দুজন লোক অসীম সাহস দেখিয়ে আইয়ুব ইয়েহিয়ার আমলেই সরকারী তথ্যের উপর নির্ভর করে যে-সব রচনা প্রকাশ করেন সেগুলো পড়ে আমার মনে ভয় জেগেছিল এঁদের ধরে ধরে না ইয়েহিয়ার চেলা-চামুণ্ডারা ফাঁসি দেয়। বঙ্গবন্ধু শেখ মুজিবুর রহমান এঁদের প্রকৃত মূল্য উত্তমরূপেই হৃদয়ঙ্গম করেছিলেন বলে ভণ্ড ইয়েহিয়া যখন আলাপ-আলোচনার নাম করে—আসলে টিক্কা খান যাতে করে পশ্চিম পাকিস্তান থেকে আরো না-পাক সেনা ঢাকায় আনতে পারার ফুরসত পায়—মার্চের মাঝামাঝি ঢাকা আসেন, তখন বঙ্গবন্ধু জনাব তাজউদ্দীনের সঙ্গে অধ্যাপক রহমান সুব্হান ও ড. কামাল হুসেনকে প্রাথমিক আলাপ-আলোচনা করার জন্য পাঠিয়েছিলেন।

এই ভণ্ডামির চমৎকার বয়ান বহুল প্রচারিত একখানি জার্মান সাপ্তাহিক নির্ভয়ে প্রকাশ করে। ‘নির্ভয়ে’ এই কারণে বললুম, ওই প্রবন্ধের জন্য যে জার্মান লেখক জিম্মাদার তার নাম, ইসলামাবাদে তার বাসস্থান, ফোন নম্বর ইত্যাদি সবই ভালভাবে দেওয়া ছিল। ভাবখানা অনেকটা এই : “ওহে হেইয়া খান। আমার মতে, তুমি রাষ্ট্রপ্রধান হয়ে যে ভণ্ডামির ভেক্‌বাজিটি দেখালে তার হাঁড়িটি ‘আমি হাটের মধ্যখানে ফাটলুম। যে ভণ্ডামিটি তুমি করলে সেটা কোনো কূটনৈতিক রাষ্ট্রদূতও ইচ্ছাকৃত ভয়ে করতো না—কারণ দু-দিন বাদেই তো ভণ্ডামিটা ধরা পড়ে যেত। আর কেউ না হোক, আমি তো বাপু এ-ব্র্যান্ডের ফক্কিকারি বিলক্ষণ চিনি। মাত্র আরেকজন রাষ্ট্রপ্রধান এ-ধরনের ত্যাগত্যাগি করতেন তিনি আমারই দ্যাশের লোক—নাম তার হিটলার। তা অত সব ধানাই-পানাই ক্যান? করো না আমার বিরুদ্ধে মোকদ্দমা, না হয় তাড়িয়ে দাও আমাকে তোমার সাতিশয় পাক মুল্লুক থেকে। হই হই পড়ে যাবে দুনিয়ার সর্বত্র। দেখি, তোমার কতখানি মুরদ!”

“অতি অবশ্য ভারিঙ্কি গুজনের ইয়েহিয়া অনভ্যাসের (ফোঁটা) অসামরিক ড্রেস পরে ডোড়া জাহাজে করে পৌঁছলেন পূর্ব-দেশের রাজধানী ঢাকায় (সে আরেক মিনি ধাপ্পা; ভাবখানা, আমি মিলিটারি ডিকটের নই, আমি সাদামাটা নাগরিক মাত্র।)—শেখ মুজিবুর সঙ্গে আলাপ-আলোচনা করার জন্য। কিন্তু প্রকৃত সত্য, ওই আসাটাই ছিল দীর্ঘসূত্রতার কৌশল। পূর্ব প্রদেশ কেটে পড়তে চায়; তাকে তখনকার মত কোনো গতিকে ঠেকিয়ে পরে ডাঙা মেরে ঠাণ্ডা করা।

“কারণ, পাঠান জাঁদরেল (ইয়েহিয়া পাঠান নন। তিনি জাতে কিজিলবাস্ এবং সুন্নীবেরী শীয়া সম্প্রদায়ের লোক[২] কিন্তু তিনি পাঠানদের ভাষা পশতু অনর্গল বলতে পারেন বলে অতি অল্প লোকেই জানেন যে তিনি পাঠান নন—অনুবাদক) যে কটা দিন জেনেগুনে তিনি হাবিজাবি এ-প্যারাগ্রাফ ও-প্যারাগ্রাফ নিয়ে বাংলার জননেতার সঙ্গে বেকার আলোচনা চালাচ্ছিলেন ঠিক সেই সময়ে বেসামরিক “পাকিস্তান ইন্টার-ন্যাশনালের” উড়ো জাহাজ নিরবচ্ছিন্ন ধারায় বাংলাদেশে নিয়ে আসছিল উচ্চদেহ বাছাই বাছাই যুবক—পরনে একদম একই ধরনের বেসামরিক বেশ।”

(এদের ভূয়ো পাসপোর্টও দেওয়া হয়েছিল; কারণ সিংহলে উড়ো জাহাজে তেল নেবার সময় পালের পর পাল জঙ্গীয়নিফর্ম পরা সৈন্যবাহিনী যাচ্ছে দেখলে সিংহল কর্তৃপক্ষ ‘যুদ্ধের প্রস্তুতি’ বন্ধ করে দিতেন। কিন্তু না-পাক জাঁদরেলদের আজব হস্তীবুদ্ধি দেখে তাজ্জব মানতে হয়! সঙ্কলেরই একই কাপড়ের একই কাটের একই জামা-জোড়া যদি হয় তবে সেটাও তো একটা যুনিফর্ম। হোক না সে সিভিল। বস্তুত যে ঢাকার লোককে ফাঁকি দেবার চেষ্টা করা হয় তারা—‘খানদানী’ উর্দু ভাষায়—ফৌরনকে পাঁচ মিনিট पहले অর্থাৎ তদন্তেই বিলম্ব ইশিয়ার হয়ে যায় এ-সব ভেড়ার-ছাল-পরা নেকড়ের পাল)।

শেখ সাহেব চাণক্য মাকিয়াভেল্লির ইঙ্কুলে-পড়া কূটনৈতিক নন। কিন্তু গাঁয়ের লোক—ক-সের ধানে ক-সের চাল হয় অস্ত্রত সে-হিসেবটুকু তাঁর আছে। পাঞ্জাবী পাঠানদের এই হাতী-মার্কী স্থূল প্যাচটি বোঝবার জন্য তাঁকে মার্কিন কমপুটারের শরণ নিতে হয়নি। কিন্তু তিনি তাঁর দিকটা সাফসুত্রেরা রাখতে চেয়েছিলেন; ঘরে বাইরে কেউ যেন পরে না বলে তিনি অভিমানভরে গোসাঘরে খিল দিয়েছিলেন।

তাই তিনি দুই অর্থশাস্ত্রবিশারদ সুবহান, কামালকে তাজ্জউদ্দীনের সঙ্গে পাঠিয়েছিলেন। এক দিক দিয়ে দেখতে গেলে তাঁদের কাজটি খুব কঠিন ছিল না। কারণ

(২) পাকিস্তানের সৌভাগ্য বলুন, দুর্ভাগ্যই বলুন, তার জন্মদাতা মরহুম জিন্না শীয়া, ইসকন্দর মির্জা ও ইয়েহিয়াও শীয়া। ইসকন্দর মির্জা ও ইয়েহিয়া পীরিত করতেন শীয়া ইরানের সঙ্গে এবং তাজ্জিল্য করতেন সুন্নী আফগানিস্তানকে। ডিসেম্বর ১৯৭১-এর প্রথমার্ধে যখন পশ্চিম পাকবাসী জেনে গেল, পূর্ব পাক যায়-যায়, তখন ইয়েহিয়ার চরিত্র-দোষ, কুলদোষ এসবের সন্ধান অকস্মাৎ আরম্ভ হল। তখন—যদিও ইয়েহিয়া কখনো সেটা গোপন করেনি—সবাই চোঁচাতে আরম্ভ করলো, “ব্যাটা ইয়েহিয়া শীয়া। তাই—আমাদের আজ এই দুর্গতি!” সে-‘পাপ’ স্বালনের জন্য তিনি এক শুক্লবরে ‘জাতধর্ম’ খুঁয়ে সুন্নীদের মসজিদে গিয়ে জুম্মার নমাজ পড়লেন। এ যেন কোনো পরম নিষ্ঠাবান বৈষ্ণব ব্রহ্মকালীর মন্দিরে পাঁঠা বলি দিলেন! কিন্তু হায়, সবাই জানেন জাত গেল পেটও ভরলো না!...ভুট্টো সুন্নী, তাই তিনি “ক্ষুদ্রে হিটলার দি থার্ড” হয়েই ছুটলেন সুন্নী কাবুল বাগে।

পাকিস্তানের ফরেন পলিটিকস অধ্যায়ে এর সবিস্তার বয়ান দেব। এই শীয়া, সুন্নী, কাদিয়ানী (স্যর জফরুল্লাহ কাদিয়ানী এবং সাধারণ কাদিয়ানীজন সুন্নী শীয়া উভয়কে কাফির বিবেচনা করে) বোরা, খোজা, মেমনদের মতবাদ সম্বন্ধে কি দিশী কি বিদেশী সর্ব রিপোর্টার উদাসীন। এ যেন আইয়ার আয়েজার, ব্রামিন, ননব্রামিন সম্বন্ধে খবর না নিয়ে দক্ষিণ ভারতের রাজনীতি আলোচনা করা।

‘ক্ষুদে হিটলার দি সেকেন্ড’ হওয়ার কয়েক মাস পরেই ইয়েহিয়া সর্বজন সমক্ষে (বেতার ও টেলিতে) দরদী গলায় স্বীকার করেছেন, “পূর্ব পাকিস্তানীদের অসন্তুষ্ট হওয়ার যথেষ্ট ন্যায়সঙ্গত কারণ আছে। রাষ্ট্রের যে উচ্চ পর্যায়ে মীমাংসা গ্রহণ করা হয় এবং আরো কতকগুলি জাতীয় কার্যকলাপে তাদের পুরো সক্রিয় অংশগ্রহণ করিতে দেওয়া হয়নি।” এখন তা হলে দাঁড়াল এঁরা পিণ্ডির চেলাচামুণ্ডাদের হাতুড়ি ঠুকে ঠুকে দফে দফে বোঝাবেন শিল্পে বাণিজ্যে সর্বক্ষেত্রে পূর্ব বাংলা স্বাধীনতার চব্বিশ বৎসর পরও কী মারাত্মক রকম পঙ্গু হয়ে আছে।

কি কথাবার্তা হয়েছিল, বস্তুত তাঁরা আদৌ সে-সুযোগ পেয়েছিলেন কি না, জানিনে। তবে আজ আমি এ-প্রসঙ্গ তুলছি কেন?

হ্যাঁ, আজই তুলছি। আজ জুষ্টি মাসের পয়লা তারিখ আপনি যান ঢাকার নিউ মার্কেটে। সেখানে জলজ্যাস্ত স্পষ্ট দেখতে পাবেন এই দুই পণ্ডিতের গভীর গবেষণা কিভাবে জলজ্যাস্ত চোখের সামনে স্পষ্ট হয়ে ফুটে উঠেছে। শুনেছি, বিলেতের কোন এক কোম্পানি ছুঁচ থেকে আরম্ভ করে হাতী পর্যন্ত বিক্রি করে। এখানে করে না। একদা করতো। আজ কোনো কিছু চাইলেই সেই এক পেটেন্ট উত্তর “পশ্চিম পাকিস্তানে তৈরী হত : এখন আর আসছে না।” বিশ্বাস করবেন পকেট সংস্করণ শোভন “গীতাঞ্জলি” হাতে নিয়ে বললুম ইটি একটু ধুলোমাখা। তাজা হলে ভালো হয়। বললে এই শেষ কপি; লাহোরে ছাপা, আর আসবে না।” পাঁচমেশালির দোকানেও “নেই, নেই” শুনে বিরক্ত হয়ে বললুম, “আরে মিঞা, মধু—মধু চাইছি। সে তো আসতো সৌদর বন থেকে, বোতলে পোরা হত ঢাকায়...লাল বাগ না কোথায় যেন?” কাঁচুমাচু উত্তর, “জী, ঠিক বলেছেন। তবে না, কারখানার মালিক ছিলেন পশ্চিম পাকিস্তানী। তিনি হাওয়া। দোকানে তালা পড়েছে।” মনে মনে কাষ্ঠহাসি হেসে বললুম, পাট তো এদেশের ডাল ভাত। মসুরা করে এক গাঁট পাট চাইলে হয়তো বলবে, “জী আদমজী দাউদ মিলের কর্তা তো ভাগ গিয়া; শুদোম বন্ধ।”

শেষটায় খাস ঢাকায় তৈরী ঢাকাই মালিকানায়—কি প্লেমু জ্ঞানেন? ওটার আমার দরকার ছিল না। মার্কিং ইনক্। লনড্রিতে যে কালি দিয়ে কাপড়ে নম্বর লেখে। এদেশের ধোপানী যেটা আপন কুঁড়েঘরে বানায়। প্যোর কটিজ ইনডাসট্রি!

কামা পেল।

হ্যাঁ, একদা এরাই দুনিয়ার সেরা মসলিন—যার তরে দুনিয়ার সবচেয়ে ডাঙর বাদশা—চীনের বাদশা এদেশে রাজদূত পাঠিয়েছিলেন।

অবতরণিকা

॥ ৪ ॥

গোড়াতেই সরল সাধুতা ও সহজ ভাষায় পুনরায় স্বীকার করে নি, বাংলাদেশের অনবিস্মরণীয় ন’ মাসের ইতিহাস লেখার মত পাণ্ডিত্য, তথ্যানুসন্ধান করার মত শক্তি, দূর তথা গভীর দৃষ্টিনিষ্কপজনিত দার্শনিক বিজ্ঞতা আমার নেই। বস্তুত এদেশের স্কুল-বয় পর্যন্ত হেন কর্ম করার মত দুরাকাঙ্ক্ষী-জনকে বলে দিতে পারবে, দিনাজপুর থেকে চট্টগ্রাম, সিলেট থেকে বরিশাল জুড়ে ন-মাস ধরে যে ভূতের নৃত্য হয়ে গিয়েছে তার

সাক্ষ্যস্বরূপ মানুষের মনে, মাটির উপর নিচে যেসব সরঞ্জাম-নিদর্শন সঞ্চিত হয়ে আছে সেগুলো আংশিকভাবে সংগ্রহ করাও কঠিন কর্ম। গুণীজন বলবেন, করতে পারলেও অতঃপর শিখাগ্রে আরোহণ করে তার প্রতি সিংহাবলোকন[১] নিক্ষেপ দ্বারা সেগুলো আপনারা অন্তরে সংহরণ করে তার প্রতি ঐতিহাসিক তথা দার্শনিক সুবিচার করা অসম্ভব—উপস্থিত। বলা বাহুল্য আমরা দ্বারা কন্ঠিনকালেও এহেন কর্ম সম্পন্ন করা সম্ভব হবে না। শতায়ু হলে না সহস্রায়ু হলেও না। তবু কেন যে যে-টুকু পারি লিখছি সেটা ধীরে ধীরে স্বপ্রকাশ হবে। উপস্থিত পাঠকের কাছে সনির্বন্ধ অনুরোধ, এ বয়ান থেকে কেউ যেন প্রামাণিকতা প্রত্যাশা না করেন। একই ঘটনা ভিন্ন ভিন্ন লোকের কাছ থেকে ভিন্ন ভিন্ন ভাবে শুনেছি। খুঁটিনাটিতে পার্থক্য থাকার কথা। সাজানো মিথ্যা সাক্ষ্যের বেলাতেই খুঁটিনাটিতেও কোনো হেরফের থাকে না। সত্য সাক্ষ্য মূল ঘটনাকে নড়চড় হয় না; ডিটেলে বেশ-কিছুটা থাকবেই। এ ছাড়া যেসব কাহিনী-কেছা মুখে মুখে এখনো বিচরণ করছে তার অনেকগুলোই কবিজনের কল্পনাবিলাস বা আকাশকুসুম। কিন্তু তারও মূল্য আছে। ব্রজবিহারীকে সত্য সত্যই বিহারবাসী মনে করে রামপাঠা পাঠান ছেড়ে দিয়েছিল কি না তাতে বিন্দুমাত্র আসে-যায় না—আসল তত্ত্বকথা এই :—গল্পটা ক্যারেক্টারিস্টিক কি না, অর্থাৎ গল্পটাতে পাঠান ক্যারেক্টারের নির্ধারিত, তার রাম-পণ্টকামি ফুটে উঠেছে কি না। কাঠবেরালি সত্য সত্যই সর্বাস্থে ধুলো মেখে সেতুবন্ধের উপর সে-ধুলো ঝেড়ে রামচন্দ্রকে সাহায্য করেছিল কি না সেটা বিলকুল অবাস্তব। গল্পটা বোঝাতে চায়, রাবণের ডিকটেটরির বিরুদ্ধে তখন জনসাধারণ কি রকম উঠে পড়ে প্রতিবাদ জানিয়েছিল। অবশ্য সেটা যদি সত্য হয় তবে তো গ্ল্যাটিনামে ডায়মন্ড! নিয়াজীর কোলে ফরমান আলী, পিছনে দাঁড়িয়ে পাখা দোলাচ্ছেন, যশোবন্ত শ্রীমান গভর্নর ডঃ (?) মালিক!

১৯৬৯ সালের ২৫/২৬ মার্চ সকালবেলা পূর্ব পশ্চিম উত্তর পাকিস্তানের জনসাধারণ শুনতে পেল “ছোট হিটলার ডিনেস্ট্র” পয়লা চোট্টা-ওয়ালা হিটলার স্বপ্রশংসিত স্বনির্বাচিত উপাধি “ফিল্ড মার্শাল” বিভূষিত, পৃথিবীর অন্যতম কোটিপতি, মার্কিন প্রেসিডেন্টের দোস্তো, মহামহিম শ্রীযুত আইয়ুব খানের পশ্চাদ্দেশে একখানি সরেস

(১) গুরুগম্ভীর পাণ্ডিত্যপূর্ণ প্রবন্ধে যেখানে ফুটনোট অবজ্ঞানীয় সে হলেও ওই প্রতিষ্ঠানটি আকস্মিকই পীড়াদায়ক। আমার আটপোরে হাবিজাবির বেলা তো কথাই নেই। তাই সরল পাঠককে স্মরণ করিয়ে দিচ্ছি, তিনি আমার রচনার ফুটনোট না পড়লে মোটেই ক্ষতিগ্রস্ত হবেন না—(আসল না পড়লেও হবেন কি না সেটাও বিতর্কাতীত নয়)। আসলে ফুটনোটে এমন কিছু থাকা অনুচিত যেটা না পড়লে পরের মূল লেখা বুঝতে অসুবিধা হয়। অবশ্য মূলে (টেকসটে) কোনো তারাত্টি দেখে যদি পাঠকের মনে হয় ওই বিষয়ে কিঞ্চিৎ আশকথা-পাশকথা শুনতে চান তবে সেটি সাধু প্রস্তাব। কিংবা আপনি রোজা একটি টাকা খরচা করেছেন বলে পত্রিকার বিজ্ঞাপনতক বাদ দিতে চান না তবে সেটা সাধুতর প্রস্তাব। কিন্তু পুনরপি হা—ফি—জ! ফুটনোট পড়ার বাধ্যবাধকতা নেই।

“সার্ভে” শব্দের গুজরাতি অনুবাদ “সিংহাবলোকন”। সিংহ যেরকম পাহাড়ের উপরে উঠে মাথা এদিকে ওদিকে ঘুরিয়ে চতুর্দিকে বিস্তৃত দৃষ্টিনিক্ষেপ করে সবকিছু দেখে নেয়। শব্দটি পর্যবেক্ষণজাত এবং সুন্দরও বটে, বাঙলায় চালু হলে ভালো হয়।

পদাঘাত দিয়ে জেনারেল আগা মুহম্মদ ইয়েহিয়া খান সুবে পাকিস্তানের চোটা হিটলার দি সেকেন্ড রূপে গদি-নশীন হয়েছেন। কিন্তু বিসমিল্লাতেই গয়লৎ (গলৎ)। “আগা” উপাধি সচরাচর ধারণ করেন ইরানবাসী শীয়ারা—“খান” উপাধিধারী হয় সুন্নী পাঠানেরা। এ যেন সোনার পাথরবাটি। কিন্তু “খান” অনেক সময় সম্মানার্থে সকলের নামের পিছনেই জুড়ে দেওয়া হয়—কাবুলে আমার এক জনপ্রিয় সখা বারেন্দ্র ব্রাহ্মণের নামের পিছনে কাবুলীরা খান জুড়ে দিত। সেটা কিছু আশ্চর্য নয়। এই সোনার বাংলাতেই “পশুপতি খান” গয়রহ আছেন।*

আইয়ুবের পতনে পূর্ব বাংলায় যে মহরমের চোখের পানি ঝরেনি সেটা বলা বাহুল্য। একে তো তিনি আহাম্মুখের মত কতকগুলো মিলিটারি ইন্ডিয়টের পাল্লায় পড়ে শেখ সাহেবের বিরুদ্ধে একটা সম্পূর্ণ মনগড়া ষড়যন্ত্রের মামলা খাড়া করার হুকুম দেন, তদুপরি বিশ্বাসভাজন এক মার্কিন পত্রিকা হাটের মধ্যখানে একটি প্রকাণ্ড বিষ্ঠাভাণ্ড, ফাটিয়ে দিয়ে প্রকাশ করে দেয় যে মাত্র সাত বছর রাজত্বকালের মধ্যেই (১৯৬৫) তিনি কুন্নে পঁচিশ কোটি টাকার ধনদৌলত, ইতালির একটা দ্বীপে বিশাল জমিদারি (ওই অঞ্চলে ট্যুরিজম-এর জন্য ইতালীয় সরকারের বিস্তার কড়ি ঢালার মতলব ছিল যার ফলে ধূলি-মুষ্টি রেডিয়াম-মুষ্টিতে পরিণত হত) সাপটে নিয়েছেন আর ইওরো-মার্কিন ব্যাঙ্কে ব্যাঙ্কে কত ডলার পাউন্ড, সুইস ফ্রাঁ জমা আছে তার হিসেব বের করা অসম্ভব। কোনো কোনো দেশের ব্যাঙ্ক সে-দেশের ইনকাম ট্যাক্স বিভাগ, অর্থাৎ স্বয়ং সার্বভৌম সরকার জানতে চাইলেও টোট সেলাই করে বসে থাকে।...ইয়েহিয়া রাজা হয়ে আইয়ুবের দৌলতের খোঁজে বেরিয়েছিলেন বলে কোনো খবর অন্তত আমি পাই নি। এটা পশ্চিম পাকের-একটা সাদা-কালিতে লেখা আইন; ইসকন্দর মির্জাকে গদিচ্যুত করার পর আইয়ুব তাঁর ধনদৌলতের সন্ধান নেন নি। ইয়েহিয়াও আইয়ুবের হাঁড়ির চাল হাঁড়িতেই রাখতে দিলেন। শুধু তাই নয়। আগা-পান্তলা হাতের কজায় পোরা পাকিস্তানী প্রেসকে জবানি হুকুম দেওয়া হল, আইয়ুব খানের খেলাপে যেন উচ্চবাক্য না করা হয়। ইনি মিলিটারির জাঁদরেল উনিও মিলিটারির জাঁদরেল—কাকে কাকের মাংস খায় না—বাংলা কথা।

ইয়েহিয়া জাতে কিজিলবাহ। তিনি দাবি ধরেন, তিনি নাদিরের বংশধর। ওই নিয়ে গবেষণা করার মত দলিল-দস্তাবেজ আমার নেই। তাঁর আদত পিতৃভূমি নাকি নাদিরের দেশে! ভুট্টোর বাস্তবীটে লারখানাতে। তার অতি কাছে মোন-জো-দড়ো।[২] তিনি যদি আজ দুম করে দাবি জানান মোন-জো দড়োতে গলকম্বল দাড়িওলা যে রাজপানা চেহারার মূর্তিটি আবিষ্কৃত হয়েছে তিনি তাঁর বংশধর, তবে ওই মোন-জো দড়োর আবিষ্কর্তা স্বয়ং রাখালদাস বাঁড়যো কি ধরাতলে অবতীর্ণ হয়ে বুক ঠুকে প্রমাণ করতে পারবেন তিনি আর পাঁচটা সিঁদুরি মত সাড়ে বত্রিশ ভাজার বর্ণসঙ্কর।

(২) টাকা-পাঠ-নীতি উপেক্ষা করে যাঁরা এটি পড়ছেন তাঁদের জানাই, শব্দটা এমন ভিন্ন ভিন্ন বিদকূটে ঢঙে উচ্চারিত হয় যে তার শুদ্ধ উচ্চারণ নিয়ে আলোচনা সম্পূর্ণ অবাস্তব নয়। সিন্ধী ভাষায় “মো”=“মৃত” (সংস্কৃত “মৃ” বাংলা “মৃত”) “মোন”-এর “ন” বহুবচন বোঝায়। “জা”=“—দের” (‘S)। “দড়ো”=“টীলা”। একুনে “মৃতদের টীলা”। এক অত্যাশ্চর্য্য সাহী সংস্কৃতজ্ঞ এটা লিখেছেন “মহেন্দ্রদ্বার”।

কিন্তু কিজিলবাশ শব্দটি বাংলা ভাষায় সম্পূর্ণ অপরিচিত নয়। ভারতচন্দ্র লিখেছেন, রাজা বসে আছেন; তাঁর চতুর্দিকে কিজিলবাশ। টীকাকার ভেবেছেন “কিজিল” কথাটা ‘কাজল’ হবে—লিপিকারের ভুল। আর ‘বাস’ মানে তো ‘কাপড়’। কালো পর্দার মাঝখানে রাজা বসে আছেন। আসলে কিজিল-বাশ মানে লাল টুপি (আমি যদুদ্র জ্ঞানি, চুগতাই তুর্কী ভাষায়)। কিজিল-বাশরা লাল টুপি পরতো এবং ভারতবর্ষে প্রধানত দেহরক্ষী বা দরওয়ানের কাজ করতো। আজ আমরা যেরকম ভোজপুরী বা নেপালী দরওয়ান রাখি, বিদেশী বলে এ-দেশের চোর-চোড়ারা চট করে এদের সঙ্গে দোস্তী জমাতে পারবে না বলে। কিজিল-বাশরা শীয়া। এ দেশের সুন্নীদের ঘেন্না করে। ষড়যন্ত্রকারী বা চোর-চোড়াদের পাঞ্জা দেবে না।

ইয়েহিয়া বাপ-পিতেমর ব্যবসাটি ডোবালেন। পাকিস্তানের রক্ষক ভক্ষক হলেন। বদহজমী হল। কবরেজ ভুট্টো তাকে প্যাঞ্জ পয়জারের জোলাপ বড়ি দিলেন ঠেসে। ইয়েহিয়ার ব্যক্তিগত চরিত্র বয়ান একটু পরে আসছে।

ইয়েহিয়া অবতীর্ণ হলেন মূর্তিমান কঙ্করাপে। একহস্তে গণতন্ত্র অন্যহস্তে পূব বাংলার প্রতি বরাভয় মুদ্রা। পূর্বেই নিবেদন করেছি, তিনি স্বীকার করলেন, পূব বাংলার প্রতি অবিচার করা হয়েছে। তিনি গণতন্ত্র প্রতিষ্ঠা করে তাবৎ মুশকিল আসান করে দেবেন। যে-সব মিলিটারি পিচেশ তাঁকে গদিতে বসিয়েছিল তারা ঘোঁরা সুরে বললে, ‘বটে’!

বখলোকের বিশ্বাস ইয়েহিয়া সেপাই; সেপাই মাত্রই বুদ্ধ হয়, অন্তত সরল তো বটে। তদুপরি তিনি মদ্যপান করেন প্রচুরতম। একবার নাকি সন্ধ্যাবেলা তার একটা বেতার ভাষণ দেবার কথা ছিল। ইংরেজ বলে, গড্ মেড্ সিন্স ও ক্লক্ ফর হইস্কি। সে সিন্স সন্ধ্যার ছটা। ইয়েহিয়া ঘুলিয়ে ফেলে সেটা সকাল ছটায় সরিয়ে এনেছেন। তদুপরি তখন বাস করেন পাঞ্জাবে এবং পঞ্চনদভূমি যে পঞ্চমকারের গীঠস্থল সে-কথা ক্রমে ক্রমে ঢাকা চাটগাঁ ধর্মভীরু মুসলমান পর্যন্ত জেনে গিয়েছিল ক্লাবে ক্লাবে পাঞ্জাবী সিভিলিয়ান অফিসারদের মেয়েমদে হইহই বেলেলাপনা করা দেখে। বিশ্বয় মেনে একে অন্যকে শুয়িয়েছে “এরাও মুসলমান?” সে-কথা উপস্থিত থাক। সাঁঝের ঝোঁকে ইয়েহিয়ার বেতার ভাষণ দেবার কথা। কিন্তু তিনি তখন এমনই বে-এজেরার যে কথা জড়িয়ে যাচ্ছে। মূলতবী করা হল ঘণ্টা দুয়েকের তরে। তখনো অবস্থা তদবৎ। শেষটায় রাত দশটা না বারোটায়, বার দুই মূলতবী রাখার পর—আমি সঠিক জ্ঞানিনে—মাই-ডিয়ার-মাই-ডিয়ার জড়ানো গলায় তিনি লিখিত ভাষণের পঠন কর্মটি সমাধান করে পাক বেতার কর্তৃপক্ষকে চিরকৃতজ্ঞতাশাশে বন্ধন করলেন।

অথচ লোকটা অতিশয় ঘড়েল, কুচক্রী, বিবেকহীন এবং পাশবিকতম অত্যাচারের ব্যবস্থা করতে অদ্বিতীয়। আমি ভেবে-চিন্তেই “অদ্বিতীয়” বললুম। একাধিক ফ্রয়েডিয়ান ঐতিহাসিকের মুখে আমি শুনেছি—আর নিজে তো পড়েছি ভুরি ভুরি—তাঁদের জ্ঞান মতে, কিংবদন্তীর উপর বরাত না দিয়ে, কেবলমাত্র প্রামাণিক ইতিহাসের উপর নির্ভর করে বলতে গেলে পৈশাচিক নিষ্ঠুরতায় হাইনারিশ হিমলার অদ্বিতীয়। ১৯৭১-এর পর এঁদের সঙ্গে দেখা হয়নি। আমার মনে কণামাত্র সন্দেহ নেই, এখন তাঁরা মুক্তকণ্ঠে স্বীকার করবেন ইয়েহিয়ার তুলনায় হিমলার দুষ্কপোষ্য—শিশু—শিশু—শিশু।

কারণ হিমলারের বিরুদ্ধে কি ন্যূনবর্ণ, কি হল্যান্ড বেলজিয়ম বা অন্যত্র এ অভিযোগ

কস্মিনকালেও উত্থাপিত হয়নি যে তার চেলাচামুণ্ডারা নারীধ্বংস করেছে। তাদের স্তনকর্তন, দেহে উত্তপ্ত লৌহ দ্বারা লাঞ্জন-অঙ্কন এবং অবর্ণনীয় অন্যান্য অত্যাচারের কথাই ওঠে না।

ইয়েহিয়ার পৈশুণ্য প্রগ্রামে এ-আইটেম ছিল। এবং সর্বপ্রকার পৈশাচিক ক্রুরতায় দক্ষতা লাভের জন্য কোনো এক দেশে বিশেষ একটা প্রতিষ্ঠান আছে। ইয়েহিয়া তার জোয়ান এবং অফিসারের বাছাই বাছাই স্যাডিস্টদের সেখানে পাঠায়।

কিছুদিন পূর্বে ভুট্টো প্রকাশ্যে স্বীকার করেছেন, “বাংলাদেশে ইয়েহিয়ার মিলিটারি বলপ্রয়োগে আমার সম্মতি ছিল তবে অ-ত খানি না।”

ইস্তের

পূর্ব-পশ্চিম উভয় পাকিস্তানের পয়লা নম্বরী নটবর ছিলেন—এখানে সীমিত ভাবে আছেন—ইয়েহিয়া খান। তিনি তাঁর হারেমের জন্য জড়ো করেছিলেন দেশ-বিদেশে থেকে হরেক রকম চিড়িয়া। এ-রকম একটা আজব কলেকশন কেনা এক বারের তরে নয়ন ভরে দেখতে চায়? ইয়েহিয়ার কাবুল ব্যাটাও দেখলেন, এবং একটিতে মজেও গেলেন। কুলোকে বলে বাপ-ব্যাটাতে নাকি তাকে নিয়ে রীতিমত ঝগড়া-কাজিয়া হয়। আখেরে বাপই নাকি জিতেছিলেন। এই নিয়ে পাকিস্তান বাংলাদেশ উভয় মুন্সুকের সংবাদপত্রে মেলা রগরগে কেছা বেরোয়। আমাকে এক সাংবাদিক শুধোলেন, “মেয়েটা এ-লডায়ে নিল কোন্ পক্ষ?” আমি বললুম “দুটো কুকুর যখন একটা হাড়ির জন্য লড়ে তখন হাড়িটা তো কোন পক্ষ নেয় না। এটা আপ্তবাক্য; আমার আবিষ্কার নয়।” সাংবাদিক তখন আরো বিস্তর নয়া কেছাকাহিনী শোনালেন।

তবে ইয়া, এ-কথা নাকি কেউই অস্বীকার করেনি যে তাঁর হারেমের মুকুটমণি নাকি পূর্ব বাঙলার একটি মেয়ে। তিনি শ্যামা। তাই তাঁর পদবী “ব্ল্যাক বিউটি”—“কালো মানিকও” বলতে পারেন। তাঁর স্বামী একদা পূর্ব পাকিস্তানের পুলিশ আপিসার ছিলেন এবং ইয়েহিয়া একবার সে-শহর পরিদর্শন করতে গেলে তাঁর গৌরবে চিরপ্রধানুযায়ী বিরাট এক পার্টি দেওয়া হয়—কিংবা তিনিই দেন। সে পার্টির “প্রাণ” ছিলেন ব্ল্যাক বিউটি। বর্ণনাতীত স্মার্ট। ইয়েহিয়া মুগ্ধ হলেন। উভয়কে ইসলামাবাদে বদলী করা হয়। পুলিশম্যানকে অস্ত্রিয়া না কোথায় যেন রাজদূতরূপে পাঠানো হল। এটা কিছু নূতন পদ্ধতি নয়। তিন চার হাজার বছর পূর্বে ইহুদীদের রাজা ডেভিড এক বিবাহিত রমণীতে মুগ্ধ হয়ে তাকে গর্ভদান করেন। এবং যে রণাঙ্গনে তখন যুদ্ধ চলছিল সেখানে (বাইবেল থেকে উদ্ধৃতি দিচ্ছি) “দায়ুদ ষোয়ারের নিকটে (সেনাপতিকে) এক পত্র লিখিয়া উরিয়ের (ঐ রমণীর স্বামীর) হাতে দিয়া পাঠাইলেন। পত্রখানিতে তিনি লিখিয়াছিলেন, তোমরা এই উরিয়কে তুমুল যুদ্ধের সম্মুখে নিযুক্ত কর, পরে ইহার পশ্চাৎ ইহাতে সরিয়া যাও, যেন এ আহত ইহিয়া মারা পড়ে।” (শমুয়েল ১১; ৮-২৪)।

ইয়েহিয়া উপরে উল্লেখিত চালের দ্বিতীয়ার্ধ সুসম্পন্ন করেননি, তবে এস্থলে কালো মানিক কাহিনীর কালানুক্রমিক ক্রমবিকাশ ছিন্ন করে পরবর্তী একটি ঘটনার উল্লেখ করলে কাহিনীটির পরম্পরা অক্ষুণ্ণ থাকে : ভুট্টো রাজা হয়ে ইয়েহিয়ার চরিত্রলোভ নিয়ে গবেষণা করার জন্য পরশ্রীকাতরদের যে-সময় লেলিয়ে দিলেন ঠিক সেই সময়ে ব্ল্যাক

বিউটির কাবিন-নামা-সম্মত স্বামী অস্থিয়ার পদস্থলে অকস্মাৎ হার্টফেল করে সাধনোচিত ধামে প্রস্থান করেন। বিধির উপর সে ঘটনা কি প্রকারের প্রতিক্রিয়ার সৃষ্টি করেছিল সে-বিষয়ে সমসাময়িক ইতিহাস নীরব।

তবে তিনি তাহার বহু পূর্বেই ইয়েহিয়ার গৌরবসূর্যের মধ্যগগনকালে মাদাম পম্পাদুরে পরিবর্তিত হয়ে গিয়েছেন।

যে-বাড়ির উপরের তলায় বসে ইয়েহিয়া দোদগু প্রতাপে রাজত্ব করতেন তার নিচের তলায় বসতেন আর্মির হোমরা-চোমরারা। তাঁরা সরকারি তাবৎ কাগজপত্র, বিশেষ করে সরকারি বেসরকারি স্পাইদের রিপোর্ট পড়তেন, আপোসে আলোচনা করে সিদ্ধান্তগুলো পেশ করতেন হজুরের কাছে দোতলায়, তাঁর শেষ হুকুমের জন্য—সে বাবদে তিনি ছিলেন সম্পূর্ণ স্বাধীন। নিচের তলার জাঁদরেলদের মোড়ল ছিলেন ইয়েহিয়ার সর্বোচ্চ পদধারী স্টাফ অফিসার লেফটেনেন্ট-জেনারেল পীরজাদা। ইনিই ছিলেন রাজা ইয়েহিয়ার চাণক্য—কদম্বে।

কিন্তু যে-ই হোন, আর যা-ই হোন সবাইকে প্রথম যেতে হত কালো মানিকের খাস-কামরায়—এস্টেক পীরজাদাকেও। সে-যাওয়াটা নিতান্ত একটা লৌকিকতা ছিল বলে মনে হয় না। তবে কি তিনি ইয়েহিয়াকে ততখানি গ্রাস করতে পেরেছিলেন, যতখানি সেক্রেটারি বরমান নাটকের শেষাঙ্গে হিটলারকে কজায় এনেছিলেন? এ-বিষয়ে আমার অসীম কৌতূহল। কারণ যে বাইবেল থেকে আমি অল্পক্ষণ আগে একটি উদাহরণ দিয়েছি সেই বাইবেলেই আরেকটা উদাহরণ আছে যেটা কালো মানিকের সঙ্গে টায় টায় মিলে যায়। পাঠকের ধৈর্যচ্যুতি হতে পারে, কিন্তু আমি নিরুপায়। রগরগে কেলেকারি কেচ্ছার কাহিনী লেখার জন্য আমার চেয়ে যোগ্যতর অনেক গুণী আছেন। অধম সর্বক্ষণ সর্ব ঘটনার পূর্ব উদাহরণ খোঁজে ধর্মের তুলনামূলক ইতিহাসে।

ইরাণের দিগ্বিজয়ী সম্রাজ অহশেরশ—Artaxerxes—আপন রানীর ব্যবহারে ক্রুদ্ধ হয়ে অন্য রানীর সন্ধানে রাজপ্রাসাদে অসংখ্য সুন্দরী সমবেত করলেন তাঁর বিশাল রাজত্বের ভিন্ন ভিন্ন প্রদেশ থেকে। এঁদেরই একজন ইহুদি তরুণী সুন্দরী ইস্তের। নম্র স্বভাব ধরে ও অল্পে সন্তুষ্ট। রাজা স্বয়ং বিশুদ্ধ আর্থ বংশীয়; পক্ষান্তরে ইহুদিদেরও জাত্যাভিমান কিছুমাত্র কম নয়—তারা “সদাপ্রভু য়েহোভার স্বনির্বাচিত সর্বশ্রেষ্ঠ জাত।” ইস্তেরের সৌন্দর্যে ও আচরণে মুগ্ধ হয়ে রাজা স্বহস্তে তার মাথায় রাজমুকুট পরিয়ে দিলেন।

রাজার প্রধানমন্ত্রী হামন ইহুদিদের প্রতি এতই বিরূপ ছিলেন যে সে জাতকে সম্পূর্ণরূপে বিনাশ করার উদ্দেশ্যে রাজার সম্মুখে নিবেদন করলেন :

(বাইবেলের ভাষায়) “আপনার রাজ্যের সমস্ত প্রদেশস্থ জাতিগণের মধ্যে বিকীর্ণ অথচ পৃথককৃত এক জাতি আছে (“বাঙালরা” সর্বত্র “বিকীর্ণ” না হলেও তারা যে অত্যন্ত “পৃথককৃত” সে-বিষয়ে কোনো সন্দেহ নেই—লেখক); অন্য সুকল জাতির ব্যবস্থা-ইহতে তাহাদের ব্যবস্থা ভিন্ন (পাঞ্জাবী পাঠান বেলুচদের “ব্যবস্থা” থেকে বাঙালির ব্যবস্থা যে ভিন্ন সে কথা তারাও জানে, আমরাও জানি। হামন বলেননি, কিন্তু এ-স্থলে আমরা, বাঙালিরা বলি, এবং তাই নিয়ে আমরা গর্ব অনুভব করি—লেখক); এবং তাহারা মহারাজের ব্যবস্থা পালন করে না।” হামনের মতে এইটাই তাদের সর্বপ্রধান পাপ। আমরা বাঙালিরা বলি, “পালন করেছি, পালন করেছি,—সাধ্যমত পালন করেছি,

ঝাড়া তেইশটি বছর ধরে। নিতান্ত যখন সহ্যের সীমানা পেরিয়ে গিয়েছে তখন আপত্তি জানিয়েছি অত্যন্ত অহিংসভাবে; খানরা তখন নিরস্ত্র জনতার উপর গুলি চালিয়েছে।”

হামন তাই সর্বশেষে সম্রাট অহংস্বরের সামনে নিবেদন করলেন :

“যদি মহারাজের অভিমত হয়, তবে তাহাদিগকে বিনষ্ট করতে লেখা হউক।”

সম্রাট সেই আদেশ দিলেন। এবং যেহেতু তিনি সম্রাট তাই নুকোচুরির ধার ধারেন না। তাই তাঁর লিখিত আদেশ—“ধাবকগণ দ্বারা রাজার অধীন সমস্ত প্রদেশে প্রেরিত হইল যে একই দিনে, অদর মাসের ত্রয়োদশ দিহে যুবা ও বৃদ্ধ, শিশু ও স্ত্রী সুদ্ধ সমস্ত যিহুদী লোককে সংহার, বধ ও বিনাশ এবং তাহাদের দ্রব্য লুট করিতে হইবে।”

ইয়েহিয়া রাজা নয়। দারওয়ান বংশের দাস। সে ২৫ মার্চ শেখ মুজিব এমন কি তার ইয়ার ভুট্টোকে না জানিয়ে—ভুট্টোকেও বিশ্বাস নেই, পাছে সে ফাঁস করে দেয়—ঢাকা থেকে পালিয়ে যাবার সময় তার কসাই টিক্কা খানকে আদেশ দিয়ে যায়, “আমি নির্বিন্দে করাচী গিয়ে পৌঁছই—বলা তো যায় না, ‘দ্যাট উয়োমেনের’ হুকুমে ইন্ডিয়ানরা আমার প্লেনে বস্জোপোসাগরে বা আরব সাগরে হামলা করতে পারে। করাচী গিয়ে মাত্র তিনটি শব্দের একটি কোড রেডিয়োগ্রাম পাঠাবো—‘সর্ট দেম আউট’—টেনে টেনে বের করো বাছাই বাছাই মাল।” বাকিটা যথাস্থানে হবে। ইস্তেরের কাহিনীতে ফিরে যাই।

বলা বাহুল্য, যিহুদিদের ভিতর হাহাকার পড়ে গেল।

ইস্তেরের পিতৃব্য তখন রাজার কঠোর আদেশ তাঁকে জানালেন এবং “তিনি যেন রাজার নিকটে প্রবেশ করিয়া তাহার কাছে বিনতি ও স্বজাতির জন্য অনুরোধ করেন, এমন আদেশ করিতে বলিলেন।”

ইস্তের রাজার সম্মুখে উপস্থিত হলেন। রাজা বললেন, “ইস্তের রানী, তোমার নিবেদন কি? রাজ্যের অর্ধেক পর্যন্ত হইলেও তাহা সিদ্ধ করা যাইবে।” ইস্তের বললেন, “যদি মহারাজের ভাল বোধ হয় তবে যিহুদীদিগকে বিনষ্ট করণার্থে যে সকল পত্র লিখিত হইয়াছে সে সকল বার্থ করিবার জন্য লেখা হউক। কেননা আমার জাতির প্রতি যে অমঙ্গল ঘটিবে, তাহা দেখিয়া আমি কিরাপে সহ্য করিতে পারি?”

রাজা তদন্তেই যিহুদীদিগকে অভয় দিলেন। তাঁর সে-পত্র “অহংস্বরশ রাজার নামে লিখিত ও রাজার অঙ্গুরীয়ে মুদ্রাঙ্কিত হইল, পরে দ্রুতগামী বাহনাদ্বারা অর্থাৎ বড়রাজার রাজকীয় অশ্বে আরুঢ় ধাবকগণের হস্তদ্বারা সেই সকল পত্র প্রেরিত হইল।” (ধর্মপুস্তক অর্থাৎ পুরাতন ও নূতন নিয়ম, এষ্টের, ১—৮; ২—১৩)।

দুষ্ট মন্ত্রীর চক্রান্ত বুঝতে পেরে রাজা গণনিধনের মত মহাপাপ থেকে নিজেকে রক্ষা করতে সমর্থ হন। বাংলাদেশের এই ন-মাস-জোড়া গণনিধন প্রচেষ্টা বিশ্বজন শুধু দাঁড়িয়ে দাঁড়িয়ে দেখল—সাহায্য করলো একমাত্র ভারত। সে তার ধর্মবুদ্ধি বাইবেল থেকে সংগ্রহ করে না। শুনেছি রাষ্ট্রপতি নিকসন ষ্ট্যান; তাই বিবেচনা করি তিনি বাইবেল পড়েন নি। কিন্তু এহ বাহ্য।

আমার মনে প্রশ্ন জাগে, ইয়েহিয়া যখন ব্ল্যাক বিউটির স্বজাতি, জাতি কুটুম্বের সর্বনাশ করেছিলেন তখন তিনি কি একবারের তরেও ভাবেননি—ইস্তেরের আপন ভাষায়—“আপন জাতি কুটুম্বের বিনাশ দেখিয়া কি করিয়া সহ্য করিতে পারি?”

এ-কাহিনীর একটি ঘটনার উল্লেখ আমি এতক্ষণ করিনি।

পিতৃব্য যখন ইস্তেরকে আদেশ দেন “তিনি যেন রাজার নিকটে প্রবেশ করেন”, তখন ইস্তের প্রথমটায় ভয় পেয়েছিলেন কারণ “প্রজারা সকলেই জানে, পুরুষ কি স্ত্রী, যে কেহ আহুত না হইয়া ভিতরের প্রাঙ্গণে রাজার নিকট যায়, তাহার জন্যে একমাত্র ব্যবস্থা এই যে, তাহার প্রাণদণ্ড হইবে।”

পিতৃব্য ইস্তেরের ভীতির কথা শুনে তাঁকে জানান :—

“সমস্ত যিহুদীর মধ্যে কেবল তুমি রাজবাটিতে থাকাতে রক্ষা পাইবে, তাহা মনে করিয়ো না। ফলে যদি তুমি এ সময়ে সর্বতোভাবে নীরব হইয়া থাক তবে অন্য কোনো স্থান হইতে যিহুদীদের উপকার ও নিস্তার ঘটবে (বাংলাদেশের বেলা তাই হল—লেখক), কিন্তু তুমি আপন পিতৃকুলের সহিত বিনষ্ট হইবে; আর কে জানে যে, তুমি এই প্রকার সময়ের জন্যই রাজ্যীপদ পাও নাই (এ-স্থলে রাজবল্লভা হও নাই!)”

বাঙালির “উপকার ও নিস্তার” ঘটেছে, এখন প্রশ্ন ব্ল্যাক বিউটি কি নিস্তার পেয়েছেন? কিন্তু এই সর্ব বাক্য বাহ্য।

ব্ল্যাক বিউটি গৌণ, তাঁর বৈধব্যপ্রাপ্তি গৌণ, তাঁর সর্বের গৌণ।

পৃথিবীর গণনিধন ইতিহাসে “ইস্তের” তার প্রথম প্রামাণিক উল্লেখ।

অধম যখন তার প্রথম অবতরণিকায় বলেছিল, এ-ন মাসের বহু বিচিত্র ঘটনা থেকে সৃষ্ট হবে পুরাণ, এপিক, রূপকথা, লোকগীতি তখন সে ক্ষণতরে বিস্মৃত হয়েছিল যে রচিত হবে সর্বোপরি নবীন শাস্ত্রগ্রন্থ।

শেখের জয়

সাধারণ নির্বাচন তথা গণতন্ত্রের আশ্বাস দিয়ে পরে সে প্রতিজ্ঞা ভঙ্গ করে কেউ যে কখনো, এমন কি এ-যুগে, তাঁতে রাজত্ব করেন নি এমন নয়। কিন্তু ইয়াহিয়া জানতেন, রাজত্ব তিনি করতে পারবেন তবে সে-রাজত্ব দীর্ঘস্থায়ী হবে না—অতখানি দূরদৃষ্টি তাঁর ছিল। তদুপরি উভয় পাকিস্তানের লোক ঝাড়া সাড়ে দশটি বছর ধরে স্বাধিকারপ্রমত্ত ডিকটেটরি শাসনের চাবুক খেয়ে খেয়ে হনো হয়ে উঠে আইয়ুবের পতন ঘটিয়েছে; ইয়াহিয়াও যদি ডিকটেটরি করতে চান তবে তাঁকেও মোটামুটি আইয়ুবের প্যাটর্নই বুনতে হবে এবং জোলাপ দিতে হবে আরো বড়া এবং কড়া ডোজে। কারণ ইতিমধ্যে জনসাধারণ ডিকটেটরির ফলফিকির খাসা বুঝে গিয়েছে এবং সেগুলোকে কি কৌশলে বানচাল করতে হয় সেটাও বিলক্ষণ রপ্ত করে নিয়েছে। একটি সামান্য সরেস উদাহরণ দি। যারা সুদুমাত্র আলা ভিনসেন্ট স্মিৎ এবং তাঁর গুরুকুল মোগল অ্যাডমিনিস্ট্রেশনের ওয়াকেআ-নবীস (waknis) পঠা-নবীস সম্প্রদায়ের নিছক সন তারিখসহ ঘটনার ফিরিস্তি সর্বোৎকৃষ্ট পাঠ্যবস্ত্র বলে বিশ্বাস করেন আমি তাঁদের সেবা করার মত এলেম পেটে ধরিনে। আমি বরঞ্চ সেই সব মোগল লেখকেরই পদাঙ্ক অনুসরণ করি যারা ইতিহাসের বাহানায় গালগল্প শোনাতে, মাঝেমিশেলে গুল তক্ মারতেন। অর্থাৎ ঘুমন্ত ইতিহাসের হাত দিয়ে গাঁজা খেয়ে নিতেন।

লোকটি আমার ভায়রা। গাঙ্গাগাঙ্গা ইয়া লাশ। রসবোধ প্রচুর। তিনি তখন মৈমনসিংয়ের সিভিল সার্জন। কি একটা ছোট চাকরি খালি পড়েছে। এমন সময় আইয়ুবের প্যারা গবর্নর মোনেম খান করলেন ডাক্তারকে ট্রাঙ্ক কল। হুকুর দিয়ে

বললেন, ‘অমুককে চাকরিটা দেবে।’ পরিচয় যৎসামান্য কিন্তু সুবেদার মোনেম বাপের বয়সী লোককেও তুমি তুই করতেন।

ডাক্তার ফোনের ফ্রেডলকে বাও বাও করতে করতে সবিনয় বললেন, “নিশ্চয়, নিশ্চয়।”

পরের দিনেই ফাইনাল ডিসিশন। ডাক্তার গবর্নরের প্যারাকে নোকরী দিলেন না। সন্ধ্যার সময় ঢাকা থেকে ফের ট্রাঙ্ক কল।

“কী, তোমার এত আশ্পদা! আমার হুকুম অমান্য করলে? জানো, আমি তোমার চাকরি খেতে পারি—”

এইটে ছিল তাঁর হট্‌ফেভ্রেট হুমকি! জ্ঞাতে ছিলেন মাছি-মারা বটতলীয়া সিকি কড়ির উকীল। কাজ ছিল আদালতকে ‘হজুর হজুর’-এর প্রচুর তৈলমর্দন করে দু-চারটে জামিন মঞ্জুর করিয়ে নিয়ে ছমা গাঁয়ের বাড়িতে হাঁড়ি চড়ানো কড়ি কামানো। এ-সব আমার শোনা কথা। তবে মোনেম সম্বন্ধে দশের মুখ যা বলছে তার থেকে আমার মনে কোনো সন্দেহ নেই, স্বয়ং হিটলারও এমন তাঁবেদার খিদমৎগার মোসায়েব কপালে নিয়ে ডিকটেক্টর হন নি—আইয়ুবের কপালে যা নেচেছিল।

সুবেদারের হুকুর শুনে ডাক্তার বললেন, “একশ বার পারেন, সার, একশ বার পারেন। কিন্তু লোকটা—”

“আমি কিছু জানতে চাইনে—”

“আমার কথাটা শুনুন না, স্যার। ছেলেটাকে আমি শুধালুম, ‘আমাদের লাট সায়েবের নাম কি?’ বলে কি না, ‘মুহম্মদ মুফিজ চৌধুরী!’ তারপর—”

ডাক্তার বললেন, “দড়াম করে শব্দ হল। ডেড্‌ কট্‌ অফ্‌!”

আমি অবাক হয়ে বললুম, “আপনার বুকের পাটা তো কম নয়!”

ডাক্তার অতিশয় সবিনয় : “কী যে বলেন, ভাই সায়েব। আপনি জানান না যে যত ছোটো হিটলারের ক্ষুদ্রে বাচ্চা হয় তার দেমাক-রওয়াব তত টনটনে। সেখানে মোকা মাফিক খোঁচা মারতে পারলেই তিনি বন-ফায়ার! কী! আমার নামটা পর্যন্ত জানে না যে বুড়বক—ইত্যাদি।”

এ-রকম আরো বিস্তর কায়দা রপ্ত করে নিয়েছিল বাংলাদেশের অতিশয় নিরীহজনও—তবে হিউমার দিয়েও যে হিটলারী হুকুম বানচাল করা যায়, আমার কাছে এই তার প্রথম ও শেষ উদাহরণ।

তাই ইয়েহিয়া হির করলেন, ভিন্ন মুষ্টিযোগ প্রয়োগ করতে হবে। দাঁও গণতন্ত্র, হাতে রাখো কলকাঠি।

বয়স্ক পাঠকের স্মরণ থাকতে পারে, ইংরেজের কাছে স্বরাজের কথা তুললেই সে বলতো, ‘আলবাৎ স্বরাজ দেব। হিন্দু চায় অখণ্ড ভারত, মুসলমান চায় পাকিস্তান, আর নেটিভ স্টেটের মহারাজারা চান, যেমন আছে তেমনি থাক, তোমাদের সঙ্গে সন্ধির শর্ত ছিল, আমরা তোমাদের ব্রিটিশ ইন্ডিয়ার স্বার্থে হাত দেব না, আর তোমরা আমাদের রক্ষা করবে। তোমরা চলে গেলে আমাদের রক্ষা করার জিম্মেদারী নেবে কে? তাই তোমরা তিন দল এক মত হয়ে এক গলায় বলো, কোন্‌ ডঙের, কোন্‌ সাইজের কোন্‌ রঙের স্বরাজ চাও তোমরা। একমত হলেই আমরা খালাস।’

এটা ডিভাইড অ্যান্ড রুল নয়, এটা 'ডিভাইড অ্যান্ড ডোস্ট কুইট ইন্ডিয়া'।

ইয়েহিয়া সেই মন্তব্যই আঁটলেন। ইংরেজ তাঁর ফাদার মাদার গর্ভস্রাব জ্বরজ-সন্তানও প্রকৃত পিতার হৃদিস পেলে তার পদাঙ্ক অনুসরণ করে। আর কে না জানে, তাবৎ নৃতত্ত্ববিদ এক বাক্যে বলেন, ইয়েহিয়ার যে অঞ্চলে জন্মভূমি সেখানে বিস্তর জাত-বেজাত এসে মিশেছে—দেদার বর্ণসঙ্কর।

ইয়েহিয়া হিসেব করে দেখলেন, গণনির্বাচনে কোনো দলই সংখ্যাগুরু হবে না। পূর্ব আর পশ্চিম পাকিস্তান তো এক হতেই পারে না। এক পশ্চিম পাকিস্তানী ওয়াকিফহাল সজ্জন বলেছেন, 'পাকিস্তানের দুটো ডানা (উইং)—পূর্ব পাকিস্তান আর পশ্চিম পাকিস্তান। আমি দুটো পাখাই দেখেছি, কিন্তু পাখিটাকে কখনো দেখতে পাই নি।' তাই যে পাখিটা আদৌ নেই তার দুটো ডানা পলিটিকাল পার্টি মাফিক টুকরো টুকরো করতে কোনো অসুবিধা তো নেই। ইংরেজের মত তিনিও বহুবিধ বিভক্ত উভয় পাকিস্তানের উপর বহুকাল ধরে রাজত্ব করে যাবেন। ইনশাল্লা সুবহানাল্লা!

গুপ্তচরদের শুধোলেন, 'পাকা খবর নিয়ে বলো দেখি, কোন্ পার্টি কত ভোট পাবে বলে অনুমান করা যায়।'

এ-স্থলে ওয়াকিফহাল মহলে নানা মত প্রচলিত। এক দল বলেন, ডিকটেক্টরদের সঙ্গে যারাই কাজ-কারবার করেছে তারাই জানে, ডিকটেক্টররা শুনতে চান সেই রিপোর্ট যেটা আপন মনের মাধুরীর সঙ্গে মিশে যায়। ডিকটেক্টররা চিরকালই দাবি করেন তাঁরা এক অলৌকিক ষষ্ঠেন্দ্রিয় দিয়ে ভবিষ্যতে কি ঘটবে তা দেখতে পান। গুপ্তচরের রিপোর্ট যদি সেই ভবিষ্যৎকে সায় দেয় তবে উত্তম, নইলে সেটা গডডায়াম অবজেকটিভ, বাস্তব—কিন্তু বর্তমানের বাস্তব। আখেরে ভোটের ফলাফল কি হবে সেটা এ-রিপোর্ট প্রতিবিশ্বিত করেছে না। তবে গুপ্তচরদের কাছ থেকে রিপোর্ট চাওয়ার প্রয়োজনটা কি? সেটা শুধু সন্দেহপিচেশ দু-একটা মুখ জেনরেলদের বোঝাবার জন্য যে কোনো পার্টিই মেজরিটি পাবে না।

১৯৭০-এর মাঝামাঝি—আমার মত—কিংবা হেমন্তে শীতে যারাই এ দেশে বেড়াতে এসেছেন তাঁহাদের মনে কোনো সন্দেহ হয় নি যে শেখ নাও জিততে পারেন। তবে তিনি যে আখেরে গণতন্ত্রের ইতিহাসে অভূতপূর্ব—এ-রকম একটা খান্ডারিং মেজরিটি পেয়ে যাবেন সেটা বোধ হয় কেউই কল্পনা করতে পারেন নি। তৎসঙ্গেও ইয়েহিয়ার টিকটিকিরা নির্বাচনের শেষ ফল কি হবে সে-সম্বন্ধে যে ভবিষ্যৎ—রাশি গণনা পাঠালেন সেটা ইয়েহিয়ার দোস্ত দশমন উভয়কেই আজ অবিশ্বাস্য বিশ্বাসে বেকুব বানিয়ে দেবে।

আসেসমিত্রে সীট ৩০০টি। তদুপর আরো তেরোটি সীট বেগমসায়োবাদের জন্য সংরক্ষিত; ইয়েহিয়ার স্টাটিসটিশিয়ান বা বৈজ্ঞানিক গণত্বকার টিকটিকিরা নিম্নের ছক কেটে দিলেন। উভয় পাকিস্তান মিলে সীট পাবেন—

আওয়ামি লীগ	...	৮০
কয়ুমের মুসলিম লীগ	...	৭০
মুসলিম লীগ (দৌলতনা দল)	...	৪০
ন্যাশনাল আওয়ামি পার্টি (ওয়ালি দল)	...	৩৫
পাকিস্তান পিপলস্ পার্টি (ভুট্টো)	...	২৫

বাদবাকি সীটগুলো মোটামুটি এই হারেই হবে—আভাস দিলেন ফলিত জ্যোতিষীরা।

ইয়েহিয়া উর্দু বলার সময় হনুকের[১] করেন যুক্তপ্রদেশের (সেটা ইন্ডিয়া—তওবা, তওবা!) উর্দুভাষীদের। সেই উচ্চারণে সানন্দে হুকার ছাড়লেন ইয়েহিয়া ‘ইয়েহ!’ নামের সঙ্গে আনন্দসূচক বিশ্বয়বোধক ধ্বনি হবহ মিলে গেল।

কিন্তু হায়, কাশীরাম দাস এই গৌড়ভূমিতেই আগুবাঁকা বলে গিয়েছিলেন :

কতক্ষণ জলের তিলক থাকে ভালে?

কতক্ষণ থাকে শিলা শূন্যেতে মারিলে?

ভোটভূটের শেষ ফল যখন বেরুলো তখন দেখা গেল :—

আওয়ামি লীগ	...	১৬০
ভূট্টোর পাকিস্তান পিপল্‌স্‌ পার্টি	...	৮১
কয়ুমের মুসলিম লীগ	...	৯
মুসলিম লীগ (দৌলতনা দল)	...	৭
ন্যাশন্যাল আওয়ামি পার্টি (ওয়ালি দল)	...	৬
পাঁচটা ভিন্ন ভিন্ন পার্টিতে সর্বসাকুল্যে	...	২১
ইনডিপেনডেন্ট	...	১৬
		৩০০

দুই হিসেব মেলালে কার না চক্ষু স্থির হয়!

মহিলাদের সংরক্ষিত তেরোটা সীট থেকে আওয়ামি লীগ পেল আরো সাতটি সিট—একুনে ১৬৭। পূর্ব বাঙলায় সীট ছিল সর্বসমেত ১৬৯; অর্থাৎ মাত্র দুটি সীট আওয়ামি লীগ পায়নি।

বিগলিতার্থ অ্যাসেমব্লিতে ভূট্টোকে নিয়ে পশ্চিম পাকিস্তানের সব দল এক গোয়ালে ঢুকলেও আওয়ামি লীগকে হারাতে পারবেন না।

লেগে গেল ধুন্দুমার। ইয়েহিয়া স্পষ্ট দেখতে পেলেন অ্যাসেমব্লিতে এখন তিনি গোটা পাঁচেক দলকে বাঁদর নাচ নাচিয়ে আপন ডিকটেক্টরি অক্ষুণ্ণ রেখে ভারতের সঙ্গে “হাজার বছর ব্যাপী মোকাবেলা” করে যেতে পারবেন না।

আইনত ভূট্টো কেবলমাত্র বিরোধী দলের নেতৃত্ব করতে পারেন। কিন্তু তিনি উচ্চকণ্ঠে বলে বেড়াতে লাগলেন, মুজীব যে-রকম পূর্ব পাকিস্তানের নেতা তিনিও তেমনি পশ্চিম পাকিস্তানের নেতা। এখন এসে গেছে দুই পাকিস্তানের মোকাবেলার লগ্ন।

এ-স্থলে প্রথমেই বলতে হবে, উভয় পাকিস্তানের মোকাবেলা বা সংঘর্ষের আশা বা আশঙ্কার কথা শেষ সাহেব কখনো তোলেন নি। ভোটভূটিতে বিরাট সংখ্যাধিক্য পাওয়ার পরও তিনি কখনো বলেন নি—এইবারে আমরা তাবৎ সমুদ্র পূর্ব-পশ্চিম পাকিস্তানের উপর রাজত্ব করবো—যদিও সেটা বলার আইনত ধর্মত সর্ব হক্ক আওয়ামি লীগের ছিল। ভূট্টো যদি এখনো বলেন “পাকিস্তান দ্বিখণ্ডিত হয়নি, জিন্দাবাদ অখণ্ড পাকিস্তান” তবে আওয়ামি লীগের এখনো সে কথা বলার হক্ক আছে।

বস্তুত জনাব ভূট্টো যদি নিজের জীবন্ত-সমাধির তামাসা নিজে দাঁড়িয়ে দাঁড়িয়ে দেখতে চান, তবে অখণ্ড পাকিস্তান সরকারের কানুন অনুযায়ী তিনি ন্যাশনাল

(১) রবীন্দ্রনাথের সর্বাগ্রজ দ্বিজেন্দ্র একদা লেখেন : টু ইমিটেট=অনুকরণ : টু এপ্ (ape)=হনুকের। ইংরিজি ধ্বনি ত্র্যুত্বিকরা এই ককনি H হ-টি লক্ষ্য করবেন।

অ্যাসেমব্লির অধিবেশন ডাকুন ঢাকায়, যেটা ৩রা মার্চ ১৯৭১ হওয়ার কথা ছিল। তিনি পাকিস্তানের প্রেসিডেন্ট কি না সেটা সংবিধানিক আইনে যদিও বিতর্কাত্মক—আমরা না হয় তাঁকে আবু হোসেনের মত একদিনের তরে খলিফে বানিয়ে দিলুম। ভয় নেই পাঠক, পশ্চিম পাকিস্তানের বিস্তার মেম্বরও গুড়ি গুড়ি হামাগুড়ি দিয়ে আসবেন—সে-ব্যবস্থা সেই হারাধনের একুশটি পরিবার পরমানন্দে করে দেবেন। পাঠকের স্মরণ থাকতে পারে, ৩রা মার্চের অধিবেশনে পশ্চিম পাক থেকে কোনো সদস্য যদি ঢাকা আসার চেষ্টা করেন, তবে ভুট্টো তাদের “ঠ্যাং ভেঙে দেবার” হুমকি দেন। তৎসত্ত্বেও বেশ কয়েকজনা অক্ষত ঠ্যাং নিয়েই এসেছিলেন। বাকিরা আসতে পারেন নি—প্লেনে সীট পান নি বলে। বস্তুত বঙ্গবন্ধু ওই সময়ে, ৩রা মার্চ ১৯৭১-এ বলেন, “এটাকে ট্র্যাজিক বলতে হয় যখন প্লেনগুলো (মিলিটারি প্লেন নয়—লেখক) পশ্চিম পাকের সদস্যদের নিয়ে আসার কথা তখন সেগুলো ব্যবহার করা হচ্ছে মিলিটারি আর অন্তঃস্থ নিয়ে আসাতে।” আসবেন আসবেন, মেলা সদস্য আসবেন। ওখানে তো প্রাণের ভয়ে কাঁপছেন। এখানে সদস্য হিসেবে অন্তত জ্ঞান-মাল সেফ্। চাকরির তরে তদ্বিরও করা যাবে। সত্য বটে বঙ্গবন্ধু বলেছেন, “এখন আর তদ্বির চলবে না। অধম সঙ্কলের কাছে মাপ চেয়ে ক্ষীণ কণ্ঠে একটি সমসাময়িক নীতিবাক্য স্মরণ করে : একদা বসুন্ধরা ছিলেন বীরভোগ্যা—এখন তিনি তদ্বির-ভোগ্যা।”

এবং বিশেষ করে দর্শক হিসেবে নিমন্ত্রণ জানাতে হবে “বমার অব বেলুচিস্তান” “বুচার অব বেঙ্গলকে”। তার যথেষ্ট কারণ আছে। মুক্তিযুদ্ধ যখন চরমে, তখন টিক্কা খান ফরমান জারী করে স্বাধীন বাংলাদেশের কমান্ডার-ইন-চীফ জেনরেল আতা-উল গনী মুহম্মদ ওসমানীকে তাঁর সম্মুখে ঢাকাতে উপস্থিত হবার হুকুম ঝাড়েন। ওসমানী সাহেব ভদ্রসন্তান। অতিশয় ভদ্র ভাষায় উত্তর দেন—যুদ্ধের মনে পড়ে—“কে কাকে ডেকে পাঠাবে সেটা না হয়...(অর্থাৎ বিতর্কাত্মক, কিংবা ওসমানীরই বেশী, কিংবা উপস্থিত সেটা মূলত্ববী থাক; আমার সঠিক মনে নেই বলে দুঃখিত—লেখক)। তবে আমি ঢাকা আসছি, কিন্তু প্রশ্ন, মহাশয় কি সে সময় ঢাকায় থাকবেন?”

এই উত্তরটি গেরিলারা ঢাকার দেয়ালে দেয়ালে সঁটে দেয়।

বলা বাহুল্য জেনরেল ওসমানী এক কথার সেপাই। তিনি ঢাকা এসেছিলেন, কিন্তু টিক্কা তখন সেখানে নেই।

বেধড়ক মার খেয়ে ইংরেজ সৈন্য যখন ডানকার্ক থেকে নিম্নপুচ্ছ হয়ে সবেগে পলায়ন করে তখন বি বি সি-র পাঠান সংবাদদাতা বুখারী বলেন, “হমারে সিপাহী বাহাদুরীকে সাথ হট গয়ে।” “বাহাদুরীর সঙ্গে হটনা”—সোনার পাথর বাটি।

টিক্কা খান বাহাদুরীকে সাথ হটতে হটতে পৌছে গেলেন রাওলপিন্ডি।

রাঁদেভুটা মিস্ করার জন্য টিক্কার স্ফোড থাকতে পারে। যাঁদের নিমন্ত্রণ করা হবে তার মধ্যে টিক্কা একজন মাস্ট বই কি।

অধিবেশনের কর্মসূচী (আজেন্ডা) এবং সেটা কিভাবে রূপায়িত হবে তার ভার, কল্পনাবিলাসী পাঠক, তোমার হাতে ছেড়ে দিলুম। কিন্তু এটা শুধু কল্পনা-বিলাসই হবে না। পাঠক পরের সংখ্যায় দেখতে পাবেন, ভুট্টো সাহেব এই যে মুসলিম জগতে সফর করে এলেন সেখানে কোন পুরোনো কাসুন্দী ঘেঁটে শেখ সাহেবের ঘাড়ে সব দোষ চাপিয়ে এলেন। এক দিকে নিদারুণ হাহাকার, আওয়ামি লীগ একটি বৃহৎ মুসলিম রাষ্ট্র

নষ্ট করেছে; অন্যদিকে নিদারুণতর হাহাকার, যে বাইশটি ধনপতির অর্থানুকূল্যে তিনি ছোট্টা হিটলার দি থার্ড হলেন তাদের দোকানপাট বন্ধ। তারা যে রদ্রিমাল পূর্ব বাঙলায় চড়া দরে ডাম্প করতো সেগুলো এখন করাচীর পেডমেন্টে নেমেছে; আরবরা যদি দয়া করে কেনে।

যে অধিবেশনে ভুট্টো শেষের আইটেম না বললেও প্রথমটা বলবেনই বলবেন। তা তিনি যা-বলুন যা-করুন কোনো আপত্তি নেই। শুধু একটা শর্ত যেন থাকে। তিনি গত বছর ইউনাইটেড নেশনে যেরকম গোসসাঁভরে কাগজপত্র ছিড়ে দুমদুম করে সভাগুলি ভাঙ করেছিলেন, এখানে যেন সেরকমটা না করেন।

ইয়েহিয়া-ভুট্টো

আজ জ্যৈষ্ঠ মাসের ৩১শে। কাজেই আষাঢ়স্য প্রথম দিবস বলতেও বাধ্য নেই। অন্তত আষাঢ়ের প্রথম দিবসে বর্ষা আগমনের যে সব লক্ষণ নিয়ে আবির্ভূত হয় আজ ঢাকাতে সেই বর্ষা এসেছেন প্রাবৃত্ত্য সর্বলক্ষণসম্পন্ন শ্যামা সুন্দরীর ন্যায়। তাহাজ্জুদ নমাজের ওয়াকৎ থেকেই গুনতে পাচ্ছি বাড়ির পাশের নিম্ন গাছ, বাংলাদেশ রাইফেলসের চাঁদমারি ঘিরে যে ঘন বাঁশবন, গ্রীষ্মের অত্যাচারে ফিকে বেগুনী রঙের পুষ্পরিস্ত জারুল এবং কৃষ্ণের চূড়ার পর অবিরল রিমঝিম রিমঝিম বারিষতনের মৃদু মর্মরধ্বনি। আর

“মেঘের ছায়া অঙ্ককারে
রেখেছে ঢেকে ঢাকা-রে—”

এতদিনে ঢাকা ছিল খোলা—রৌদ্রতপ্ত বিবর্ণ আকাশের নিচে। আজ ক্ষীণ বরিষণে জলকলকলে নাম তার সার্থক হল।

এমন দিনে নমো ইলিশায়
খিচুড়ি তার সাথে এ-ঢাকায়॥

গত বৎসর এইদিনে কার সাধ্য ছিল এ-বাড়িতে বসে জানালা দিয়ে তাকিয়ে “কবিত্ব” করে? বাড়ির বাগানের শেষ প্রান্তে ছোট্ট একটি নালা বয়ে গিয়ে একটু দূরে একটা ঝিল-এর রূপ নিয়েছে। গজ তিনেক চওড়া নালার পরেই খাড়া উঁচু টিলার উপর বাঁশবন ঘেরা চাঁদমারির পাঁচিল। এ-বাড়ি থেকে ধানমণ্ডী নিবাসিক অঞ্চলের আরম্ভ। ধানমণ্ডীর ঘন বসতিতে “মুক্তির” দু-পাঁচজন হেথা হোথা সর্বত্রই আত্মগোপন করে থাকতো। চাঁদমারি ঘিরে টিকার না-পাঁকদের অহরহ ছিল ভয়, রাতের অঙ্ককারে মুক্তি-রা হঠাৎ কখন না পাকিস্তানের রাইফেলসের হেড-কোয়ার্টারের উপর হামলা চালায়। নালার পাশেই তাই ঝুঁড়েছিল বিরাট এক বান্ধার। তার ভিতরে বিজলী বাতি ফ্যান রেডিয়ো, রমণী, উত্তম উত্তম শয্যা সবকিছুই ছিল। আর টিলাটার সানুদেশে বাঁশবনের ভিতরে আড়ালে সুবো-শাম রাইফেল হাতে পাহারা দিত না-পাকরা। সামান্যতম প্রদীপ-রশ্মি দেখতে পেলেই সঙ্গে সঙ্গেই ফায়ার! এমন কি দূরের কোনো মিলিটারি জিপের হেড-লাইট বাড়ির কোনো শার্সির উপর অতি সামান্য চিলিক মারলেই গাস্ট টু বি শ্যোর, চালাও ধনাদন গোলা—কাপুরুষের লক্ষণ-এ, বুকের ভিতর “বলা ওয়ায় না; ক্যা মালুম ক্যা হ্যায়-এর” ধূপুস-ধাপুস ছুঁচোর নৃত্য, ঘামের ফোঁটায় দেখে সোঁদরবনের কেঁদো কুমির।

এই বাড়ির ঘরের ভিতরে দুটো বুলেটের ইঞ্চি তিনেক গভীর ফুটো। জানালার শার্মি পর্দা ফুটো করে থানা গেড়েছে। আরেকটা জানালার চৌকাঠে লেগে সেটার ইঞ্চি দুয়েক উড়িয়ে টাল খেয়ে কঁহা কঁহা মুমুকে চলে গিয়েছে।

কোথায় গেল সেসব রোয়াব, বড়-ফাট্টাই!

এ-বাড়ির বাগানের কোণে কিন্তু নববরিষণের সঙ্গে সঙ্গে ফুটছে লাজুক জুঁই!

ইংরেজের অত্যাচারের সময় রবীন্দ্রনাথ ভবিষ্যদ্বাণী করেছিলেন,

‘টুটল কত বিজয় তোরণ, লুটল প্রাসাদ চূড়ো,

কত রাজার কত গারদ ধুলোয় হল গুঁড়ো।

আলিপুরের জেলখানাও মিলিয়ে যাবে যবে

তখনো এই বিশ্ব-দুলাল ফুলের সবুর সবে।

রঙিন কুর্তি, সঙিন মূর্তি রইবে না কিছুই,

তখনো এই বনের কোণে ফুটবে লাজুক জুঁই।”

মাত্র তিন গজের তফাৎ। এদিকে ফুটছে লাজুক জুঁই। ওদিকে কোথায় “রঙিন কুর্তি সঙিন মূর্তি হেইয়া খানের ভুঁই?”

অবিবড় বৃষ্টিধারা ঝরছে।

এ-বাড়ির নিচের তলাটা জোরদখল করেছিল এক পাঞ্জাবী মেজর। আমার ছোট ছেলে বললে, ‘মেজর ছজুর বাড়ি ফিরবেন কখন ঠিক নেই। তার ব্যাটমেনের মাথার টুপিতে পড়েছিল প্রথম আঘাতের আড়াই ফোঁটা জ্বল। কৌকাতে কৌকাতে চারপাইয়ে কুকুরকুণ্ডলী হয়ে শুয়ে পড়ে বলে তার বহুৎ জুকাম (সর্দি) হয়, জোরসে খাসি হই এবং জ্বরদস্ত বুখার চড়হা। কিন্তু তখনো তিনি এ-দেশের রাজা। পুনর্মুখিক হলেন কি প্রকারে সে কাহিনী অন্য অনুচ্ছেদে আসবে এ-‘ইতিহাসের’ শেষ অধ্যায়ে—ততদিন এ পরিবারের সসর্প-গৃহে বাস, সে-কাহিনী তার সঙ্গে বিজড়িত।

আমার পরিকল্পিত এসেমব্লির সেশনটা উপস্থিত মূলভূমী আছে। কারণ ভূট্টো এখন অন্তত পাকিস্তানের প্রেসিডেন্ট। শুনলুম, হিটলার ডিনেস্টার চতুর্থ ছোটো হিটলার তাঁকে যখন গদিচ্যুত করবেন তখন তাঁর কপালে অবশিষ্ট রইবে শুধু এ এসেমব্লির সদস্যপদ। তারই হক্কে তিনি দাবি জানাবেন তখন এসেমব্লির সেশন। এখনো তিনি রাজা। তবে হিটলার নাটকের সর্বশেষ অঙ্কে যেমন বলা হয়, “দি কিং উইদাউট হিজ রোবস্”। সেই যে হুলুধনি মুখরিত জনতার মাঝখান থেকে পূঁচকে একটা ছোঁড়া চোঁচিয়ে উঠেছিল, “কিন্তু রাজামশাইয়ের পরনে যে কিচ্ছুটি নেই!”

পূর্বেই বলেছি, ডিসেম্বরের গণ-নির্বাচনের ফলে ইয়েহিয়া যখন দেখতে পেলেন যে এসেমব্লিতে তিনি গোটা পাঁচ-সাত দলকে একে অন্যের বিরুদ্ধে নাচাতে পারবেন না তখন তিনি লক্ষ্য করলেন যে, আওয়ামি লীগ পশ্চিম পাকিস্তানে কোনো সীট পায়নি এবং পশ্চিম পাকিস্তানের ভূট্টো পার্টি পূর্ব পাকিস্তানে কোনো সীট পায়নি।

অতএব পাঁচ-সাতটা পার্টি না নাচিয়ে তিনি নাচাবেন—দুই পার্টিকে নয়—দুই উইংকে। দুই পাকিস্তানে লাগিয়ে দেবেন মোষের লড়াই। অতএব তাঁর হাতের কাছে আছে যে পশ্চিম পাকিস্তান সেটাকে তৎপূর্বে বেশ ভালো করে তাতাতে হবে।

দুই পাক-এর সাধারণজন ইয়েহিয়ার কূটবুদ্ধির খবর রাখতো না। তাই তারা অবাক হল যখন গণনির্বাচনের পরই ইসলামাবাদ ছেড়ে তিনি বেরিয়ে পড়লেন শীতের মরসুমী

ইসলাম সাইবেরিয়াগত হংসবলাকা নিধনে। বলা বাহুল্য, এ ধরনের রাজসিক শিকারে তাঁর জনসাধারণের সংস্রবে আসবেন না—তা তিনি চানও না। তাঁকে আপ্যায়িত করবেন বড় বড় জমিদার যেন জ্যাক অব কেষ্ট বা নবাব খজা খা এবং কেঁদো কেঁদো ঢাকার কুমির আদমজী ইসপাহানীদের পাল—এঁদের একজনের নাম আবার ফাঁসী। ইয়েহিয়া বাগাবেন এঁদের।

পালা প্রেমের শিকার ছোঁড়াটা যেরকম নাক-বরাবর প্রিয়া-রীদেভু পানে সবেগে গাওয়া করে না, এদিকে টু ওদিকে টক্কর খাওয়ার কামুফ্লাজ করে মোকামে পৌছয়, ইয়েহিয়া শিকারী সেই রীতিতে হেথা হোথা শিকার করতে করতে পৌছলেন তাঁর বন্ড ডট্টোবনে। সেখানে তিনি যা খাতির-যত্ন পেলেন সে শুধু হলিউডেই হয়ে থাকে। কিংবা আইয়ুব যে-রকম প্রফুমো সকাশে মিস “কীলার” সান্ধ্যি পেয়েছিলেন। আইয়ুব তখন গদিতে; তাই সে-সময়ে সদাশয় ব্রিটিশ সরকার আইয়ুবের সেই নিশাভিসারও বার্থডে-সুট পরে মধ্যামিনীতে ছরি-পরিদের সঙ্গে সন্তরণকেলি তার পরিপূর্ণ বাহার অসদ-ব্যবহারসহ প্রকাশ করেন নি।

ইয়েহিয়া ভুট্টোতে নিঃসন্দেহে দীর্ঘ আলাপ-আলোচনা হয়েছিল, কিন্তু খবরের কাগজে সেটা কামুফ্লাজ করে প্রকাশিত হল, “নিতান্ত যোগাযোগবশত উভয়ের মধ্যে কিঞ্চিৎ ভাবের আদান-প্রদান হয়।” তা সে যে ভাষাতেই প্রকাশ করা হক, গণনির্বাচনের পরই রাষ্ট্রপ্রধান সংখ্যাগুরু আওয়ামি নেতার সঙ্গে সর্বপ্রথম আলাপ-আলোচনা না করে নিজের থেকে প্রথম গেলেন সংখ্যালঘুর বাড়িতে। এটা কূটনৈতিক জগতে সর্ব প্রটোকল-বিরোধী, সখৎ বেআদবী। এতে করে আওয়ামি লীগের কোনো ক্ষতিবৃদ্ধি হল না, তিনি হলেন হাস্যাস্পদ এবং বিড়ম্বিত। বলা বাহুল্য, এ মঙ্করাটা আওয়ামি লীগের দৃষ্টি এড়ায়নি, কিন্তু লীগজন যে বিচলিত হয়েছেন সে-রকম কোনো লক্ষণই দেখা গেল না।

একটা বিষয়ের প্রতি আমি কিন্তু পাঠকের বিশেষ দৃষ্টি আকর্ষণ করি।

পূর্ববঙ্গের সুদীর্ঘ ইতিহাসের এই অধ্যায়ের প্রধান নায়ক তিনি সম্পূর্ণ ভিন্ন ভিন্ন চরিত্রের তিনজন লোক। বঙ্গবন্ধু শেখ মুজিবুর রহমান, (বর্তমান) পাকিস্তানের প্রেসিডেন্ট জুলফিকার আলী ভুট্টো এবং প্রেসিডেন্ট পদচ্যুত, লাঞ্চিত আগা মুহম্মদ ইয়েহিয়া খান।

১৯৭১ অগস্ট/সেপ্টেম্বরে জনাব ভুট্টোর আপন জবানেই পূর্ববঙ্গের অবস্থা যখন অত্যন্ত সঙ্কটজনক, অখণ্ড পাকিস্তান দ্বিখণ্ডিত হয় তখন তিনি একখানি চিঠি বই লেখেন।[১]

এই বইখানি কত শত বৎসর ধরে ঐতিহাসিক মাত্রেরই গবেষণার প্রামাণিক কাঁচামালরূপে গণ্য হবে, আজ সে কথা বলা কঠিন।

আগস্ট মাসেই ভুট্টো বুঝে গিয়েছিলেন, পাকিস্তানকে দ্বিখণ্ডিত হওয়া থেকে আর বাঁচানো প্রায় অসম্ভব। ওদিকে পশ্চিম পাকে আরও বহু লোক বিশেষ করে ধনপতিরাও সে তত্ত্ব হৃদয়ঙ্গম করে ফেলেছিলেন এবং এই সঙ্কটের জন্য ইয়েহিয়া এবং তাঁর দুঃখবুদ্ধিদাতা ভুট্টো যে তাঁর চেয়েও বেশী দায়ী সে অভিমত প্রকাশ্যে ব্যক্ত করতে আরম্ভ করলেন।

(১) ZULFIKAR ALI BHUTTO, The Great Tragedy, Sept, 71, pp. 107, Karachi.

তখন আপন সাফাই গাইবার জন্য ভুট্টো এ-বই লেখেন।

আজ পর্যন্ত এমন কোনো সাংবাদিক, রাজনৈতিক, কূটনৈতিক বলতে কসুর করেননি যে, ভুট্টোর প্রতিটি রক্তবিন্দুতে, তাঁর ধ্যানে স্বপ্নে সুষুপ্তিতে সদাজাগ্রত থাকে মাত্র একটি রিগু—উন্মত্ত উচ্চাকাঙ্ক্ষা যেটাকে প্রায় নীতিবিগর্হিত জনসমাজ বিনাশী পাপাভিলাষ আখ্যা দেওয়া যেতে পারে।

তাই সাফাই গাইতে গিয়েও আগা-পাশ-তলা জুড়ে বার বার তাঁর একই আবদারের ধূয়ো, একই সদন্ত জিগির :

“এখনো সময় আছে। এখনো ত্রাণ আছে। আমাকে রাজ্যচালনা করতে দাও। মন্ত্র উচ্চারণ করো হে প্রতি পাপী তাপী পাকী :

“ভুট্টোং শরণং গচ্ছামি॥”

ভুট্টোজ পুরাণ

রবীন্দ্রনাথ মূলটা বাংলায় না ইংরিজিতে লিখেছিলেন, সেটা এ-স্থলে না জানলেও চলবে, কারণ ইংরিজিটাও অটোগ্রাফের খাতাতে লেখা, “স্মুলিস্টি” উতরেছে অত্যাৎকষ্ট রূপ নিয়ে।

“হোয়াইল দি রোজ সেড টু দি সান ‘আই শ্যাল রিমেন ইটানেলি ফেংফুল টু দী’, ইটস পেটালস ড্রপটু!”

ইতিমধ্যে আপনাদের আশীর্বাদে বাংলাটাও মনে পড়ে গেল—

“চাহিয়া প্রভাত রবির নয়নে

গোলাপ উঠিল ফুটে।

‘রাখিব তোমারে চিরকাল মনে’

বলিয়া পড়িল টুটে।”

সমসাময়িক প্রায়-ইতিহাস লিপিবদ্ধ করার বেলা ওই একই বিপদ! কালি গুকোতে না গুকোতেই অন্য আরেকটা ঘটনা এসে সেটাকে বাতিল করে দেয়—গোলাপবালার অনন্তকালীন প্রেমাসীকার বলা শেষ হওয়ার পূর্বেই খুবখুব করে পাপাড়িগুলো ঝরে পড়ে গেল।

“ভুট্টোং শরণং গচ্ছামি”

বলা শেষ করতে না করতেই তাঁরই কণ্ঠে গুনি, “উই! হল না। তার চেয়ে বরঞ্চ বলা,”

“সঙ্ঘং শরণং গচ্ছামি।”

অর্থাৎ তিনি ইন্দিরাজীর সঙ্গে যদি কোনো ফৈসালা করে ফেলেন (আমার ব্যক্তিগত বিশ্বাস তিনি কোনো ফৈসালাই চান না, কারণ ‘অবগাহি কল্পনার সীমান্ত অবধি’ আমি এমন কোনো সামান্যতম ফৈসালার স্বাক্ষান পাচ্ছিনে যেটা যুগপৎ পাকিস্তানের জনগণমন প্রসন্ন করবে এবং তিনিও গদি-নশীন থাকবেন) তবে তিনি সেটি “এসেমব্লির” সম্মুখে পেশ করবেন। ওদিকে আসন্ন মুলাক্কতের পূর্বাঙ্ক পর্যন্ত তিনি অখণ্ড পাকিস্তানের জিগির লাগাতার গেয়ে যাচ্ছেন।

এসেমব্লি শব্দের সংস্কৃত বলুন, পালি বলুন, প্রতিশব্দ সঙ্ঘ।

ওদিকে তিনি গত এপ্রিলে যে একটা টেম্পারারি জো-শো সংবিধান নির্মাণ করেছেন সেটাতে “পূর্ব পাকিস্তান” নামক একটি রাষ্ট্রাংশের হাওয়ায় কোমরে রশি বেঁধে সেটাকে আটকে রেখেছেন। আমি সে ‘একটিনি’ সংবিধান পড়িনি; তাই আদেশা করে ঠাওরাতে পারছি নে সে-এসেমন্ত্রিতে আওয়ামি লীগের সাবেক ১৬৭ জন সদস্যকে আমন্ত্রণ জানানো হবে কি না, এবং রাঁদেভু হবে কোথায়? ঢাকার কুকোয়া হল হস্টেলে, যেখানে ইয়েহিয়ার পিশাচরা মিলিটারি অ্যাকশন নিয়ে, যে অ্যাকশনে ভুট্টোর সম্মতি ছিল, অসহায় ছাত্রীদের নির্ধাতিত ও পরে নিহত করে? না ইসলামাবাদের সেই ‘আইয়ুব-হল’-এর বারান্দায় যেখানে গণতান্ত্রিক জুলফিকার আলী সুবো-শাম ডিকটেক্টর প্রভু আইয়ুবের কলিংবেলের সুমধুর টিং টিংয়ের জন্য টুলে বসে ঢুলতেন?

গত সপ্তাহে আমি এসেমন্ট্রি নাকচ করতে না করতেই আমার পাপড়ি খসে গেল! আবার সেই এসেমন্ট্রি! সমস্ত রাত এস্থলে পুরো পাক্কা একটি হপ্পা—নৌকা বেয়ে ভোরে দেখি সেই বাড়ির ঘাটে! খুঁটি থেকে বাঁধা নৌকোর দড়ি খুলতে ভুলে গিয়েছিলুম।

আবার ভুট্টো সায়েবের কেতাঝানার কথা পাঠককে স্মরণ করিয়ে দিই। সে পুস্তিকা এমনই তুলনাইীন যে খুদ বইয়ের তো কথাই নেই, আমার অক্ষম লেখনী মারফত তার সামান্য যেটুকু আমি প্রকাশ করতে পারবো সেটা পড়ে পাঠক রোমাঞ্চিত হবেন, তাঁর দেহ মুগ্ধমুগ্ধঃ শিহরিত হবে, তিনি ক্ষণে ক্ষণে দিশেহারা হবেন এবং সর্বশেষে কোনটা সত্য, কোনটা মিথ্যা, কোনটা গণ্ডমুখের জড়ত্ব, কোনটা অতি ধূর্তের কপটতম ধান্না সেগুলো বুঝতে গিয়ে কঠিন শিরঃপীড়ায় আক্রান্ত হবেন—হয়তো বা অর্ধোন্মাদ হয়ে যাবেন। ঈশ্বর রক্ষতু!

আমি কসম খেয়ে বলতে পারি, এ-পুস্তক একাধিকবার অধ্যয়ন না করে স্বয়ং চিত্রগুপ্তও “ছাব্বিশ (মার্চ) থেকে ষোল (ডিসেম্বর)” খতিয়ান লিখতে পারবেন না। দুই শরীক ইয়েহিয়া এবং ভুট্টো। কার পাপ কোন খাতে লিখবেন সঠিক ঠাউরে উঠতে পারবেন না। সাস্তানা এইটুকু : পুণ্যের মূল তহবিলে স্বেফ ব্র্যাক্কো! সেখানে তিনি নিশ্চিন্দি!

পূর্বেই নিবেদন করেছি, কেতাবের ধূয়া “ভুট্টোঃ শরণং গচ্ছামি”। (এদানির : “সংঘং শরণং গচ্ছামি”) তাই একেতাবের বৃহদংশ নিয়েছে ভুট্টোদেবের গুণ-কীর্তনে বা সাফাই গাওয়াতে। বস্তুত এটা পড়ে সরল বিদম্ব তাবজ্জন তাজ্জব মেনে মাথা ঢুলকোবেন : “তাই তো! এমন সত্যবাদী, নিরহঙ্কার, আত্মত্যাগী, পরদুঃখকাতর দয়ার সাগর, যিনি ভাজা মাছটি উল্টে খেতে পারেন না তাঁকে নিয়তি রাজনীতিতে নামালেন কেন? কূটনীতির দাবা খেলা তো তাঁর জন্য নয়—তাঁর কথা বিশ্বাস করলে তো নিঃসন্দেহে বলা যায় এই প্রাপ্ত বয়সেও তিনি যদি লারখানার রাস্তার ছোঁড়াদের সঙ্গে মার্বেল খেলতে গাবেন তবে তারা তাঁকে বেমালুম বোকা বানিয়ে পকেটের সব কটা মার্বেল গ্যাঁড়া মেরে দেবে।”

তবে কি না, নিতান্ত আপন-ভোলা সজ্জন এই লোকটি। মাঝে মিশেলে অত্যন্ত প্রয়োজনীয় গুরুত্বপূর্ণ সত্য কথা বলতে তিনি ভুলে যান—ইস্তক ইতি গজঃটুকু। পূর্ববর্তী সংখ্যায় বলেছিলুম কি কৌশলে এদিক ওদিক বুনো হাঁস শিকার করতে করতে ইয়েহিয়া

তার রাঁদেভু ভুট্টার মোকামে পৌঁছে সেখানে তাঁর সঙ্গে ভবিষ্যতের গ্ল্যান কবলেন। এই “পিয়া মিলনকো” অবশ্যই হানিমুন অব দি টু—“দুজনার মধুচন্দ্রমা” বলা যেতে পারে। ‘হানিমুন অব দি টু’ বাক্যটি আমি শ্রীভুট্টোর গ্রন্থ থেকে নিয়েছি। তিনি লিখেছেন “আমাতে মুজীবোতে (ঢাকাতে, পরবর্তীকালে—লেখক) বারান্দায় কথাবার্তা বলার পর আমি যখন ইয়েহিয়াকে সেটার রিপোর্ট দিতে গেলুম তখন তিনি সবিস্ময়ে আমাদের ভেটকে হানিমুন বিটউইন দি টু অব ইউ, বলে উল্লেখ করলেন।” কিন্তু এহ বাহ্য।

আসল কথা এই : ভুট্টো তাঁর কেতাব আরম্ভ করেছেন লেট জিম্মার পাকিস্তান স্থাপনা করা থেকে! তারপর অনেকানেক ঘটনার কালানুক্রমিক নির্যন্ত তথা বিবৃতি দেওয়ার পর তিনি বলছেন “তেসরা জানুয়ারি ১৯৭১-এ শেখ মুজীবুর রহমান তাঁর বিখ্যাত ভাষণ দেওয়ার অল্প কিছুদিন পর প্রেসিডেন্ট ইয়েহিয়া তাঁর উপদেষ্টামণ্ডলী সহ ঢাকা গেলেন। ঢাকা থেকে ফেরার পর প্রেসিডেন্ট ইয়েহিয়া ও তাঁর কিছু উপদেষ্টা ১৭ই জানুয়ারি তারিখে আমার হোম টাউন লারখানাতে এলেন। প্রেসিডেন্ট আমাকে মুজীবের সঙ্গে ঢাকাতে তাঁর আলোচনার বিষয় জানালেন...ইত্যাদি।”

আশ্চর্য এই সত্য গোপন! ইয়েহিয়ার সঙ্গে প্রায় মাসখানেক পূর্বে, অর্থাৎ ইয়েহিয়ার সঙ্গে ঢাকাতে মুজীবের মোলাকাৎ হওয়ার পূর্বেই যে তিনি (ভুট্টো) ইয়েহিয়ার সঙ্গে ওই লারখানাতেই দুই দুই করুঁ করুঁ করেছেন সেটা একদম চেপে গেলেন।

কেন চেপে গেলেন?

কারণ ওই সময়েই সেই শয়তানী গ্ল্যান আঁটা হয়, কি পদ্ধতিতে বাংলাদেশের স্বায়ত্তশাসন প্রচেষ্টা (অটোনমি—স্বাধীনতা নয়) নস্যাৎ করা যায়। (কে কাকে কতখানি দুষ্টবুদ্ধি যুগিয়েছিলেন সেটা আজো আমরা জানিনি—একদিন হয়তো প্রকাশ পাবে) এই প্রাথমিক গ্ল্যান নির্মাণ কাহিনী যাতে করে ধামাচাপা পড়ে যায় তার জন্যই এই সত্য গোপনের প্রয়োজন।

ওদিকে ইয়েহিয়াই তার তিনদিন পূর্বে, ১৪ জানুয়ারিতে ঢাকা শহরে ফাঁস করে বসে আছেন যে মুজীবের সঙ্গে তাঁর প্রথম মোলাকাতের পূর্বেই ভুট্টোর সঙ্গে তাঁর আলাপচারি হয়ে গিয়েছে!

ঘটনাটি এইরূপ : পূর্বেই বর্ণিত হয়েছে, নানাবিধ হাঁস, তন্মধ্যে ভুট্টো চিড়িয়া শিকার করার পর তিনি রওয়ানা হলেন ঢাকা। এ সম্বন্ধে ভুট্টো মন্তব্য করেছেন, গণ-নির্বাচনের পর মুজীবকে বার বার আমন্ত্রণ জানানো সত্ত্বেও তিনি পশ্চিম পাকিস্তানের কোথাও যেতে রাজী হননি। জনৈক বিশেষজ্ঞ বলেছেন, “গেলে ভালো হত। তিনি অতি অবশ্য সেখানে বিস্তর লোকের চিন্তাজয় করতে সমর্থ হতেন ও ফলে ডবল জোরে ভুট্টো-ইয়েহিয়া-আঁতাৎ-এর মোকাবেলা করতে পারতেন।” আমি নগণ্য প্রাণী, আমার মতের কিবা মূল্য! তবু বলি (আহা, বেড়ালটাও কাইজারের দিকে তাকাবার হক ধরে) না গিয়ে ভালোই করেছেন। শেখ সাহেবেরও জ্ঞান মাত্র একটি।

তা সে যাই হোক—শেখ-ইয়েহিয়া ভেটের পর পিণ্ডি প্রত্যাবর্তনের প্রাক্কালে ১৪ই জানুয়ারী তারিখে, ঢাকা এয়ারপোর্টে সাতিশয় সদাশয় চিন্তে ইয়েহিয়া সাংবাদিকদের নানাবিধ প্রশ্নের দিল-দরিয়া উত্তর দিলেন।

তন্মধ্যে সেই ঐতিহাসিক গুরুত্বপূর্ণ উত্তর আছে : “শেখ মুজিবুর রহমান দেশের প্রধানমন্ত্রী হবেন।”

এ-উত্তরে কতখানি আন্তরিকতা ছিল বিচার করবে ইতিহাস। কিন্তু এহ বাহ্য।

এক সাংবাদিক শুধালেন, “আপনি কি এবারে (দিস টাইম) মি. ভুট্টোর সঙ্গে দেখা করবেন?” এই “দিস টাইম”টি পাঠক লক্ষ্য করবেন। যেন ইঙ্গিত রয়েছে, “আমরা তো ভালো করেই জানি, একবার তার সঙ্গে আপনার কথাবার্তা হয়ে গিয়েছে। এখন যখন শেষ সায়েবকে প্রধানমন্ত্রী করবেন বলে মনস্থির করে ফেলেছেন, এ-বা—রেওকি তার সঙ্গে দেখা করবেন?”

উদার-হৃদয় ইয়েহিয়া বললেন,—“আমি প্রত্যেক জনের সঙ্গে দেখা করি। তার (ভুট্টোর) সঙ্গে আমার অলরেডি একবার দেখা হয়ে গিয়েছে। আমি অত্যন্ত ক্লান্ত। আমি পাখি শিকার করতে যাচ্ছি সিঙ্কু দেশে—ওটা ভুট্টোর এলাকা। তিনি সেখানে থাকলে তাঁর সঙ্গে দেখা হবে।”

ন্যাকরা! “তিনি সেখানে থাকলে—”। ইয়েহিয়া তো ওয়াইলড ডাক খ্যাদাতে বেরুবেন না। এবং ভুট্টোও একদম সিটিং ডাক।

অগস্ট মাসে বই লেখার সময় ভুট্টো আশা করছেন, ডিসেম্বরের ভেট লোকে স্বরণে নাও আনতে পারে। এ বাবদে সর্বশেষ মন্তব্য এই করা যেতে পারে যে ভুট্টো উকিল। তিনি জানেন, আসামী তার সাফাই গাইবার সময় এমন কিছু বলতে বাধ্য নয় যা তার বিরুদ্ধে যেতে পারে!

এ ধরনের বিস্তরে বিস্তরে সত্যগোপন, মিথ্যাভাষণ, গুজোবের আড়াল থেকে কুৎসা রটনা অনেক-কিছু আছে এই মহামূল্যবান ভুট্টাঙ্গ-পুরাণে। এবারের মত শেষ একটি পেশ করি :

“(শেখ মুজিবের) ছয় দফার নির্মাতা কে, সে নিয়ে প্রচুর কৌতূহল দেখা দিয়েছে। কেউ কেউ মনে করেন, আইয়ুব খানের ঘনিষ্ঠ কোনো বুরোক্রোট এই ফরমূলাটি বানিয়ে দেন (ফ্রেমড দ্য ফরমূলা)। উদ্দেশ্য ছিল, পূর্ব ও পশ্চিম পাকিস্তানের জনগণকে দুইভাগে বিভক্ত করে আইয়ুবকে বাঁচানো তথা জনগণের দৃষ্টি তাশকন্দ প্রহসন থেকে অন্যদিকে সরানো।”

দুই পাকিস্তানকে লড়িয়ে দিয়ে ইয়েহিয়া গদিচ্যুত হলেন, আর আইয়ুব বাঁচতেন এই পছায়? এ যুক্তি শুধু উকিলের “উর্বর” মস্তিষ্কেই স্থান পেতে পারে!

এবং তারপর ভুট্টো বলছেন, “একটা জনরব এখনো প্রচলিত আছে যে ঐ ছয় দফা মুশাবিদা করাতে একটা বিদেশী হাতও ছিল।”

দুষ্ট বুদ্ধি প্ররোচিত পাঁচালো দলিলের মুশাবিদা করার জন্য ঘড়েল নায়েব বানু উকিলের শরণাপন্ন হয়। আওয়ামি লীগের ছয় দফাতে আছে স্বাধীনতাকামী জনসাধারণের মৌলিক সরল দাবি। এর মুশাবিদা করতে পারলেন না জনাব তাজউদ্দীন বা রহমান সুব্বান? এই সাদামাটা দাবির কর্মসূচী তৈরী করার জন্য দরকার হল ‘ফরেন হ্যান্ড’! “পেটের ভাত আর গায়ের কাপড় চাই” এ কথা কটি তো গাঁয়ের চাষাও জমিদারের সামনে আকছারই বলে—আপন সরল গাঁইয়া ভাষায়। তবে কি মি. ভুট্টো বলতে চান, এ দুটো যে তার চাই-ই চাই সে কথাটা পূর্ব বাঙলার লোকের মাথায় খেলেনি? সেটা টুইয়ে দেবার জন্য কুটিলস্য কুটিল ‘ফরেন হ্যান্ডের’ প্রয়োজন হয়েছিল? আশ্রায় মালুম, মি. ভুট্টোর মাথায় কি খেলে?

হিটলার ডিকটের হওয়ার পর একাধিকবার আপসোস করেছেন, তাঁর ‘মাইন

কাম্পফ্' প্রকাশ না করলেই সুবিবেচনার কাজ হত। মি. ভুট্টো ছোট্টা হিটলার দি থার্ড হওয়ার পর সে-আপসোস করেছেন কি না, বলা যায় না। তবে ভবিষ্য যুগের কাষ্ঠরসিক পাঠক হয়তো বইখানার নাম 'দি গ্রেট ট্রাজেডি' পাশ্বে 'দি স্মল কমেডিয়ান' নয়। নামকরণ করতে পারে॥

“বিচিত্র ছলনাজাল”

মৃগয়া সমাপনান্তে প্রেসিডেন্ট ইয়েহিয়া রাজধানীতে প্রত্যাবর্তন করলেন। সেই সুবাদে একটি প্রাচীন চুটকিলা পুনর্জীবন পেল।

জুনৈক পেশাদার শিকারী হজুরকে শিকারের ফন্দি-ফিকির বাংলাবার জন্য সঙ্গে গিয়েছিল। তাকে তার এক চেলা শুধালো, শিকারী হিসেবে হজুর কি রকম? ওস্তাদ আসমানের দিকে তাকিয়ে বললেন, “মাশাল্লা! একদম উম্দাসে উম্দা, বেনজীর। কিন্তু হজুরের ব্যাগ খালি রইল, আল্লা পাখিদের প্রতি মেহেরবান ছিলেন।”

প্রচুরতম মদ্যপান করার পর উষস্বেবীর প্রথম আলোয় চরণধ্বনির শুভলগ্নে হস্তযুগল নিষ্কম্প প্রদীপ শিখাবৎ ধীর স্থির অচঞ্চল থাকে না।

প্রেসিডেন্ট ঢাকা যাত্রা করলেন।

এদিকে পূর্ব বাঙলা অত্যন্ত বিক্ষুব্ধ চঞ্চলিত হয়ে উঠেছে। দেশের লোক দলে দলে শেখ সায়েবের পতাকার তলে জমায়েত হচ্ছে কিন্তু ওদিকে পশ্চিম পাকিস্তানের ব্যুরোক্রেসি ধনপতির গোষ্ঠী এবং সর্বোপরি মিলিটারি জুন্টা উঠেপড়ে লেগেছে, কি করে আওয়ামি লীগের সর্বনাশ করা যায়, গণতন্ত্র পুনরায় প্রতিষ্ঠিত না হয়। কাঁড়া কাঁড়া টাকা আসতে লাগল সোনার বাংলায় স্পাই, গুণ্ডা এবং দ্রষ্ট রাজনৈতিক কেনার জন্য। অবাঙালিরা তাদের সাহায্য করেছে প্রকাশ্যে। গায়ের জোরে বাহানা তৈরী করে পেটাচ্ছে আওয়ামি লীগের কর্মীদের। আওয়ামি লীগের পাবনার এম এল এ এবং খুলনার একজন লীগ কর্মীকে গুমখুন করা হল। স্বয়ং শেখকে গুপ্তহত্যা করার চেষ্টা করা হল—সে-চেষ্টা চালু রইল।

অবাঙালিদের জিঘাংসা চরমে উঠলো। গণনির্বাচনে তাদের “ইসলামী” লীডারদের শোচনীয় পরাজয় তারা ভোলবার, ঢাকবার চেষ্টা করছে তাদের দম্ভ ঔদ্ধত্য চরমে চড়িয়ে, প্রকাশ্যে নিরীহ বাঙালীমাত্রকেই মৃত্যুভয় দেখাচ্ছে। উচ্চকণ্ঠে বলে বেড়াচ্ছে, “দেখি তোমরা কি করে তোমাদের স্বায়ত্তশাসন পাও। মিলিটারি আমাদের পিছনে। তোমাদের ঠেঙিয়ে লম্বা করে ছাড়বে পয়লা, তারপর অন্য কথা।” ওদেরই প্ররোচনায়—ওনারাও তৈরী ছিলেন—পশ্চিম পাকের একাধিক কাগজে শেখ সায়েবের প্রচুর কুৎসাসহ “খবর” বেরুতে লাগলো—শেখ এমনই দস্তী, ছলেবলে নির্বাচনে জয়লাভ করে এমনই উদ্ধত হয়েছে যে, সে বলে বেড়াচ্ছে যে সে পশ্চিম পাকে তো আসবেই না, এমন কি আমাদের সদর-উস-সদর জিল্লুলা (এ দুনিয়ার আল্লার ছায়া) সুলতান-ই-আজম (কাইদ-ই-আজম জিন্নার পদবী মিলিয়ে তিনি “সর্বশক্তিমান সুলতান”) নিতান্ত যদি কর্তব্যের দায়ে অখণ্ড পাকিস্তানের একখানা ডানা যাতে কাটা না যায় যে, “ইসলাম ইন ডেনজার” সে-ইসলামকে ত্রাণ করতে এবং সর্বোপরি জান্-কা দুষমন ইন্ডিয়াকে প্রাণের ভয়ে

থরহরি কম্পমান করার জন্য তিনি যদি সেই রদ্বি ওচা ঢাকা শহরে যান (আত্মাতালাৰ অসীম করুণা যে সুবুদ্ধিমানের মত অধুনা প্রলয়ঙ্কর বন্যাবিধ্বস্ত পূব পাকের না-পাক অঞ্চল তিনি পরিদর্শন করতে গিয়ে তার দূষিত বায়ু এবং বিষাক্ত পানি সেবন করে অকালমৃত্যু বরণ করে শহীদ হন নি), তবে নাকি ঐ গুমরাহ শেখ তাঁর পূর্ণেন্দু-বদন দর্শন করে অক্ষয় বেহেশৎ হাসিল করার জন্য জনাব ইয়াহিয়ার বাসস্থল লাটভবনে যাবে না, সে বলেছে, প্রেসিডেন্টকে তার বাড়িতে যেতে হবে, তবে সে কথা কইবে। ওয়াস্তাগফিরুলা!

মিথ্যা নিন্দা প্রচার করার নানাবিধ পছা বিশ্বের ইতিহাসে ভূরি ভূরি মেলে। এ যুগের দুই ওস্তাদ দুটি ভিন্ন পছা অবলম্বন করে যশস্বী হয়েছেন। একজন ড. গ্যোবেলস। তিনি ধূলিপরিমাণ সত্যকথা নিয়ে তার উপর নির্মাণ করতেন অত্রংলিহ “অকাট্য” মিথ্যার এ্যাফেল-স্তম্ভ। এক্ষেত্রেও তাই : গণ-নির্বাচনের পর থেকেই পশ্চিম পাকের সর্বত্র শেখের বিরুদ্ধে যেসব চক্রান্ত করা হয়েছিল তার থেকে অনুমান করা কঠিন নয় যে সেখানে যেতে তাঁর অনিচ্ছা ছিল। ধরে নেওয়া যাক এটুকু সত্য, কিংবা তিনি সত্যই সেখানে যাবার অনিচ্ছা প্রকাশ করেছিলেন। তার উপর মিথ্যা গড়ে তোলা কঠিন নয়, ইয়েহিয়া স্বয়ং যদি ঢাকা আসেন তবে শেখ তাঁর সঙ্গে আদৌ দেখা করবেন না। সে-মিথ্যার উপর আরেকটা মিথ্যা চাপানো মোটেই কঠিন নয়। ইয়েহিয়াকে শুধু-পায়ে দাঁতে কুটা কেটে যেতে হবে শেখ-ভবনে (এ স্থলে দুই প্রকারের প্রোপাগান্ডা করা যায় (ক) জরাজীর্ণ জলঝড় দুর্গন্ধময় বস্ত্রঘরে খেতে হবে মহামহিম রাষ্ট্রপতিকে কিংবা (খ) প্রাসাদোপম রাজসিক বিরাট অট্টালিকা ভবনে—যেটা নির্মাণের অফুরন্ত ঐশ্বর্য তিনি পেয়েছেন ইন্দিরা-বিড়লার কাছ থেকে)। শেষোক্ত অংশটি পশ্চিম পাকবাসীর জন্য : সেখান থেকে কে ঢাকায় এসে যাচাই করতে যাচ্ছে, সত্য কোন হিরণ্ময় কিংবা মৃন্ময় পাত্রে লুক্কায়িত আছে?

তাই বোধ হয় কবি বায়রন গেয়েছিলেন :

“শেষ হিসেবেতে তবে

মিথ্যাই বা কি?

মুখোশ পরিয়া সত্য

যবে দেয় ফাঁকি।”

And, after all, what is a lie?

’Tis but

The truth in masquerade”

পক্ষান্তরে হিটলার “মারি তো হাতি—” পছায় বিশ্বাস করতেন। তাঁর বিশ্ববিখ্যাত গ্রন্থ মাইন কাম্পফে তিনি বলেছেন :

“ক্ষুদ্রাকার মিথ্যার চেয়ে বিরাট কলেবর মিথ্যাকে জনসাধারণ অনেক অনায়াসে মেনে নেয়।”

তার আড়াই হাজার বছর পূর্বে রাষ্ট্রের স্বরূপ সম্বন্ধে আত্মচিন্তা করতে গিয়ে প্রাতো প্রব্র শুধোচ্ছেন, “এমন একটা জাঙ্জল্যমান মহৎ মিথ্যা কি কৌশলে নির্মাণ করা যায় না যেটা এমনই স্বতঃসিদ্ধ বলে মনে হবে যে সমাজের তাবজ্জন সেটা মেনে নেবে।” ইয়েহিয়া ডিকটের। হিটলারের তুলনায় যদিও তাঁর উচ্চতা ‘ব্যাঙের হাতে সাত

হাত’। তাই তিনি হিটলারী পন্থায় গণনিধন পর্ব আরম্ভ হওয়ার পর তাঁর নীতির সাফা গাইতে গিয়ে একাধিক কারণের সঙ্গে এটাও উল্লেখ করেন যে, তিনি ঢাকাতে থাকাকালীন শেখ মুজিব তাঁকে বন্দী করার চেষ্টা করেছিলেন। সাধারণজন এ বাক্যটি লেখার পর অতি অবশ্যই বিস্ময়বোধক চিহ্ন দেবেন। আমি দিইনি কারণ বুদ্ধিমান হয়েও নিতান্ত যোগাযোগবশত আমি হিটলারী কায়দা-কৈতর সঙ্গে সুপরিচিত। এমন কি এ-রকম একটা প্রীহাচমকানিয়া বম্বশেল ফাটানোর পর আরো এক কদম এগিয়ে গিয়ে ইয়েহিয়া যে আধুলি দামের টিকটিকির উপন সকে টেকা মারার জন্য বলেন নি, “তারপর আওয়ামী লীগের কসাইরা আমাকে নিয়ে কি করতো সেটার কল্পনাতেই আমার গ শিউরে উঠে; আমি অতিশয় বিশ্বস্তসূত্রে অবগত হই, শেখ ঢাকেশ্বরী মন্দিরে হিন্দু গডেস-এর সামনে কিরে কেটেছে সে আপন আগুল দিয়ে আমার চোখ দুটি ওপড়াবে, বেঙ্গলি উয়োমেনস মাছকাটার বিগ নাইফ দিয়ে আমার কলিজা বের করে গয়রই, ইয়াম্মা আন্না বাঁচানেওলা”—এসব যে বলেন নি তাতেও আমি বিস্মিত হইনি। কারণ আমি জানি, ইয়েহিয়া নিতান্তই একটা ছ্যামড়া ডিকটেক্টর, এবং সেও নির্জলা ভেজাল ডিকটেক্টর। হত হিটলার, হত মুসোলিনী তবে জানতো কি করে মিথ্যের পুরা-পাক্কা মনোয়ারি জাহাজ বোঝাই করতে হয়, আলিফ বে থেকে ইয়া ইয়ে তক।

সন্দেহপিণাচ পাঠক এস্থলে আপত্তি জানিয়ে বলবে, “এও কখনো হয়? ঢাকাতে তাঁর লোক-লশকর গিসগিস করছে। কমপক্ষে ষাট হাজার খাস পশ্চিম পাকের সেপাই রয়েছে। সর্বোপরি টিকা খানের পাক্কা পাহারা।”

ঘড়েল সব-জাভা : “ঐনান্নেই তো সরল রহস্য। এত শতের মধ্যেখন থেকে যদি ইয়েহিয়া হওয়া হয়ে যান তবে সন্দেহটা অর্সাবে সর্বপ্রথম এবং একমাত্র মিলিটারী জুন্টার উপর। ওরা মুজিবের সঙ্গে ইয়েহিয়ার ঢলাঢলিতে তখন অতিষ্ঠ হয়ে উঠেছে। মার্চের পয়লা থেকে পঁচিশ অবধি পূর্ব পাকের রাজা ছিল কে? ইয়েহিয়া না, টিকা না—রাজা তখন কে? মুজীবি।”

কিস্ত বৃথা তর্ক। মোদ্দা কথা এই, পশ্চিম পাকের লোক ইয়েহিয়ার রহস্য-লহরী সেরীজের নবতম অবদান বিশ্বাস করেছিল।

বস্তুত ব্যাপারটা ছিল ঠিক উল্টো। প্রট করা হয়েছিল ২৫ মার্চ সন্ধ্যার পর মুজীব ভূট্রোতে মোলাকাং হবে আলাপ-আলোচনার জন্য। পরদিন ২৬ মার্চ সকালে তাঁরা দুজন যাবেন গভর্নর ভবনে ইয়েহিয়ার সঙ্গে সে-আলোচনার ফলাফল জানাতে। ভূট্রোর ‘শকুনি মামা’ মি. Khar[১] নানা অজুহাতে শেখকে রাজী করাবেন, এবারের শেষবারের মত?) তিনি যেন ভূট্রোর আস্তানা ইন্টেরকন্টিনেন্টলে আসেন। পথমধ্যে টকার গেরিমা স্কোয়াডের গুণ্ডাঘাতকরা তাঁকে খুন করবে। ওদিকে ইয়েহিয়া বেলা পাঁচটায় সঙ্গেপনে প্লেনে উড়বেন করাচি বাগে। যদি প্ল্যানটা উৎরে যায় তবে ইয়েহিয়ার নেত্রমণক্ষণ সাড়ম্বরে প্রচার করে তাঁর জন্য নিরঙ্কু “এলিবাই” স্থাপনা করা যাবে। ওদিকে বলা হবে মুজিব-বিরোধী কোন রাজনৈতিক দল তাঁকে খুন করেছে।

এ প্ল্যান তো খাঁটি হিটলারী প্ল্যানের ঝাঁ চকচকে পয়লা কার্বন কপি।

(১) শব্দটার উচ্চারণ যদি “খার” হয় তবে অর্থ “কাটা”; যদি “খর্” হয় তবে অর্থ “গর্দভ”। বাংলা “খড়” হওয়ার সম্ভাবনা কম।

গ্যোরিং হিটলারে মিলে পোড়ালেন রাইসসটাগ। পুরো দোষটা চাপালেন কমুনিস্টদের স্বক্ষে।

গ্যোরিং হিটলার হিমলারে মিলে রোয়াম, এর্নসট আদি, ব্রাউনশার্টকে করলেন খতম। প্রচার করলেন ব্রাউন শার্টরা সুপরিকল্পিত ষড়যন্ত্র করেছিল, হিটলার এবং নাৎসি পার্টিকে খতম করে চতুর্থ রাইস প্রতিষ্ঠা করার।

তবে কিজিলবাশ দারওয়ান আর অস্ট্রিয়ান করপরলে পার্থক্য কোথায়? করপরল হিটলার দূশমনকে ঘায়েল করে, তারপর কেছা রটায়। দারওয়ান সেটা আদৌ করে উঠতে পারেনি। কেন? কারণ সে প্রোমোশন পেয়ে ডিকটেক্টর হয়। ক্লিনার যে রকম প্রোমোশন পেয়ে হ্যাভিমন হয়। আইয়ুবের শূন্য গদিতে জুন্টা তাকে প্রোমোশন দিয়ে ডিকটেক্টর বানিয়েছিল। হিটলার, মুসোলিনী, স্তালিন বিস্তার যুঝে, প্রচুর আত্মত্যাগ করে, মৃত্যুর সঙ্গে পাক্সা লড়ে তবে তারা ডিকটেক্টর হয়েছিল। আর্ম-চেয়ার পলিটিশিয়ানের মত ইয়াহিয়া আর্ম-চেয়ার ডিকটেক্টর। কদু কুমড়ার কুরবানী হয় না।

ভেজাল, ভেজাল, কুলে মাল ভেজাল। ইয়েহিয়া ভেজাল হিটলার, টিকা ভেজাল হিমলার, পীরজাদা ভেজাল গ্যোরিং।

কিন্তু কি ভেজাল কি খাঁটি মাল এদের পরমাগতি একই;

ঐ হেরো, ঘৃণ্য শব

পাপাচারী দুরাঙ্গার

রোস্ট করে শয়তান

খাবে তার গোস্টেন ডিনার!

Here lies the carcass

of a cursed sinner.

Doomed to be roasted

for the Devil's dinner.

“বীরের সবুর সময়।”

মহাডম্বরে প্রেসিডেন্ট ইয়েহিয়া খান ঢাকায় পৌছলেন।

শেখ সাহেব ইতিপূর্বেই প্রকাশ্যে একাধিকবার বলে রেখেছিলেন, প্রেসিডেন্ট পূব বাঙলায় আসছেন সম্মানিত মেহমান রূপে।

কাজেই উভয়ের মধ্যে মত-বিনিময় এবং ছয় দফা নিয়ে আলোচনা হার্দিক বাতাবরণের ভিতর দ্রুতগতিতে এক দিনের ভিতর সুসম্পন্ন হল। এ স্থলে স্মরণ রাখা ভালো যে এ-মোলাকাতের প্রায় দু-মাস পর ইয়েহিয়া যখন ফের শেখের সঙ্গে “আলোচনা” করার জন্য ৮/৯ মার্চে ঢাকা আসেন তখন “আলোচনার” সময় লেগেছিল প্রায় ষোল দিন। পুরো পাক্ষা পক্ষাধিক কাল। এই বৈষম্যের কারণটি অতি সরল। প্রথম ভেটে ইয়েহিয়ার উদ্দেশ্য ছিল শেখ মুজিবকে মাত্র একটি সরল ধাক্কা দেওয়া : “আমি আপনার ছয় দফা কর্মসূচিতে আপত্তিকর কিছুই দেখতে পাচ্ছি নে তবে কি না ভূট্টোর সঙ্গে...ইত্যাদি।” অর্থাৎ আওয়ামি লীগকে ভূট্টোর সঙ্গে একটা ফয়সালা করে নিলে ভালো হয়।

এটা ১৩/১৪ জানুয়ারি ১৯৭১-এর ঘটনা।

১৪ তারিখে ইয়েহিয়া রওয়ানা দিলেন পিণ্ডিপানে। ঢাকা এয়ারপোর্টে তিনি যে, “খোলাখুলি দিলদরিয়া” মেজাজে সাংবাদিকদের সঙ্গে কথোপকথনে বেশ কিছুক্ষণ সময় কাটালেন তার একটুকরো—ভূট্টো সংক্রান্ত—পূর্বেই উল্লেখ করেছি। বাকির আরো কিছুটা এ স্থলে কীর্তনীয়। যথা :

ইয়েহিয়া : “শেখ সাহেব আমাদের আলোচনা সম্বন্ধে যা বলেছেন তা অক্ষরে অক্ষরে (এবসল্যুটলি) সত্য। তিনিই এখন দেশের প্রধানমন্ত্রী হবেন।”

জনৈক সাংবাদিক : “আপনি এখন দেশের প্রেসিডেন্ট। শেখ মুজিবের সঙ্গে আপনার যে আলোচনা হল, সে সম্বন্ধে আপনার ধারণার কিছুটা আমরা শুনতে চাই।”

ইয়েহিয়া : “শেখ সাহেব যখন কর্মভার গ্রহণ করবেন (টেকসু ওভার) আমি তখন থাকবো না (আই উনট বী দ্যার)। শিগগিরই এটা তার গভর্নমেন্ট হবে।”

জনৈক রিপোর্টার : “শেখ মুজিব বলেছেন, আপনার সঙ্গে আলোচনা করে তিনি সন্তুষ্ট। আপনিও কি সন্তুষ্ট?”

ইয়েহিয়া : “হ্যাঁ।”

এ স্বাধীন-সংবাদ পড়ে যে-কোনো গৌড়ীয় বৈষ্ণবজ্ঞান উদ্বাছ হয়ে নৃত্য করবেন। তাই বলা একান্তই নিষ্প্রয়োজন যে পূর্ব বাঙলার লোক তখন উল্লাসে আত্মহারা। দশ বছরের পরাধীনতা শেষ হতে চললো। জয় বাংলা, জয় আওয়ামি লীগ।

এই উদ্দাম আনন্দনৃত্য দেখে কেমন যেন মনে হয়, আওয়ামি লীগের কর্তাব্যক্তির যেন ঈষৎ বিচলিত হন। তাঁরা তো রাতারাতি ভুলে যাননি, পশ্চিম পাকের শকুনি মামারা কি প্রকারে শের-ই-বাঙলা ফজলুল হককে পর্যন্ত বিড়ম্বিত করেছে। আর আজ? হঠাৎ?

পরবর্তীকালে এটা পরিষ্কার হল। ইয়েহিয়া পঁচিশে মার্চ তার মুখোস খুলে উৎকট প্রেতনৃত্য আরম্ভ করার পর যে “বাংলাদেশ” সরকার নির্মিত হল তার প্রধানমন্ত্রী জনাব তাজউদ্দীন আহমদ সেদিনই, ১৭ এপ্রিল এক প্রেস কনফারেন্সে ইয়েহিয়া-মুজিব ভেট বাবদে যা বলেন তার একাংশের মোটামুটি সারমর্ম এই :—

লীগের ছয় দফা বাবদে ইয়েহিয়ার যে বিশেষ কোনো গুরুতর আপত্তি আছে তার আভাসও তিনি দেননি। লীগ কিন্তু প্রত্যাশা করেছিল, (ছ-দফাতে ইয়েহিয়া যখন কোনো আপত্তি তুলছেন না, এবং এই ছ-দফার ভিত্তির উপরই লীগ অ্যাসেমব্লিতে পাকিস্তানের নতুন সংবিধান নির্মাণ করবেন তখন) ইয়েহিয়া ভবিষ্যৎ সংবিধানের স্বরূপ সম্বন্ধে আপন ধারণা প্রকাশ করবেন। তা না করে তিনি শুধু ইচ্ছা প্রকাশ করলেন লীগ যেন ভূট্টোর পার্টির সঙ্গে একটা সমঝোতা করে নেয়।

তাজউদ্দীন সাহেবের এই বিবৃতিটি উল্লেখযোগ্য। ভবিষ্যৎ যুগের ঐতিহাসিকরা স্থির করবেন, “হে আওয়ামি লীগ, ভূট্টোর সঙ্গে একটা সমঝোতা করো—” ইয়েহিয়ার এই নির্দেশের মধ্যে ‘তোমারে মারিবে যে, গোকুলে বাড়িছে সে’-র মারণাঙ্কটা লুকিয়ে রেখে গেলেন কি না?

কারণ মোটামুটি ওই সময়েই, খুব সম্ভব ১২ জানুয়ারি, জনৈক সাংবাদিক ইয়েহিয়াকে জিজ্ঞেস করেন, পূর্ব পাকিস্তান যদি অ্যাসেমব্লিতে এমন একটা সংবিধান নির্মাণ করে যেটা পশ্চিম পাকিস্তানের কাছে গ্রহণযোগ্য বলে মনে না হয় তবে ইয়েহিয়া কি সে-সংবিধানে

সম্মতি দেবেন? ইয়েহিয়া উত্তরে বলেন, এটা একটা কাল্পনিক (হাইপথেটিকাল) প্রশ্ন; এর উত্তর তিনি দেবেন না।

মোটাই হাইপথেটিকাল প্রশ্ন নয়।

আজ যদি ব্রিটিশ পার্লামেন্টে কেউ প্রশ্ন শুধায়, “কাল যদি রাশা বিনা নোটিশে ব্রিটেন আক্রমণ করে তবে প্রধানমন্ত্রী তার জন্য কোন্ কোন্ প্রস্তুতি কি কি ব্যবস্থা অবলম্বন করেছেন” তবে প্রধানমন্ত্রী স্মিতহাস্য সহকারে বলবেন, “এটা কাল্পনিক প্রশ্ন?” কারণ বিশ্বসংসার জানে, রাশার সঙ্গে ব্রিটেনের এমন কোনো দুর্বীর শত্রুতা হঠাৎ গজিয়ে ওঠেনি, বা রাশার কি দোস্ত কি দূশমন কেউই হালফিল ঘূণাঙ্করে এ-কথা বলেননি যে রাশা গোপনে গোপনে এমনই প্রস্তুতি করেছে যে দু-একদিনের ভিতর বিলেতের উপর ঝাঁপিয়ে পড়বে। অতএব এ-প্রশ্নটা অবাস্তব—হাইপথেটিকাল।

কারণ যদিও মি. ভূট্টো তখন পর্যন্ত তাঁর সব কটা রঙের তাস টেবিলের উপর বিছিয়ে দিয়ে হুমকি ছাড়েন নি যে যারা অ্যাসেমব্লিতে যাবে তিনি তাদের ঠ্যাং ভেঙে দেবেন তথাপি কোন্ রাজনৈতিক, বিশেষ করে ইয়েহিয়া জানতেন না যে ভূট্টো আওয়ামি লীগের বিরুদ্ধে তীব্রতম বৈরীভাব অবলম্বন করেছেন? নইলে স্বয়ং ইয়েহিয়াই বা কেন ওই সময়েই লীগকে নির্দেশ দিতে গেলেন, ভূট্টোর সঙ্গে একটা ফয়সালা করে নিতে? তাহলে পূর্বোক্ত প্রশ্নটি হাইপথেটিকাল আকাশকুসুম গোত্র লাভ করলো কি করে?

তবু যদি ইয়েহিয়া জেদ ধরে বলেন, না, তিনি ভূট্টোর কোনো বৈরীভাবের কথা জানেন না, তাহলে তো জনাব তাজ অনায়াসে বলতে পারেন, “তবে তো হুজুরের নির্দেশ একদম খাঁটি ‘হাইপথেটিকাল নির্দেশ’। আপনি যখন বলতে পারছেন না, ভূট্টো দূশমনীর অমুক অমুক স্টেপ নিয়েছেন (পূর্বের উদাহরণ অনুযায়ী কেউ যখন আদৌ কোনো খবর পায়নি যে রাশা কাল ব্রিটেন আক্রমণ করবে) তা হলে আমরা, মেজরিটি পার্টি অথবা কান-না-লেনেওয়ালা চিলের পিছনে ছুটে ছুটে শেষটায় মিনরিটির হাওয়াই কোমরে রশি বাঁধতে যাবো কোন্ হাইপথেটিকাল ট্রাসের তাড়নায়? ও করে কাল আমার চারখানা হাতও গজাবে না, তার জন্য আজ চারখানা দস্তানাও কিনবো না।”

ওদিকে বাংলাদেশের যুব-সমাজ অতিষ্ঠ হয়ে উঠেছে—বিশেষ করে যখন বার বার প্রশ্ন করা সত্ত্বেও ইয়েহিয়া ঢাকাতে কখন অ্যাসেমব্লি ডাকবেন সে সম্বন্ধে কোনো উত্তর দিতে কিছুতেই সম্মত হলেন না। ওদের বক্তব্য তাদের ছয় পয়েন্টের বিরুদ্ধে ইয়েহিয়া যখন কোনো আপত্তি তোলেননি—আর এ-খ-ন তুললেই বা কি—তবে অ্যাসেমব্লি ডাকতে এত দেরি হচ্ছে কেন?

যুগ যুগ ধরে ইতিহাসে বার বার এ-ঘটনা ঘটেছে। জনতা অসহিষ্ণু; নেতারা দেখছেন, আঘাত করার মত সময় এখন আসেনি। বিকল্পে : নেতা আহ্বান করছেন, ওঠো, জাগো; জনতা তন্দ্রাচ্ছন্ন।

মূল কথা, মূল তত্ত্ব টাইমিং। বহু ক্ষেত্রে পরবর্তীকালে পরিষ্কার ধরা পড়ে, সমস্ত পরিকল্পনাটা ব্যর্থ হয়ে গিয়েছিল টাইমিংয়ের গোলমালে।

ইংরাজিতে তাই বলে :

লোহা গনগনে থাকতে থাকতেই মারো হাতুড়ির ঘা।

সংস্কৃত সুভাষিত বলে :

যৌবন থাকতেই করো বিয়ে। পিস্তি চটিয়ে ঝেঁয়ো না।

কিন্তু যে নেতার মনে দৃঢ় প্রত্যয় আছে যে তাঁর কাছে অগ্নি নির্মাণের যথেষ্ট সামগ্রী সঞ্চিত আছে, যদুচ্ছ লৌহখণ্ডকে তপ্তাতিতপ্ত করতে পারেন তাঁর তন্মুহুর্তেই হাতুড়ির আঘাত হানবার কি প্রয়োজন?

এবং বিজ্ঞজন মৃদু হাস্য করে বলেন, তড়িঘড়ি মামেলা খতম করাই যদি সব চাইতে ভালো কায়দা হত তবে (বাইবেলে) সদাপ্রভু সৃষ্টি নির্মাণে পুরো ছটি দিন খর্চা করলেন কেন? তিনি তো আঁখির এক পলকে শতলক্ষ গুণে বৃহত্তর লক্ষ কোটি সৃষ্টি নির্মাণ করতে পারতেন।

কিন্তু প্রবাদ, ঐতিহাসিক নজীর, গুণীজনের জ্ঞানগর্ভ উপদেশবাণীর উপর নির্ভর করেই তো জননেতা সব সময় আপন পথ বেছে নেন না। তবে এ স্থলে আমরা একটি উদ্ভূত “কাব্য-কমপাস” পাচ্ছি।

যাকে বলে “ডে টু ডে পলিটিকস”, তার কোনো গাইড-বুক শেখ-গুরু কবিশুরু রেখে যান নি। তবে যখন চিরন্তন রাষ্ট্রনীতিতে বাহুর দণ্ড, ক্রুদ্ধ প্রভু, রাজার প্রতাপ চিৎকার করে দুঃখ দেবার বড়াই করে তখন তিনি তাঁর সর্বাগ্রজ দ্বিজেন্দ্রনাথের পৌত্র, তাঁর “গানের ডাণ্ডারী” দিনেন্দ্রনাথকে “বেঙ্গল অর্ডিনেনসের” জুলুম মদোন্মত্ত জনের আশ্বালনের মত কত যে হয়-বিভবিত ক্ষণস্থায়ী, পক্ষান্তরে সত্য যে “নিত্যকালের সোনার রঙে লিখা তিলক ধারণ করে আছেন” সে বাণী ছন্দে প্রকাশ করে বলেন :

“জানি, তুমি বলবে আমায়
থামো একটুখানি,
বেণুবীণার লগ্ন এ নয়,
শিকল ঝমঝমানি।
শুনে আমি রাগবো মনে,
করো না সেই ভয়,
সময় আমার কাছে বলেই
এখন সময় নয়।”

তাই দেখতে পাই,

“সময়েরে ছিনিয়ে নিলে
হয় সে অসময়
ক্রুদ্ধ প্রভুর সয় না সবুর
প্রেমের সবুর সয়।
রাজপ্রতাপের দণ্ড সে তো
এক দমকের বায়ু
সবুর করতে পারে এমন
নাই তো তাহার আয়ু।
ধৈর্য বীর্য ক্ষমা দয়া
ন্যায়ের বেড়া টুটে
লোভের ক্ষোভের ক্রোধের তাড়ায়
বেড়ায় ছুটে ছুটে।”

ইয়েহিয়া আর তার জুঁটা জানে পূব বাঙলায় তাদের আয়ু প্রায় শেষ,

“আজ আছে কাল নাই বলে তাই

তাড়াতাড়ির তালে

কড়া মেজাজ দাপিয়ে বেড়ায়

বাড়াবাড়ির চালে!

পাকা রাস্তা বানিয়ে বসে

দুঃখীর বুক জুড়ি[১]

ভগবানের ব্যথার পরে

হাঁকায় সে চার-ঘুরি।”

পূব বাঙলার লোকের সঙ্গে তারা তো কখনো মৈত্রীর ডোর বাঁধতে চায় নি, তারা চেয়েছিল পলে পলে তিলে তিলে রক্তশোষণ করতে :

“তাই তো প্রেমের মালাগাঁথার

নাইকো অবকাশ।

হাতকড়ারই কড়াঙ্কড়ি,

—দড়াডড়ির ফাঁস।

রক্ত রঙের ফসল ফলে

তাড়াতাড়ির বীজে,

বিনাশ তারে আপন গোলায়

বোঝাই করে নিজে।

কাণ্ড দেখে পশুপক্ষী

ফুকরে ওঠে ভয়ে,

অনন্তদেব শাস্ত থাকেন

ক্ষণিক অপচয়ে।”

আদি কবি বাঙ্গালী রাবণের রাক্ষস-রাজ্যের বীভৎসতা মূর্তমান করার জন্য কাব্যলোকের প্রথম প্রভাবে কাঠবেরালি মোতিফ অবতারণা করেছিলেন, কবিগুরু তাই সেই পন্থায় চললেন “রাজেন্দ্রসঙ্গমে”।

কোনো প্রয়োজন ছিল না, কিন্তু আত্মপ্রত্যয় যার আছে সে আত্মসংযম করতেও জানে বলে, শেখজী এক মাস সময় দিলেন ইয়েহিয়াকে। এক মাস পরে ডাকো এসেমন্ট্রির অধিবেশন।

(১) এ যেন ভবিষ্যৎদ্রষ্টা স্ববির বাণী : ঢাকার রাস্তায় নিরীহজনের বুকের উপর দিয়ে পিশাচপাল ট্যাঙ্ক চলাবে।

এইবারে সেই বিষয়টির অবতারণা করতে হয় যেটি নিয়ে আলোচনা করার সুযোগ আমরা পাইনি।

কোনো সন্দেহ নেই, ভবিষ্যৎকালের ঐতিহাসিকরা দুই দলে বিভক্ত হয়ে এই গুরুতর বিষয়টি নিয়ে বিস্তারিত মাথা-ফাটাফাটি করবেন। খৃষ্টকে ক্রুশবিদ্ধ করার জন্য যিহুদিরা দায়ী, না অন্য কেউ, সে নিয়ে যেরকম দু হাজার বছর ধরে শব্দার্থে প্রাচ্যে প্রতিষ্ঠা পণ্ডিতে পণ্ডিতে অকৃপণ মাথা-ফাটাফাটি হয়েছে এবং হবে, তথা পরোক্ষভাবে হিটলারের গ্যাস চেম্বার নির্মাণে যার পরিণাম। এস্থলে সমস্যা, একান্তরের মধু ঋতুতে বাংলাদেশকে ক্রুশবিদ্ধ করার জন্য দায়ী কে? এস্থলে লক্ষণীয় প্রায় ওই একই ঋতুতে খৃষ্টকে হত্যা করা হয়। এবং চরম লক্ষণীয় যে, বাংলাদেশটাকে জবাই করা হয় মহরম মাসে—যে-মাসে তের শ' বছর পূর্বে, হজরৎ ইমাম হুসেনকে ইয়েজিদের জন্মদার কায়বালাতে জবাই করে। বস্তুত আমার আচারনিষ্ঠ ছোটবোনকে ২৫শে মার্চের উল্লেখ করতে বললে, “আমাদের মধ্যে তখন বলাবলি হয়েছিল, ইয়েহিয়া শীয়া। শীয়ারা আপ্রাণ চেষ্টা দেয় পাক মহরমের চাঁদে যেন কোনো প্রকারের অপকর্ম, গুনাহ না করে আর ইয়েহিয়া শীয়া হয়ে এই পবিত্র মাসেই যে কবীরা গুনাহ (মহাপাপ) করলেন সেটা যে সুন্নী ইয়েজিদকেও নৃশংসতায় ছাড়িয়ে গেল।”

অবশ্য সে-সময়ে সামান্যতম মুষ্টিমেয় বাঙলাবাসী জানতো যে ইয়েহিয়া শীয়া এবং ভিতরে ভিতরে কটুরতম শীয়া।

কিন্তু ৭১-এর ২৫ মার্চে ঐ বৎসর সূর্য ও চন্দ্রের এক বিপরীত যোগাযোগের ফলে উভয়ের মধ্যে এক সংঘর্ষ উপস্থিত হয়। সে-সংঘাতের কাহিনী অতি সংক্ষেপে এই :

ধর্মকর্মের পালপার্বণ, তাবৎ অনুষ্ঠান ইরান-তুর্কমান মাত্রই চান্দ্রমাস পঞ্জিকা অনুযায়ী সুন্নীদের মতই পালন করে। কিন্তু নিত্যদিনের ঘৃত লবণ তৈল তণ্ডুল বস্ত্র ইন্ধন সমস্যার সমাধান করে সৌর গণনা অনুসারে। ফলে চান্দ্রমাস, শোকাশ্রসিক্ত মহরম, বছর তিরিশেকের মধ্যে একবার না একবার মোটামুটি একই সময়ে হাজির হবেন ইরানীদের জাতীয়, দ্বিসহস্র বৎসরাধিক কালের ঐতিহ্য-সম্বলিত নওরোজ=নববর্ষ পর্বের সময়। সেটা আসে মোটামুটি ২১ মার্চ নাগাদ। সেদিন ইরানতুরানে যা আনন্দোৎসব হয় তার সঙ্গে বড়দিন বা হোলি পাল্লা দিতে পারে না। বিশেষ করে তামাম দেশটা জুড়ে সেদিন যে শরাবের বান জাগে তার মুখে দাঁড়ায় কোন পরবের সাধি!

সর্বশেষে, প্রকাশ থাকে যে—ইয়েহিয়ার চেলাচামুণ্ডা টিক্কা নিয়াজী, এস্টেক তেনার এক তাঁড়ের ইয়ার মিস্টার ভুট্টো জগবান্দসহ হুঙ্কারে যেটিকে ঘোষণা করতেন সর্বপ্রথম—ঠিক ২৫ মার্চ তারিখে, দু-বৎসর পূর্বে ১৯৬৯ সালে আইয়ুবের স্থলে “কাফির” নিধনার্থে কক্সিরূপে ইসলামাবাদ সিংহাসন আরোহণ করেন শীয়া পোপ ইয়েহিয়া। অকৃপণ প্রসাদপ্রাপ্ত ওয়াকিফহাল মহল আজো সে মহালগনের স্বরণে বলেন, “সেদিন পাক ইসলামাবাদে যে পাকনাপাক শীত শ্যামপেন বৃদ্ধ উখিত হয়ে আসমান-জমীন ত-ব-ব-ব করে দিয়েছিল তারই ফলে রাউলপিণ্ডির আবহাওয়া দক্ষতর সবিস্ময়ে প্রচার করে যে নর্মাল ১০% থেকে সে-রাত্রে বায়ুমণ্ডলের আর্দ্রতা ৯৯%-এ পৌঁছেছিল এবং পূর্বাভাসে আশঙ্কা প্রকাশ করা হয় যে আগামী চব্বিশ ঘণ্টার ভিতরে শ্যামপেন-বৃষ্টির

সম্ভাবনা আছে। এটা অবশ্য ১৯৬৯-এর ২৫ মার্চের কথা।

১৯৭১-এর ২৫ মার্চে কিন্তু ইয়েহিয়া খান যখন পিণ্ডি যাবার জন্য বেলা পাঁচটায় ঢাকা বিমানবন্দরে প্লেনে ওঠেন, তখন সে-প্লেনের দরজা বন্ধ হতে না হতেই প্লেন টেক-অফের কড়া কানুন হেলাভরে উপেক্ষা করে এয়ার হোস্টেস প্রেসিডেন্টের হাতে তুলে দিলেন হুইস্কি সোডা। ঝটপট দ্বিতীয়টা। এবারে শ্যামপেন নয়। সে-সুধা মোলায়েম। এবারে রুদ্রাগ্নি হুইস্কি।

শুনেছি, রোম ভস্মীভূত করার আদেশ দেবার সময় নীরোর এক হাতে ছিল বেয়াল। অন্য হস্তের বৃদ্ধাঙ্গুষ্ঠ পদনিম্নের ভূমির দিকে অবনত করে প্রচলিত রুদ্রমুদ্রা দেখান, যার অর্থ “ভস্মীভূত করো রোম”।

কিন্তু এখন যেটা বলছি সেটা শোনা কথা নয়। নিরেট সত্য।

ইয়েহিয়ার এক হাতে ছিল হারাম শরাব, অন্য হাত দিয়ে কৃতান্ত মুদ্রা দেখালেন জল্পাদকে—“কংল-ই-আম্ চালাও বাঙ্গালমে। সট দেম আউট।”

কোথায় গেল শোকাব্রসিক্ত মহরমের অশৌচ, কোথায় গেল ধর্মের বিধিনিষেধ? হে হবু পলিটিশিয়ান, শিখে নাও তবে দক্ষযজ্ঞের উচাটন মন্ত্রারম্ভের পূর্বে ইয়েহিয়ার নর্ম ললিতা গীতি।

বিধিবিধানের শীত-পরিধান

ফাগুন আগুনে দহন করো

বিহঙ্গমানে মোরা দুই জান্

ফাগুন আগুন দহন করো

ইরানের শীতকালে প্রকৃতি অতিশয় অকরণ—অসংখ্য প্রাণী মৃত্যুবরণ করে। তাই ধর্মের “বিধিবিধানকে” দুর্বিষহ শীতবস্ত্রের সঙ্গে তুলনা করা হয়েছে। তারপর আসে নবজীবনদায়িনী “ফাগুন আগুন”। তাই নিবন্ধারম্ভে চিন্তা করেই বলেছি, “মধু ঋতুতে বাংলাদেশকে ক্রুশবিদ্ধ করা হয়”।

বাংলাদেশের ৯৯% নরনারীর দৃঢ়বিশ্বাস এই ক্রুশপর্বের কাপালিক ইয়েহিয়া এবং তার মিলিটারি জুন্টা। পাকিস্তানের ওয়াকিফহাল মহলের এক নাতিবৃহৎ অংশ ভিন্ন মত পোষণ করে।

নিরপেক্ষ জনৈক ভারতীয় চিন্তাশীল সেনাপতি গত এপ্রিলে পরলোকগত লেফটেনেন্ট জেনারেল ব ম কল (B. M. Kaul) সদ্যোক্ত ওয়াকিফহালদের মতই ভিন্ন মত প্রকাশ করেছেন জুলাই ১৯৭১-এ প্রকাশিত তাঁর উত্তম গ্রন্থ “কনফ্রনটেশন উইথ পাকিস্তান”—এ। পিণ্ডি ইসলামাবাদের মিলিটারি জুন্টার বহু সিনিয়ারতম শিকরে পাখিকে তিনি অতি ঘনিষ্ঠভাবে চেনেন। তিনি বলেন :

১৯৭০-এর গণনির্বাচনের পর একাধিক বিশ্বস্ত সূত্র থেকে জানা গেল শেখ মুজীব এবং ইয়েহিয়া খানের মধ্যেই এই মর্মে একটি রাজনৈতিক সমঝোতা হয়ে গিয়েছে যে, শেখ পাকিস্তানের প্রধানমন্ত্রী পদ গ্রহণ করবেন এবং ইয়েহিয়া পূর্বের ন্যায় প্রেসিডেন্ট থাকবেন।

সেনাপতি কল তারপর বলছেন, “কিন্তু যখন এই সিদ্ধান্ত গ্রহণ করা হয়, তখন দুই নেতার কেউই ভুট্টোর দুষ্ট চক্রান্ত করার সামর্থ্য যে কতখানি সেটা হিসেবে ধরেন নি (মেক এলাওয়েনস্ ফর দি মিস্টিফ-মেকিং কেপাসিটি অব ভুট্টো!)।”

কি সে মিস্টিফ বা নষ্টামি? তার পটভূমি কি?

গণ নির্বাচনের প্রায় দুই মাস পূর্বে, অক্টোবর ১৯৭০ সালেই পশ্চিম পাকবাসী অবসরপ্রাপ্ত পাকিস্তান এয়ারফোর্সের প্রধান, এয়ার মার্শাল নূর খান লাহোরের নিকটে এক জনসভায় বলেন, “মি. ভুট্টো দীর্ঘকাল ধরে সরকারি মহলের সঙ্গে দহরম দহরম জমিয়ে এখন চেষ্টা করছেন পাকিস্তানে যেন ডিক্টেটরী শাসন কায়েম থাকে এবং চালবাজি মারফত তিনি যাতে করে, খিড়কির দরজা দিয়ে ক্ষমতা লাভ করে ফেলেন।” একদম খাঁটি কথা। কিন্তু এরপর নূর খান যে প্রশ্ন শুধোচ্ছেন সেটির দিকে আমি পাঠকের দৃষ্টি আকর্ষণ করি।

“‘ভূতপ্রাপ্ত’ এক ডিক্টেটরের এই শাগরেদ ভুট্টো যবে থেকে তাঁর প্রভুকে গুস্তা মেরে নর্দমায় ফেলে দেওয়া হল সেই থেকে নাগাড়ে ঝাড়া আঠারোটি মাস ইয়েহিয়া শাসনের সব-কিছু ধৈর্যসহ বরদাস্ত করার পর এখন আচমকা কেন আর কুছতী বরদাস্ত করতে চাইছেন না?—এ প্রশ্ন শুধোবেন যে কোনো স্থিরধী জন।”

নূর এ-প্রশ্নের উত্তর জানতেন।

আমরাও কিছুটা জানি।

আইয়ুবের পতনের পর এক পশ্চিম পাকী কার্ঠরসিক ঠোঁট-কাটা মস্তব্য করেন, বহুবীর কোটিপতি, সার্ভিনিয়ার গোপন গহ্বর—ধনপতি “আলিবাবা তো গেল, কিন্তু চল্লিশটে চোর রেখে গেল যে।” এরা ছড়িয়ে আছেন সর্বত্র। ব্যুরোক্রেট ব্যাকপতি সদাগর ইত্যাদি করে করে খুদ আর্মি তক্। এই গেল পয়লা নম্বর।

দোসরা : সর্বদেশ-প্রেমী দ্বারা অভিশপ্ত বাইশটি শোষক পরিবার।

হরদরে গলাজল হয়ে একুনে দাঁড়ায় কিন্তু এক বিকট ত্রিমূর্তি।

যশস্ত (ধনপতি—বিশেষ করে সেই ২২), রক্ষ (আর্মি) এবং চিত্রগুপ্ত (আমরা পাল)।

ইয়েহিয়া আসনে বসা মাত্রই ভুট্টো মারলেন ডুব। তাঁর লক্ষ্য ছিল দুটি : আয়ুবকে সরিয়ে জিন্না দি সেকেন্ড হওয়ার পথ সুগম করা। দুই : কিন্তু জিন্না ছিলেন পূব-পশ্চিম দুই পাক-ডানার উপর সওয়ার ফাদার অব দি নেশন। এর একটি ডানা অটনমি পেয়ে গেলে তিনি হয়ে যাবেন এজমালি জুনিয়ার ফাদার অব দি নেশন। অতএব ঘায়েল করতে হবে আওয়ামি লীগকে। মূলত ভুট্টো-পার্টির একটা শাখা পূর্ব পাকেও ছিল। তার চেয়ারম্যান ছিলেন মুসলিম শাস্ত্রে সুপণ্ডিত বাঙালি মৌলানা নূরজ্জমান। ভুট্টো দেখলেন, বাংলা দেশের সর্বনাশ করে তাকে পশ্চিম পাকের চিরন্তন ক্রীতদাস বানাতে হলে তাঁর পার্টিতে পূব পাকের কোনো সদস্য রাখলে সে তাঁর হকুমমত নেমকহারাম কুইজলিং সাজতে রাজী নাও হতে পারে। তাই তিনি তাঁর পার্টিকে নবরূপে দিলেন—আপন প্রদেশ সিক্কুর কোনো নগরে নয়, তাঁর আরাধ্যা বম্বভা নগরী পাঞ্জাবী লাহোরে। মৌলানা নূরজ্জমান তীব্র প্রতিবাদ জানিয়ে ভুট্টোর সঙ্গে সম্পর্ক ছিন্ন করলেন এবং স্পষ্ট ভাষায় বললেন, ভুট্টো লাহোরে তাঁর পার্টিকে নবরূপ দেবার সময় পূব পাকের কোনো নেতা বা সাধারণ জনকে আহ্বান জানান নি; তাঁর একমাত্র উদ্দেশ্য বাংলাদেশের ন্যায় অধিকার থেকে তাকে বঞ্চিত করা।

ভুট্টোর যে নিক্টিয় আঠেরো মাস সম্বন্ধে অর্থপূর্ণ কুটিল প্রশ্ন শুধিয়েছিলেন এয়ার মার্শাল নূর খান সে-আঠারো মাস ভুট্টো ছিলেন “নীরব কর্মী”; তিনি তখন ষোড়শোপচারে পূর্বোক্ত ত্রিমূর্তির পূজার্তনায় নিরতিশয় নিমগ্ন। ভুল করলুম, ষোড়শ নয় সপ্তদশ—বোতলবাসিনী তরলা-ভৈরবী। আর কে না জানে, সপ্তদশেই বঙ্গজয় সম্ভবে।

প্রথমেই নমো যক্ষায়। ধনপতিদের বোঝাতে রত্তিভর সময় লাগলো না—“পূব পাক হাতছাড়া হয়ে গেলে তুমি খাবে কি? কা তব কাস্তা নয়—কা তব পছা হবে তখন?”
 যে অর্থপ্রাবন ধ্যেয়ে এল ভুট্টো ব্যাক্কের দিকে, কোথায় লাগে তার কাছে হিমাদ্রি শৃঙ্গ থেকে নেবে আসা পঞ্চনদের বন্যা!

এখানে হিটলারের সঙ্গে ভুট্টোর একটা সাদৃশ্য আছে। এদিকে হিটলারের পার্টির নাম ওয়ার্কারস্ পার্টি, ওদিকে কড়ি ঢাললে কলোনের যক্ষ ব্যাক্কাররা! ওয়ার্কারস্দের বুঝিয়েছেন, তোমাদের বাঁচাবো ধনপতিদের শোষণ থেকে, আর ধনপতিদের সমঝালেন, তোমাদের বাঁচাবো শ্রমিকদের ইউনিয়ন-নামক নুইসেনস্ থেকে। ভুট্টো কি দিয়ে না-পাক ধনপতিদের বাগালেন সে তো বলেছি, তাঁর পীপলস পার্টির “পীপল”কে বোঝালেন হুবহু হিটলারী কায়দায় গরম গরম লেকচার ঝেড়ে। পীপলকে অবহেলা করা চলে না, কারণ তাঁর পার্টি—ইষ্টমন্ত্র।

‘ইসলাম আমাদের ধর্ম।
 গণতন্ত্র আমাদের রাষ্ট্রনীতি।
 সমাজতন্ত্র আমাদের অর্থনীতি।
 সর্বপ্রভুত্ব জনগণের।’

হায় রে পূর্ব বাংলার জনগণ!

ব্যুরোক্রেটদের বললেন, ‘ইংরেজ আই সি এসের চেয়েও রাজার হালে আছ পূর্ব পাকে। পশ্চিম পাকের কড়িটাও আসে পূব পাক থেকে। বাঙালরা অটনমি পেলে যাবে কোথায়?’

আর্মিকে শুধোলেন, “তোমাদের সৌরী-সেনীয় শ্বেতহস্তীর মিলিটারি বাজেটের টাকাটা যে পূবালী চিড়িয়া সোনার ডিম পেড়ে সামলায় তার যে উড়ুক উড়ুক ভাব! সে পালালে পট্টি মারবে কি দিয়ে?”

এবং এদের আরো মোলায়েম করার জন্য তাদের পদপ্রান্তে রাখলেন পঞ্চমকারের বড়হীয়া বড়হীয়া সওগাৎ। ধনপতিগণ প্রসাদাৎ পূর্বলব্ধ অর্থদ্বারা।

ঝাড়া আঠোরোটি মাস ভুট্টো করলেন এই তপস্যা। এবারে এয়ার মার্শাল নূর (=জ্যোতি)-এর রহস্যাক্কারময় বন্ধিম প্রশ্নের উপর সরল জ্যোতি বর্ষিত হল।

তপস্যাস্তে যক্ষ রক্ষ গুপ্ত সমষ্টি ত্রিমূর্তি বদ্ধমুষ্টিতে ধারণ করে তিনি বেরুলেন জয়যাত্রায়।

যে সম্প্রদায় মনে করেন বাঙলাদেশকে ক্রশে চড়াবার চড়ক-বাদ্যে ইয়েহিয়া মূল গায়েন নন তিনি মাত্র দোহার, বিলিতি বাদ্যে সেকন্ড ফিড্ল তাঁরা বলেন ভুট্টো যখন আজ হেথায় ব্যুরোক্রেন্ট হতোমদের ব্যানকুয়েট ঝাওয়াচ্ছেন, কাল হোথায় জাঁদরেল কর্ণেলদের নৃত্য সম্বলিত ককটেল পার্টি দিচ্ছেন, পরশু খোজা-বোরা-মেনন ধনপতিদের গোপন জলসাতে তাঁর পিপলস্ পার্টির পিপলদের কুরবাণী দিচ্ছেন যক্ষদের দরগাহতে—ইয়েহিয়া তখন এ-সব পূজা-আচ্চা সম্বন্ধে সম্পূর্ণ উদাসীন। কারণ এসব গুণীনদের মতে ইয়েহিয়ার তখনো সঙ্কল্প আওয়ামি লীগকে তার ন্যায্য প্রাপ্য যথাসময়ে দিয়ে দেবেন। অর্থাৎ কূটনৈতিক ভুবনে তাঁর তরে তখন গভীর নিস্তব্ধ তৃতীয় যাম। তিনি গভীর নিদ্রায় সুখুপ্ত চতুর্দিকে অবশ্য ছরী পরীরা তাঁর সেবাতে লিপ্ত।

এহেন সময়ে ভুট্টো দেবের আবির্ভাব।

জেনরেল কল-এর পুস্তকখানি প্রধানত রণনীতি সম্বন্ধে। তাই সেখানে রাজনীতির উল্লেখ কম—নিতান্ত যেটুকু পটভূমি হিসাবে বলতেই হয়, আছে মাত্র সেইটুকু। কারণ রণপণ্ডিত ক্লাউজেভিৎস তাঁর প্রামাণিক গ্রন্থে বলেছেন, “পলিটিকস যখন আর এগোতে না পেরে অন্য বস্তুর সাহায্যে এগিয়ে চলে তখনই তার নাম যুদ্ধ।”

কল বলছেন ইয়েহিয়া মুজিবে মিলে গণতন্ত্রের যে কটি কোমল চারাটি পুঁতলেন সেটাকে উপড়ে ফেললেন ভুট্টো। তিনি তখন পশ্চিমা সেনাবাহিনীর আদরের দুলাল। তাঁর আপন ক্ষমতার নেশা তখন মাথায় চড়েছে। তিনি এখন আর এসেমব্লিতে বিরোধী দলের পাণ্ডা সঙ্গে মুজীব মূল গায়নের পিছনে পিছনে দোহার গাইতে রাজী নন।

তবু তিনি এলেন ঢাকায়। তার একমাত্র কারণ, তাঁর দৃঢ় বিশ্বাস, শেষটায় রাষ্ট্রের কর্ণধার হবেন তিনি—এদিন যা ছিল, ঠিক তেমনি, পূর্ব পাক থাকবে তাঁর তাবেতে কলানি রূপে। ইংলন্ডের রাজা যে-রকম “সমুদ্রের ওপারের ডমিনিয়নসেরও সম্রাট”। এবং দিল্লিশ্বরো বা জগদীশ্বরো বা যে-রকম কখনো সখনো ভারতে এসে রাজানুগ্রহ দেখাতেন, ভুট্টোকেও তো সে-রকম ঢাকাতে আসতে হবে মাঝেমিশেলে। তখন যেন তাঁর পূর্ব পাকিস্তানের কোনো বেয়াড়া প্রজা না বলতে পারে, তিনি মুজীবকে তাঁর মুখাবলি দর্শন লাভ থেকে অকারণ ভাচ্ছিলো বঞ্চিত করেছিলেন।

ভুট্টোদেব ঢাকা এলেন বিস্তর সান্নাধ্যাস সঙ্গে নিয়ে। প্রিন্স অব ওয়েলস যে-রকম পাত্রমিত্র নিয়ে দিল্লি আসতেন।

ইয়েহিয়া যখন ভুট্টোর গূর্বে ঢাকা আসেন তখন তাঁর সে-আসাটা আন্তরিক শুভেচ্ছাবশত ছিল কি না সে-বিষয়ে মতভেদ আছে, কিন্তু এ-বিষয়ে কারো মনে কোনো সন্দেহ নেই যে ভুট্টোর আগমনটা ছিল নির্ভেজাল ধামা। কোনো প্রকারের সমঝোতাই তাঁর কাম্য ছিল না। তাই মারাত্মক রকমের সিরিয়াস কূটনৈতিক আলাপ-আলোচনার ভড়ং চালালেন তিনি পাক্ষা তিনটি দিন ধরে—যে আলোচনা তিন মিনিটেই শেষ হয়ে যাবার কথা। একবার তো তিনি সে থিয়েডারিটাকে প্রায় ফার্সের পর্যায়ে নাবিয়ে আনলেন একটানা ঝাড়া আটটি ঘণ্টা শুধু তিনি আর শেখ “সলা পরামর্শ” করে। ও হো হো! সে কী টপমোস্ট সিক্রেসির ভান! মিঞা তাজ্জ, নজরেরও সেখানে প্রবেশ নাস্তি। ভাবখানা এই, ভুট্টোদেব এমনই প্রলয়ঙ্করী প্রস্তাব প্রতিপ্রস্তাব পরিকল্পনা সুপারপ্ল্যানিং পেশ করবেন যে তার সামান্যতম রেশও যদি তৃতীয় ব্যক্তি শুনে ফেলে তবে ইন্ডিয়া সেই রেশের উপর নির্ভর করে তদন্তেই পাকিস্তান এটাক করবে, ওয়ালস্ট্রীট ফট করে কলাপস করবে, ইংলন্ডের মহারাণী তাঁর চাচা উইন্ডসরকে কোল-পাঁজা করে তুলে এনে তাঁর হ্যাটে কোহ-ই-নুরটি পরিয়ে দেবেন।

“কিবা হবে, কেবা জানে

সৃষ্টি হবে ফট

সংক্ষেপে বলিতে গেলে

হি টিং ছট।”

বিশেষ বিবেচনার পর আমি এস্থলে হি টিং ছট-টি ব্যবহার করেছি কবিশুদ্ধ যে অর্থে

ব্যবহার করেছিলেন ঠিক সেই অর্থে। আপাতদৃষ্টিতে অসাধারণ রহস্যময় কতকগুলো বৃক্ষরুকিকে যখন গভীর আধ্যাত্মিক তত্ত্বময় তাত্ত্বিক ধ্বনির মুখোশ পরানো হয় তখন সেটা হিং টিং ছট; সায়েবী ভাষায় আবরাকাডাবরা মাঝোজাঝো হাকাস পোকাস।

ভুট্টো শেখের এ-রাঁদেভুতে লাভবান হলেন কে?

নিঃসন্দেহে ভুট্টো।

চাঁড়াল ভুট্টো শেখের সঙ্গে একাসনে বসতে পেয়ে পৈতে পেয়ে গেলেন।

ইয়েহিয়া আনুষ্ঠানিক ভাবে প্রতিজ্ঞাবদ্ধ হয়েছিলেন তিনি আইয়ুবের স্বৈরতন্ত্র হটিয়ে গণতন্ত্রের প্রতিষ্ঠা করবেন। তার প্রথম পদক্ষেপের সঙ্গে সঙ্গেই দেখা গেল শেখ মুজীব নিরঙ্কুশ সংখ্যাগুরুত্ব লাভ করেছেন। তিনি স্বচ্ছন্দে একটি নিষ্কণ্টক সরকার নির্মাণ করতে পারেন। ইতিমধ্যে ময়দানের এক কোণ থেকে একটা লোক সার্কাসের ক্লাউন যে-রকম ওস্তাদের কেরামতি খেল দেখে চোঁচাতে আরম্ভ করে, “আমি পারি, আম্মো আছি—আমাকে ভুললে চলবে না”, ঠিক সেই রকম একটা লোক হাত পা হুঁড়ে বিকট চেল্লাচেল্লি আরম্ভ করলে, “শেখের পরেই আমি, আমাকে ছাড়া চলবে না।” সার্কাসের ম্যানেজার সদয় মঞ্চরার মুচকি হেসে হেসে “তো, আও বেটা, বাতাও তুমহারা খেল।” ম্যানেজার ইয়েহিয়া বললেন, “শাবাশ বেটা ভুট্টো।”

কিন্তু দীর্ঘ তেইশ বৎসর ধরে সর্বপ্রকারের অত্যাচার অবিচারের পর এই হয়েছে গণতন্ত্রের গোড়াপত্তন। তাই গোড়া থেকেই চলতে হবে অত্যন্ত সন্তর্পণে, আইনের পথে ন্যায়ের পথে—গণতন্ত্রের নাতিদীর্ঘ ইতিহাসে ভিন্ন ভিন্ন দেশে যে-সব উদাহরণ সৃষ্টি হয়েছে, নজির নির্মিত হয়েছে, সেগুলো প্রতি পদে সসম্মুখে মেনে নিয়ে। এটা তো সার্কাস নয়। গণতন্ত্রে ভাঁড়ামির স্থান নেই—সে ছিল আইয়ুবের “বেসিক ডেমোক্রাসিতে”।

“কে এই লোকটা?”

“আমি ভুট্টো; গণনির্বাচনে আমি দুই নম্বরের সংখ্যাগুরু। মুজিবের পরেই আমি। আমার সঙ্গে একটা রফারফি না করে সংবিধান বানাতে চলবে না।”

“বা—রে—! এ তো বড়ী তাজ্জবকী बात! মুজিবের পরেই তুমি! তা—সৃষ্টির ইতিহাস পড়লেই দেখি সদাপ্রভুর পরেই শয়তান। তাই বলে গড যখন সেরাফিম্ চেরাবিম্, গেব্রিয়েল নিয়ে ভগবানবাদে তাঁর ক্যাবিনেট নির্মাণ করলেন সেখানে তো শয়তানকে ডাকা হয়নি। এসব তাবৎ জঞ্জাল জড়ো করে তিনি বানাতেন কি? ঢাকা মীরপুরের চিড়িয়াখানা?

আর, বাই দি উয়ে, তোমার পর তো সংখ্যাগুরুতে ইনডিপেনডেন্ট ক্যানডিডেটস। তাদের সঙ্গে একটা সমঝোতা করে নিয়ে তার পর এখানে এসেছ তো? তুমি যেমন আমার ঠিক ঠিক নিচে বলে আমার সঙ্গে একটা রফারফির দাবী জানাচ্ছ, ঠিক তেমনি ওরাও তোমার উপর সেই দাবী চাপাচ্ছে না তো? করে করে তার পরের দলের দাবী তার উপরের দলের উপর চাপাবে এবং লিস্টের সর্বনিম্নে যে চোর উল্-আমিন লিক্ লিক্ করছে তাকে পর্যন্ত ভজতে ভজতে হবে। তার নামখানা থেকেই বুঝতে পারছো, ওর খাঁই মোটানো তোমার আমার কন্ম নয়—থুড়ি, আমার কন্ম নয়, কিন্তু তুমি পারবে! তুমি যখন মহামান্য সূচতুর ইয়েহিয়াকে বোঝাতে পেরেছ যে, গণতন্ত্রের পয়লা আইন হচ্ছে, নিরঙ্কুশ সংখ্যাগুরু প্রথম কর্তব্য সে যেন সংখ্যালঘুর ন্যাকরা বয়নাক্কার তোয়াজ করে করে কাজকর্মের ভার নেয়, ক্লাসের ফার্সট বয় যেন সেকেন্ড বয়ের সঙ্গে আলোচনা

করে তার মর্জিমাফিক আসছে পরীক্ষায় (সংবিধান নির্মাণে) অ্যানসার বুক লেখে—এরকম ভেঙ্কিবাঙ্কি যখন দেখাতে পেরেছে, তখন না হয় বলে দিয়ে চোর উল-আমিনকে যে তুমি তাকে তোমার বাড়ির পাশের মোনজোদড়োর সুলতান বানিয়ে দেবে। হ্যাঁ, আরেকটা কথা। তুমি এরকম হ্যাংলার মত ট্যাংস ট্যাংস করে ঘস্টাতে ঘস্টাতে ঢাকা এলে কেন? ঐ যে, তোমার হয় তো, বাপু, চেনা, শয়তান—সেও তো ভগবানবাদে গিয়ে গডের কাছে বায়না ধরেনি, আমাকে তোমার কেবিনেটে নাও। সে জানে হোয়াট ইজ হোয়াট। সে তার আপন শয়তান বাদে (মাস তিনেক পরের ঘটনা জানা থাকলে এগুলো অক্রেসে বলা যেত, “টিঙ্কা বাদে”) দিব্য তার মিতা ডেভিল, ইবলীস, বী এল জেবাব্ নিয়াজী, ইরফানকে নিয়ে তার আপন সংবিধান বানিয়ে নিয়েছে এবং বললে নিশ্চয়ই পেতায় যাবে, তার সরকার তেমন কিছু মন্দ চলছে না। তুমি বানাও না তোমার সংবিধান তোমার প্যারা ত্রিমূর্তি নিয়ে—যক্ষ রক্ষ গুপ্ত দিয়ে। এরা এক এক খানা আস্ত আস্ত চীজ। ওদের ঠেলায় দেখতে হবে না, শয়তান বাবাজীকে রাতারাতি ব্যবসা গুটিয়ে লারকানার হাইকোর্টে দেউলে হওয়ার নোটিশ টাঙাতে হবে।”

মস্করাটার বাড়াবাড়ি হচ্ছে? মোটেই না। পাঠক, একটু পরেই বুঝতে পারবেন। আমি এই ব্যাপারটা নিয়ে কতখানি জীবন-মরণ সিরিয়াস। আচ্ছা, তা হলে না হয় আমি একটা সিরিমাস উদাহরণ নিচ্ছি। মনে করুন, বছর কয়েক পূর্বে উইলসনের পরিবর্তে মি. ভুট্টো ছিলেন বিলেতের প্রধানমন্ত্রী। উইলসন-ভুট্টো নির্বাচনে হেরে গেলেন মি. হীথের কাছে। বিশ্বসংসার জানে চব্বিশ ঘণ্টারও কম সময়ের মধ্যে উইলসন প্রধানমন্ত্রী ভবন ১০নং ডাউনিঙ স্ট্রীট থেকে তল্লিতল্লা গুটিয়ে সরে পড়লেন। ভুট্টো সে-স্থলে কি করতেন? নিশ্চয়ই আবদার ধরতেন, “হীথের পরেই আমার ভোটাধিক্য। ও পেয়েছে ইংলন্ডে সব চেয়ে বেশী ভোট, আমি পেয়েছি স্কটল্যান্ডে সবচেয়ে বেশী ভোট (ইংলন্ড স্কটল্যান্ড আমি কথার কথা কইছি)। আমার সঙ্গে একটা সমঝোতা না করে দেখি হীথ কি করে ১০ নম্বরে ঢোকে? আমি বলছি কি, সে যদি নেয় ডাইনিংরুম আমি নেব ড্রইংরুম, তাকে দেব গাইয়ের মুখের দিকটা আমি বাঁটের দিকটা, সে নেবে কঙ্কে সাজানোর দিকটা আমি মুখে পুরবো গড়াগড়ার নলটা। সে কি! পূর্ব পাক কি আমার পর—একেই বলে সত্যকারের অনেস্ট ব্রাদারলি ডিভিশন।”

ভুট্টো জানতেন, বিলক্ষণ জানতেন, গণতন্ত্রে কি আইনত (ডি জুরে) কি কার্যত (ডি ফাক্টো) আওয়ামি লীগের গণদরবারে (ভিজা আ ভি) পয়লা সারিতে তাঁর কোনো আসন (লকাস স্টেন্ডি) নেই। তাই তাঁর ছিল আশ্রয় চেষ্টা, কোনো-গতিকে আওয়ামি লীগের দরবারের এক কোণেও যেন একটা আসন যোগাড় করে নিতে পারেন। তাই যদিও তিনি এলেন ঢাকঢোল বাজিয়ে প্রয়োজনাতিরিস্ত সান্সোপাস সঙ্গে নিয়ে, ভিতরে ভিতরে তিনি এলেন আতুর ভিখিরির মত হামাগুড়ি দিতে দিতে।

পাঠক, আপনি যতই অতিষ্ঠ হয়ে থাকুন না কেন আমি এই লিগেল, মরাল, সাংবিধানিক প্রত্যেকলীয় পয়েন্টটি কেচে ধুয়ে ইত্বি চালিয়ে ভাঁজ করে পকেটে না ঢোকানো পর্যন্ত ছাড়িছিনে। কারণ এটা বাঙলা দেশের ভবিষ্যৎ রাজনৈতিক ক্ষেত্রে এক অশিব মূর্তি নিয়ে বার বার দেখা দেবে। যাঁরা বাংলাদেশের মঙ্গল কামনা করেন তাঁদের এ-বিষয়ে পরিপূর্ণ সচেতন হওয়া উচিত। আমার অজানা নয়, বিষয়টি অত্যন্ত নিরস

কিন্তু সে কারণে আমি যদি এটা এড়িয়ে যাই তবে উভয় বাঙলার যে দু-একজনের সঙ্গে আমি এ নিয়ে তুমুল তর্কাতর্কি করেছি তারা আমাকে “আপ্তো একটা এসকেপিস্ট ভাঁড়ামি ভিন্ন অন্য কোনো সিরিয়াস বিষয় নিয়ে আলোচনা করতে চায় না।” বলে আমাকে প্রাপ্ত সার্কাসের ঐ ক্লাউনের সঙ্গে তুলনা করে বাকিস্তানে নির্বাসিত করবেন। আমি যে ভাঁড় ক্লাউন সেটা আমি অতীব স্খাঘার বিষয় বলে মনে করি, কিন্তু একটি নিবেদন এখানে আমাকে পেশ করতেই হল : সার্কাসের ক্লাউন তো এসকেপিস্ট হয় না—সে তো কুস্তি ওস্তাদের তাবৎ কেরামতি দেখাবার জন্যে সদাই শশব্যস্ত।

তা সে-কথা থাক। আমি এ প্রস্তাবনা উত্থাপন করেছি গুণীদের মুখ থেকে শুদ্ধমাত্র শোনবার জন্য, গণনির্বাচনে নিষ্কটক সংখ্যাগুরুত্ব লাভ করার পর বিজয়ী পার্টির কি কোনো দায় আছে, দ্বিতীয় কিংবা তৃতীয় পার্টির সঙ্গে সলাপরামর্শ করার—জাহান্নামে যাক তাদের সঙ্গে সমঝোতা করার। অতি অবশ্য এক-কথা সত্য, ভুল্টো যদি তাঁর পার্টির প্রতিভা হিসেবে—“আমি ভোটে দুই নম্বরী হয়েছি বা আমি সমুচা পশ্চিম পাকিস্তানের মোড়ল” সে হিসেবে নয়—আওয়ামি লীগ প্রধানের কাছ থেকে একটা ইস্টারভিউর প্রার্থনা জানান তবে—শেখ-চরিত্র আমরা যতখানি চিনতে পেরেছি তার থেকে বলতে পারি—তিনি বদান্যতার সঙ্গে সেটা মঞ্জুর করবেন।

কিন্তু সেটা হবে শেখের ব-দা-ন্য-তা।

মি. ভুল্টোর হ-ক্ নয়।।

পিণ্ডির পিণ্ডি বুধোর ঘাড়ে

রোমান সেনাপতি কুইন্টাস ফাবিয়াস যখন হানিবালের সঙ্গে সংগ্রামে লিপ্ত তখন তাঁর রণকৌশল ছিল সম্মুখযুদ্ধে মরণ বাঁচন লড়াই না লড়ে ক্রমাগত সুযোগের অপেক্ষায় দেবী করে করে যখন সুযোগ আসতো তখনো মুখোমুখি না লড়ে শত্রু-সেনার বাজুতে যেখানে সে দুর্বল সেখানে আঘাত হানা—কিন্তু সে আঘাতটা হত মোক্ষমতম। তাই সুযোগের অপেক্ষা করে আখেরে দুশমনকে ঘায়েল করার চাল বা স্ট্রাটেজিকে আজও বলা হয় “ফেবিয়ান” পদ্ধতি। মারাঠারা হুবহু, ঐ একই পদ্ধতিতে ঔরংজেবকে রণক্লাস্ত ও পরবর্তীকালে মোগলবাহিনীকে পরাজিত করে। এদিক দিয়ে দেখতে গেলে আমাদের মুক্তিযোদ্ধারা ঐ নীতি অবলম্বন করে সফলকাম হন।

এখানে কিছুটা অবাস্তব হলেও ইংলন্ডের “ফেবিয়ান সোসাইটি”র উল্লেখ করতে হয়। মার্কস-এংগেলস্ যখন আসন্ন “রক্তাক্ত শ্রেণীসংগ্রামের” প্রোপাগান্ডা করে যাচ্ছেন তখন তার শেষের দিকে বিলেতে একটি প্রতিষ্ঠান গড়ে ওঠে (১৮৮৪) ঐ নাম নিয়ে। ঐদের নীতি নির্দেশ আছে : “হানিবালের সঙ্গে সংগ্রাম চালিয়ে যাবার সময় ফাবিয়াস যে নীতি অবলম্বন করেছিলেন তোমাকে অসীম ধৈর্যসহকারে সুযোগের সেই শুভ লগ্নের জন্য প্রতীক্ষা করতে হবে—যদিও বহু লোক তখন ফাবিয়াসের সেই দীর্ঘসূত্রতাকে নিন্দাবাদ করেছিল; কিন্তু সে লগ্ন যখন আসবে তখন হানবে বেধড়ক মোক্ষম ঘা—নইলে তোমার সর্ব প্রতীক্ষা সর্বরের (সবুরতার) সমাপ্তি ঘটবে হাহাকার ভর নিষ্ফলতায়।

আওয়ামি লীগের গোড়াপত্তন থেকে ২৫শে মার্চ ১৯৭১ পর্যন্ত তার রণনীতি ছিল ফেবিয়ান—এ কথা বললে মোটামুটি ঠিক কথাই বলা হয়। বিশেষ করে ১৯৭০

ডিসেম্বরে নিম্ফটক মেজরিটি পাওয়ার পর থেকে ১৯৭১-র ২৫ মার্চ পর্যন্ত।

আরেকটি নীতিতে ফেবিয়ানরা দৃঢ় বিশ্বাস ধরতেন। “গণতন্ত্রের গর্ভে থাকে সমাজতন্ত্র। গণতন্ত্রের অর্থনৈতিক রূপ সমাজতন্ত্র (সোসালিজম)।”

আওয়ামি লীগ চিরকালই এ-নীতিতে বিশ্বাস করেছে—আজও করে। তবে সেখানেও সে ফেবিয়ান। আকস্মিক শ্রেণী-সংগ্রামের মাধ্যমে সে-সমাজতন্ত্র (অর্থ বণ্টনের সাম্য) রূপায়িত হবে না—হবে প্রগতিশীল সংবিধান নির্মাণ, আইনকানুন প্রণয়ন দ্বারা ক্রমবিকাশমান সমাজচেতনার শুভ বুদ্ধিকে উৎসাহিত করে, সমাজবিরোধী শোষণ নীতিকে পলে পলে নিষ্পেষিত করে।

সোসালিস্ট মাত্রই বিশ্বাস করে মানবসমাজ ক্রমশ সর্বপ্রকার সাম্যের দিকে এগিয়ে চলেছে—ধনবন্টনে সাম্য, রাষ্ট্রচালনায় সাম্য, ধর্মকর্মে সাম্য, ভিন্ন রাষ্ট্রের সঙ্গে পদমর্যাদায় সাম্য (নেশনালিজম)—দুর্বল রাষ্ট্রকে যখন বৃহত্তর, বলীয়ান পণ্ডরাষ্ট্র শোষণ-উৎপীড়ন করে, তাকে তার ন্যায্য সাম্য থেকে বঞ্চিত করতে চায়, তখন তাকে সর্বপ্রকারে সাহায্য করে দেওয়া তার রাষ্ট্রসাম্য—। প্রকৃত সোসালিস্ট মাত্রই সেই আগ্রাসী গতিবেগকে সংবিধানসম্মত নিরস্ত্র পদ্ধতিতে সাহায্য করে।

আজকাল আমরা মোক্ষ, নিজাৎ, ফান-বাক্য, নির্বাণ ইত্যাদিতে বড় একটা বিশ্বাস করিনে। তবু একটা সমান্তরাল উদাহরণ দেখালে তথাকথিত “সংস্কারমুক্ত ন-সিকে রেশনাল” জনও হয়তো কিঞ্চিৎ বিস্মিত তথা আকৃষ্ট হতে পারেন। ষ্ট্যান মিশনারি, যাঁরা প্রচার করেন, মুসলমান নারীর আত্মা নেই, তাঁরা বলেন, প্রভু বুদ্ধ নৈরাশ্যবাদী। আমরা বিশ্বাস করি তিনি ছিলেন পরিপূর্ণ আশাবাদী। তিনি বলেছেন, “বিশ্বমানব এগিয়ে চলেছে নির্বাণের দিকে। আখেরে নির্বাণ পাবে সর্বজন—সর্ব মানব থেকে আরম্ভ করে সর্ব কীটপতঙ্গ। এরা চলেছে যেন নদীর ভাটার স্রোত ধেয়ে। তাকে উজানে চালানো অসম্ভব। কিন্তু শ্রোতগামী কাঠের টুকরোটাকে বৃহত্তর কাষ্ঠখণ্ড দ্বারা যেরকম সেটাকে কিঞ্চিৎ ডাইনে-বাঁয়ে সরানো যায় কিংবা তার গতিবেগ বাড়ানো যায়, মানুষ ধর্মসাধনা দ্বারা ঠিক সেই রকম নির্বাণের দিকে তার গতিবেগ বাড়িয়ে দিতে পারে।” এককথায়, কি ফেবিয়ান, কি কম্যুনিষ্ট, কি বৌদ্ধ সকলেই চরম গন্তব্যস্থল সম্বন্ধে আশাবাদী।

পরিষ্কার বোঝা যাচ্ছে, শেখ সাহেব এবং আওয়ামি লীগের প্রধানগণ ফেবিয়ান যেঁযা সোসালিস্ট। পক্ষান্তরে প্রকৃত বামপন্থী ছিলেন মৌলানা ভাসানী। ওদিকে লেফটেনেন্টে কমান্ডার মুয়াজ্জম হুসেন যে মতবাদ পোষণ করতেন সেটা অতি সংক্ষেপে প্রকাশ করা যায়—“হয় দফা বনাম এক দফা।” তিনি বলতেন, “আমি পশ্চিম পাকীদের খুব ভালো করেই চিনি। ওদের সঙ্গে বাঙালির কম্বিনকালেও মনের মিল স্বার্থের ঐক্য হবে না। হয় পয়েন্টের ধানাই-পানাই না করে সোজাসুজি এক দফায় বলে দাও, “চাই স্বরাজ, পূব বাঙলায় সম্পূর্ণ স্বাধীন সবশক্তির স্বতন্ত্র রাষ্ট্র।” আইয়ুব এবং ইয়েহিয়া দুজনাই মুয়াজ্জমের এককাটা জাতীয়তাবাদের কথা ভালো করেই জানতেন। “তাই কুখ্যাত আগরতলা মামলার” যে নথিপত্র আইয়ুবের আদেশে স্বয়ং ইয়েহিয়া তৈরী করেন তার আসামীর ফিরিস্তিতে অন্যতম প্রধান ছিলেন মরহুম মুয়াজ্জম। টিক্কা খানও একথা ভোলেননি। তাই ২৬ মার্চ ভোরবেলা তাঁকে নৃশংসভাবে, তাঁর স্ত্রীর চোখের সামনে হত্যা করা হয়। জনৈক প্রত্যক্ষদর্শী সে নিষ্ঠুর হত্যাকাণ্ডের কথা আমার সঙ্গে দেখা হওয়া মাত্রই

সর্বপ্রথম উল্লেখ করেন। সে কাহিনী এমনই পাশবিক যে তার বর্ণনা দেবার মত শক্তি আমার নেই। যেটুকু পারি যথাসময়ে দেব।

অথচ মি. ভুট্টোর বিবরণী মাফিক শেখ পয়লা নম্বরী ফ্যাসিস্ট। মনে হয়, ভুট্টো প্রথম একখানি প্রামাণিক অভিধান খুলে ফ্যাশিস্‌মো শব্দটির অর্থ দফে দফে টুকে নিয়েছেন। তারপর মুসোলিনী এবং হিটলার দুই পাড় ফ্যাসির কর্মপন্থার তসবিরের নিচে রেখেছেন একখান আনকোরা কার্বন পেপার। উপরে বুলিয়েছেন একটা দড়ি বলপয়েন্ট। হো প্রেস্টে!—ভানুমতীকা খেল—তলার থেকে বেরিয়ে এল, মুজিবের ছবি।

যথা :

হিটলার ধনপতিদের কাছ থেকে পেতেন টাকা।

মুজিব পেতে লাগলেন অটেল টাকা এবং অন্যান্য উপাদান। (ম্যাসিড মানিটারি অ্যান্ড মেটিরিয়াল এসিস্টেন্স)—ব্যাঙ্কার এবং ধনপতিদের কাছ থেকে (ব্যাঙ্কারস অ্যান্ড বিগ বিজনেস)। উবাচ ভুট্টো।

এই একটিমাত্র বাক্য যেন একটি জুয়েল। ন্যাড়খানাগত উজ্জ্বল নীলমণি।

যেন এক্কেবারে খাঁটি যোগশাস্ত্রের সূত্রে বাঁধা আস্ত একটি কণকমঞ্জরী :

যক্ষকুবের প্রসাদাৎ অর্থং চ বিস্তং চ।

ন-ন-নাঃ। যে ভুট্টো মিএগ বাঙলাভাষার নামেই ফ্যাকচুরিয়াস তাঁর পাক জ্বানে কাফেরী কালাম! তওবা, তওবা!

বরণ্য সিন্ধীভাষা ফার্সীর হনুকরণ করে। যেমন মি. ভুট্টোর সম্পূর্ণ অপরিচিত নয় এমন এক সম্প্রদায়কে আহ্বান করতে গিয়ে ইরানী কবি যে চারিটি শব্দ ব্যবহার করেছেন সিন্ধী ভাষাতে সেগুলো সুবো-শাম—বিশেষ করে শাম সঙ্কেবেলা—এস্তেমাল হয়—রিন্দ, মস্ত, দেওয়ানা, শরাবী। তাই ফার্সীতেই না হয় দোহা গাঁথি :—

অমদ জর ওরা আমদ সরঞ্জাম,

আজ সররাফ ওয়াজ নিমকহারাম।

ভাণ্ড ভাণ্ড স্বর্ণ আর সর্ব অবদান।

ঢেলে দিন সুদখোর আর বিস্তবান॥

পাঠাস্তর

ঢেলে দিল ব্যাঙ্কার, নেমকহারাম॥

এ তো হল সূত্র নির্মাণ কিন্তু এই আজব ভুট্টাপুরাণের মল্লিনাথ হবার মত পেটে এলেম ধরেন হেন জন তো এ ঘোর কলিকালে দেখতে পাচ্ছিনে। অতঃ মধবভাবে শুড়ং দদ্যাৎ।

(ক) ব্যাঙ্কারা নাকি টাকা দিত, আওয়ামি লীগকে—ভুট্টো বলেছেন, শেখকে পার্সনেলি।

এষ স্য অবতরণিকা : শেখের পূর্বপুরুষ সর্ব শুয়ুখ নিশ্চয়ই বহু পুণ্য সঞ্চয় করে গিয়েছিলেন যে সিন্ধুর কঙ্কি ভুট্টাবতার শেখকে “সিন্ধী” “কলমা” পড়িয়ে ভুট্টো ইয়েহিয়া গোত্রে অন্তর্ভুক্ত করে এ আপ্তবাক্য ঝাড়েঁনি যে, তাঁরা যে কায়দায় পঞ্চমকারের সাধনায় পয়সা ওড়ান শেখও ঐ প্রাণাভিরাম পদ্ধতিতে পার্টি ফন্ডের কড়ি উড়িয়েছেন!

বলা বাহুল্য, শেখের জেবে ক-কড়ি ক-ত্রাণ্ডি ছুঁচোর নৃত্যের কেন্দ্র চালাচ্ছে সে তত্ত্ব ভুট্টো তাঁর ভুবন-ছোড়া টিকটিকি প্রসাদাত উত্তমরূপেই জানতেন। সেখানে কানাকড়ির

গড়বড় থাকলে ব্যারিস্টার তুট্টো কি ছেড়ে কথা কইতেন? ঢাকার “বাজল” হাইকোর্টের চিলকোঠায় উঠে চিল-চ্যাচানোর কর্কশ কণ্ঠে সে কলেঙ্কারিটা প্রচার করতেন না?

মূল টীকা : “ব্যাঙ্কারেরা শেখকে টাকা দিয়েছিল।” এস্থলে সেই প্রাচীন প্রবাদ মনে আসে “মোটাই মা দ্যায় না খেতে—তার আবার কাঁড়া-আকাঁড়া।” উভয় পাকিস্তান মিলিয়ে বাঙালি ব্যাঙ্ক ছিল সর্বসাকুল্যে কটা? দুটো! তাদেরই বা রেষ্ট ছিল কতটুকু যে রাজনীতির ঘোড়দৌড় ব্যাক করতে যাবে? আওয়ামি লীগের মত ডার্ক হর্সকে—বিশেষ করে সবজান্তা সরকারি মহল থেকে ফিসফিসেনি কানাঘুষো যখন চতুর্দিকে চক্কর খেয়ে বেড়াচ্ছে “শেখ মেরে-কেটে ৮০টা ভোট পায় কি না পায়”?...আর পশ্চিম পাকিস্তানী ব্যাঙ্কগুলো টাকা দেবে লীগকে? এর উত্তরে শুধু ঢাকাইয়া উত্তর একমাত্র সম্বল : “আপ্তে কয়েন কর্তা—ঘোরায়ে হাসবো।”

কতকগুলো লোফার বোম্বেষ্টে পিক-পকেট একদা কলকাতায় এসে নেমেছিল বাণিজ্যের নামে হয় মুর্শিদাবাদ-দিল্লীতে ভিখ মাঙতে নয় শাস্ত সরল অতিথিবৎসল বাজলির সর্বস্ব লুট করতে। তারপর কিস্মৎ, পতন-অভ্যুদয়ের অলঙ্ঘ্য বিধানই বলুন, পূর্বজন্মের কর্মফলেই বলুন,

“বাণিকের মানদণ্ড

পোহালে শর্বরী

দেখা দিল রাজদণ্ড রূপে।”

যে দাঁড়িপাল্লার ঘামে ভেজা তেলচিটে উঁটটায় হাত দিতে গা ঘিন ঘিন করে সেটা দেখি আঁধারে গুড়িগুড়ি সিংহাসন বেয়ে উঠে রাজদণ্ডরূপ ধরে বেনের “পোলাডার” হাতে তিড়িং বিড়িং করে লাফাচ্ছে।

যে বোহরার পো পশুদিন তক্ বোম্বায়ের রাস্তায় রাস্তায় ভাঙা ছাতা মেরামত করে দিনগুজরান করতো যে খোজার ব্যাটা বটতলায় ইটের উপর খন্দের বসিয়ে “নোয়ার ড্যাটার” “ইটালিয়ান” চশমা বেচত, যে যেমন উদয়াস্ত কেনেস্তরার তৈরী ঝাঁঝি বদনা ফেরি করে বেড়াত আর যে কচ্ছী ভুগুকেছের গলিতে গলিতে “তাল্লা কুঞ্জিনা ধান্দা” করে চাপাতী শাক খেত তারা ফাদার অব দি নেশনের কেঁরপায় ঢাকায় এসে রাতারাতি হয়ে গেল শেঠিয়া, মালিক, শিল্পপতি, আঁতরপ্রবর, চেম্বার অব কমার্সের চেয়ারমেন এবং সর্বোপরি বিশ্বজুটের সর্বাধিকারী হর্তা-কর্তা বিধাতা। আর ছাপরা ইন্সটিশানের বেহারী মুটে হল ট্রাফিক ম্যানেজার।

এবং এদের তুলনায় ইসপাহানী গোষ্ঠী তো রীতিমত খানদানি মনিষি, শরীফ, আশরাফ। এদের ঠাকুর্দার বাবা এসেছিলেন ঘোড়া খচর বিক্রী করতে ইরান থেকে শ্রীরঙ্গপট্টমে, টিপ্পু[১] সুলতানের আস্তাবলে।

তালাকুঞ্জির ফেরিওলা থেকে ইঁটে বৈঠানওলা পরকলা বেচনেওলার দাপট তখন দেখে কে?—নারায়ণগঞ্জ-ঢাকা-টঙ্গী জুড়ে! দস্তে দেমাকে যব চার্নক থেকে গলস্টনকে তারা তখন তুড়ি দিয়ে নাচাতে পারে। সুবে পাকিস্তানের ফাদার মাদার পি এ এস (সিভিল সার্ভিস) তাদের নাম স্মরণে এনে ঢাকার সেকেন্ড ক্যাপিট্যাল “আইয়ুব নগরে” প্রবেশ করে।

(১) ঢাকা শহরে একটা “টিপ্পু রোড” আছে। উচ্চারণটা টিপ্পু।

সুবে পাকিস্তানের এইসব শাহ-ইন-শাহরা দাঁতে কুটো কেটে, ভেটের ডালি মাথায় করে যাবেন কোথাকার সেই ফরিদ-পুরা গাঁইয়া মহলিখোরকে পাস?

আর এঁদের তল্লিদার, যদ্যপি জমিদার তথাপি মস্তগাদাতা জুলফিকার ভাই-আলীজী-ভুট্টোওয়ালা তখনো কি তাঁদের ছশিয়ার করে দেন নি, “ওরে, তোরা যাচ্ছিস কোন্ বাগে? ওই লোকটাই তো কসম খেয়েছে, বাঙালিকে ফিন্ বাঙলার রাজা বানাবে।”

আর টাকা দিয়েই যদি দেশের দেশের সম্মতি মহব্বত কেনা যেত তবে টাকার কুমির ভুট্টো তাঁর আপন দেশ সিন্ধুর দক্ষিণাঞ্চলের ভোটগুলো পাইকিরি হিসেবে কিনলেন না কেন? বেলুচিস্তানে ব্লাকো, আর সীমান্তে কুন্সে একটা ভোট পেলেন কেন?

গায়ের ছেলে মুজিবের তরে ছিল দেশের দেশের দরদ মহব্বৎ। তাঁকে তো “কড়ি দিয়ে কিনলেম” রেওয়াজ নিরিখে শুটকি হাটের কায়দাকেতায় ভোট কিনতে হয় না।

মি. ভুট্টোর আরেক কুৎসা : সদাগরদের কাছ থেকে যে টাকা পায় তাই দিয়ে মুজিব অস্ত্র সংগ্রহ করেছিল।

হায়, হায়, হায়! মাথা থাবড়াতে ইচ্ছে করে। তাহলে পশ্চিম পাকী পিশাচেরা এদেশে ন-মাস ভূতের নাচ না নেচে ন-দিনেই খতম হত।

কুৎসার কত ফিরিস্তি দেব? এ যে অন্তহীন।

ভুট্টো যে আজো ভূবনময় দাবড়ে বেড়াচ্ছেন সেটা বহু পূর্বেই উবে যেত যদি এই শেষ মেছোহাটার বদবোওলা গালটার এক কড়িও সাক্ষ্য হত : মুজিব ভাড়াটে গুণ্ডাদের মদদ দ্বারা ঘায়েল করতেন নিরীহ নাগরিককে।

পুনরপি হায়, হায়। তাই যদি হত তবে স্বয়ং ভুট্টো সাহেব ২৬ মার্চ মুক্তকচ্ছ হয়ে, পড়িমড়ি করে, ইয়েহিয়ার পাইলটদের কোমর জাবড়ে ধরে ঢাকা থেকে পালিয়ে জানাট বাঁচাবার ছোটাসে ছোটো মোকাটা পেতেন কি?

এবং এটা যে কতবড় নির্লজ্জ মিথ্যা সেটা আর সবার চেয়ে স্বয়ং ভুট্টোই জানেন সবচেয়ে বেশী। নইলে তিনি দু-দুবার পা ঘষ্টাতে ঘষ্টাতে ঢাকা আসতেন না, নিছক মুজিবের উঠোনে কঙ্কেটা পেতে।...আসলে টাকাটা সাপটেছিলেন কোন্ গোঁসাই? ভুট্টো মিঞা। তাই লোকে বলে, “খেলেন দই রমাকান্ত, বিকেরের বেলা গোবদন।”

কিন্তু এ-সবের সব কিছু ছাড়িয়ে যায় যে ঘৃণ্য, ন্যাকারজনক আচরণ যেটা মানুষ জীবনভর ভুলতে পারে না সেটা :—

সবাই জানতো, ভুট্টো জানতেন মুজিব তখন পশ্চিম পাকে কারারুদ্ধ। তিনি কোনো কুৎসা, কোনো নিন্দা, কোনো অভিযোগ, কোনো অবমাননার উত্তর দিতে পারবেন না। তাঁর প্রাণবায়ু অনিশ্চয়।

নিতান্ত ইতরজনও এ অবস্থায় তার দূশমনকেও গাল দেয় না।

কিন্তু বিলেতের ব্যারিস্টার, ল’ একসপার্ট ভুট্টো জানেন আইনে সেটা বাধে না।

তাই ভাবি, পাকিস্তানের প্রেসিডেন্ট হতে হলে কত না এলেমের প্রয়োজন॥

মধুঝড়। ২৭ জানুয়ারী ১৯৭১ সালে জমিদার ভূট্টো অবতীর্ণ হলেন ঢাকা নগরীতে।

নেমেই নাকি বললেন, “আমি আমার বড়দার সঙ্গে কথা কইতে এসেছি।”

সূবে পূব পাকিস্তান পরিতৃপ্তি সহকারে উচ্চধ্বনি করলে, “ওহো হো, হো, কি বিনয়, কি বিনয়। জুনাগড় রাজ্যের পরম প্রতাপশালী ভূতপূর্ব প্রধানমন্ত্রীর ঔরসে তথা বহু কলায়, বিশেষত সঙ্গীতে পারদর্শিনী অনন্যা শ্রিয়দর্শিনীর গর্ভে যাঁর জন্ম তিনি কিনা আমাদের গাঁয়ের সাদামাটা মুসল্লি মিয়া সাবের “পোলাডারে” বড় ভাইসাব কইলেন! খানদানী ঘরের মনিষ্য অইব না ক্যান?”

আসলে কিন্তু এটা কি সেই “বুড়ো শালিকের ঘাড়ে রৌঁ”-র নায়েবজীর উদয়াস্ত “নারায়ণ নারায়ণ! হরি হে তুমিই সত্য” বুলি আওড়ানোর মত নয়? দুটোই আগাপাশতলা নির্ভেজাল ভণ্ডামির প্রহসন।

এ তামাশার দশ বারো বৎসর আগের থেকেই পশ্চিম বাঙলায় প্রকাশিত পুঁথি-কেতাব পূব বাঙলায় আসা বন্ধ হয়ে গিয়েছে—মায় রবীন্দ্রনাথের কাব্য। তাই সেই বহুল প্রচারিত কবিতাটির নীতিবাক্য যদি ঢাকাইয়ারা ভূট্টোর “দাদা, দাদা” সম্বোধনের সময় স্বরণে না এনে থাকেন তবে উদ্ভা প্রকাশ করা অনুচিত।

কুটুস্থিতা বিচার

কেরোসিন-শিখা বলে
মাটির প্রদীপে
ভাই বলে ডাক যদি
দেব গলা টিপে।
হেনকালে গগনেতে
উঠিলেন চাঁদা—
কেরোসিন বলি উঠে,
এস মোর দাদা!

পূর্বেই বলেছি মি. ভূট্টো আমাদের শেখের বর্ণে উঠতে চেয়েছিলেন, এখন তিনি তাঁর ভাই হতে চান! তিনি এদানির আশমানে ওড়ান “ইসলামী” ঝাণ্ডা; ইসলাম অনুযায়ী ভাইয়ে ভাইয়ে সমান বখরা। পশ্চিম পাকের জন-সংখ্যা পূব বাংলার চেয়ে কম। অতএব ভূট্টো-ভাই পূব বাংলারও একটা হিসেব পাবেন।

দীর্ঘ তিন দিন ধরে শেখ সম্প্রদায় আপ্রাণ চেষ্টা দিলেন ভূট্টো কি চান সেটা জানতে। বাংলাদেশ কি চায় সে তো জানা কথা। প্রাদেশিক স্বায়ত্তশাসন। ভূট্টোও তাতে স্বীকৃতি দিয়েছেন। তাহলে গেরোটো কোথায়?

ভূট্টোর মনের গভীরে দৃঢ়তর বিশ্বাস, আওয়ামি লীগ ভিতরে ভিতরে শুধু তাকে তাকে আছে, কি করে আখেরে পশ্চিম পাকিস্তানের সঙ্গে সর্ব সম্পর্ক ছিন্ন করে স্বয়ং সম্পূর্ণ স্বাধীন সার্বভৌম রাষ্ট্র নির্মাণ করতে পারে। ভূট্টো তাঁর কেতাবে স্বীকার করেছেন

যে, এই সময়ের কিছু আগে ইয়েহিয়ার প্রধান উপদেষ্টা গীরজাদা যখন তাঁকে জিজ্ঞেস করেন “আওয়ামি লীগ চায়টা কি?” তখন তিনি মাত্র একটি শব্দে তার উত্তর দেন, “সিসেশন”। কেটে পড়তে চায়।...পশ্চিম পাকিস্তান বাংলাদেশকে না দেয় খেতে না দেয় পরতে, অথচ তিনি কিল মারার গোসাই। সেই ঋসমের কাছ থেকে সে চায় তালুক— এইভাবে বললে পূর্ব পশ্চিম উভয় বাংলার হিন্দু মুসলমান তত্ত্বটা স্পষ্ট বুঝতে পারবে।

এ কথা অতিশয় সত্য, সেই বখতিয়ার খিলজির আমল থেকে—এবং আমার ব্যক্তিগত দৃঢ় বিশ্বাস তাঁর পূর্বে বৌদ্ধ হিন্দুযুগে, এক কথায় অনাদি অনন্তকাল থেকে বাংলাদেশ কস্মিনকালেও দিল্লির বশ্যতা স্বীকার করতে চায়নি। বার বার স্বাধীন হওয়ার জন্য সংগ্রাম করেছে। বাজারে চালু ইতিহাসে কিন্তু পাবেন, বুদ্ধ ঐতিহাসিকরা প্রতি অনুচ্ছেদে লিখছেন, “এরপর বেঙ্গল রেবেলড এগেনস্ট দি (দিল্লি) এমপেরর।” যেন ঐতিহাসিক দিল্লি রাজদরবারের বেতনভোগী, হিজ মেন্ডেসিটজ মোস্ট অবিডিয়েন্ট স্নেভ, দিল্লির হজুরের সাম্রাজ্যলোভী ইমপিরিয়ালিস্ট কলনিয়ালিস্ট চশমা পরে সত্যমিথ্যা ন্যায়-অন্যায় বিচার করে ইতিহাস লিখছেন—ইংরেজ য়ে-রকম ১৯৫৭-র স্বাধীনতা সংগ্রামকে যতখানি অপমান করতে পারে সেই বদ মতলব নিয়ে তার নাম দিয়েছে “সিপয় ম্যুটিনি”। ইন্ডিয়ান রেবেলিয়ান নাম দিলেও যে আন্দোলনের খানিকটে ন্যায্যতা স্বীকার করে নেওয়া হয়!

মোটাই ধান ভানতে শিবের গীত নয়।

এই বেলাই আমরা যেন এই নমাসের দুঃখদহনের মূল তত্ত্বটি পরিপূর্ণরূপে হৃদয়ঙ্গম করে নি। এই তত্ত্বটিই একমাত্র তত্ত্ব—অখণ্ড শাশ্বত সত্য। রাজনীতির ক্ষেত্রে একমাত্র কল্যা, একমাত্র ইমান। এটা সর্বক্ষণ হৃদয়ে পোষণ না করলে কোনো দরকার নেই ঐ নমাস নিয়ে বিন্দুমাত্র কালির অপব্যয় করা। আমরা যেন ঘৃণাক্ষরেও আমাদের আরাম-পিয়াসী মনকে এই বলে সাবুনা দি, এ নমাস একটা দুঃস্বপ্ন, স্বাভাবিক জীবনযাত্রার মাঝখানে একটা উটকো ব্যত্যয়—এটা গেছে, এখন থেকে আমরা চলবো গোলাপের পাণ্ডি বিছানো শস্যশ্যামল সোনার বাংলার জনপদভূমির উপর দিয়ে এবং পথের শেষে পাবো কোরমা-পোলাওয়ার খুশবাই ভরা পদ্মাসাইজের ইয়া বিরটি দাওয়াত-বাড়ি, ভোজনাঙ্কে তার চেয়েও বিরটি জলসাঘর, সেখানে অন্তহীন সঙ্গীত, নৃত্য, মধুচন্দ্রিকা।

না, না, না।

স্বাধীনতা সংগ্রাম যখন তার চরমে তখন কে একজন জেনারেল আতা উলগনী উসমানিকে শুধিয়েছিলেন, “এ-লড়াই আর কতদিন চলবে?” ক্ষণতরে চিন্তা না করে তিনি বলেছিলেন, “ফর ডিকেডস”;—দশাধিক বৎসর, দশং দশং বৎসর—তারপর তিনি “মে বী” হতেও পারে বলেছিলেন কি না সেটা নিতান্তই বাহ্য।

কারণ জেনারেল (এর চেয়ে কত অল্পে কত সেপাই ফিল্ড মার্শাল হয়েছে।) ওসমানি বাংলাদেশের “সামরিক ইতিহাস” উত্তমরূপে অধ্যয়ন করেছেন। তিনি খাঁটি বাঙাল। তাই তিনি শুধু জার্মান ক্লাউজেভিৎসের “রণনীতি”, আউস্টরলিৎস, ওয়াটারলু, স্টালিনগ্রাদ, নরমাদিই পড়েন নি—তাঁর স্মৃতিতে আছে বাংলাদেশের সৌনঃপুনিক শতশত বর্ষব্যাপী মুক্তি সংগ্রামের ইতিহাস। যে কারণে পশ্চিমপাকের মিলিটারি বড়কর্তারা তাঁকে সামনাসামনি বলেছেন তিনি শভিনিস্ট; পেরোকিয়াল।

তিনি জানতেন, যে দেশ সাতশ’ বছর ধরে—সেটুকুর ইতিহাস তো দিল্লীতে লেখা

একচোখো ফার্সী কেতাবেই আছে—ক্রমাগত স্বাধীনতা সংগ্রাম চালিয়ে গিয়েছে তার পক্ষে “এক ডিকেড, দু ডিকেড”—ই তো স্বাভাবিক নিয়মানুযায়ী। কে জানে, আরো বেশী হতে পারে।

আজ না হয় বাংলাদেশের দুঃখদৈন্য চরমে পৌঁছেছে কিন্তু এটা তো এমন কিছু নিত্যকালের তত্ত্বকথা নয়। প্রাচুর্য আর সৌন্দর্য এদেশের সর্বত্র। সেই তার চিরন্তন স্বরূপ। তাই তার দিকে সকলেরই লোলুপ দৃষ্টি। পাঠান মোগল বাদশাদের তোষাখানাতে দুপয়সা জমে গেলেই তাঁদের নজর যেত এই উপমহাদেশের পূর্বাচলের দিকে—সে রমণী সুজলা সুফলা। এ স্থলে ধর্ম নিয়ে বাদানুবাদ করা ধর্মকে বিভ্রান্ত করা মাত্র। দিল্লির বাদশারা ছিলেন মুসলমান; গোড়ার দিকে না হোক, পরে বাংলার অধিবাসীর অধিকাংশই ছিল মুসলমান। এদের কতল করতে তবু তাদের বাধেনি। তাদের কিন্তু কিছুটা শালীনতাবোধ ছিল। বিংশ শতাব্দীর লাহোরী মোম্বাদের মত দিল্লীর মোম্বারা অতখানি জাহান্নমের অধঃপাতে যায় নি; তারা বাংলাদেশের “বিদ্রোহ” দমনের সময় ‘ইসলাম ইন ডেঞ্জার’ জিগির তুলে বাঙালী মুসলমানকে “কাফির” ফাৎওয়া দিয়ে, জাল “জেহাদ” চালিয়ে নিজেদের পরকাল খোঁওয়ায় নি। রাজ্য বিস্তারে কলোনি শোষণের সময় ধর্ম অবাস্তব,—দেশটার প্রাচুর্য বাস্তব সত্য।

বাংলাদেশের ছিল। যেমন এককালে ইতালির সৌন্দর্য ও প্রাচুর্য দুই-ই ছিল বলে তার দিকে ছিল বহু জাতের লুন্ড দৃষ্টি। তাই ইতালির কবি ফিলিকাজা একদা কেঁদেছিলেন :

ইতালি, ইতালি, এত রূপ তুমি
কেন ধরেছিলে, হয়!
অনন্ত ক্রেশ লেখা ও ললাটে
নিরাশায় কালিমায়!

নইলে কবিগুরুই বা বাঙালীর জন্য এমন মর্মান্তিক প্রার্থনা করতে যাবেন কেন?

প্রতাপ যখন টেঁচিয়ে করে
দুঃখ দেবার বড়াই, (১)
জেনো মনে, তখন তাহার
বিধির সঙ্গে লড়াই।
দুঃখ সহ্য তপস্যাতেই
হোক বাঙালীর জয়!

কী বাঙালীকে চিরকাল করতে হবে দুঃখের তপস্যা! এ কি আশীর্বাদ, না অভিসম্পাত!

সাতশ’ বছরের ঐতিহ্য তোমার, হে বাঙালী স্বাধীনতার জন্য বার বার বিদ্রোহ করা, রক্তাক্ত সংগ্রামে আত্মবিসর্জন দেওয়া—না হয় তুমি সে ঐতিহ্য সম্বন্ধে আজ সচেতন নও, কিন্তু ঐ যে নয় মাসের সংগ্রাম—মাতার অশ্রুজল, বধূর হাহাকার—সে কি তুমি

(১) এ স্থলে “টিকা যখন টেঁচিয়ে করে/দুঃখ দেবার বড়াই”

বললে “টিকা” ও “দুঃখ”—এর একটা/মধ্যানুপ্রাস পাই।

কখনো ভুলতে পারবে?

তোমার কি মুহূর্তের তরে মনে হয়, অদ্বিতীয় এই পাশবিক নিষ্ঠুরতার বিরুদ্ধে
অস্ত্রধারণ না করলেও চলতো?

তোমার কি চিন্তাধৌর্য দেখা দিয়েছিল কভু ক্ষণতরে, এ দুঃসহ সংগ্রাম আর
কতকাল ধরে লড়াবো?

তুমি কি ভয় পেয়েছিলে?

না।

দুঃখ সহ্য তপস্যাতেই

হোক বাঙালীর জয়।

ভয়কে যারা মানে

তারাই জাগিয়ে রাখে ভয়।

আর সর্বোত্তম অমূল্য কি শিক্ষা তুমি লাভ করলে?

তোমার দেশকে যখন সর্বসমক্ষে ক্রুশবিদ্ধ করা হল তখন বিশ্বনায়কগণ ক্লীব
নপুংসকের মত কী ঘৃণ্য আচরণ করলেন। তাঁরা তোমার মৃত্যুযজ্ঞা পলে পলে দেখলেন।
কিন্তু তুমি যে প্রভু ঋষ্টের মত দুঃখ সহ্য তপস্যা দ্বারা নবজীবন লাভ করবে সে আশঙ্কা
তাঁরা করেন নি।

কিন্তু তুমি যে একবারে হতভাগ্য মিএহীন নও সে অপ্রত্যাশিত বৈভবও তুমি লাভ
করলে সংগ্রামের অপরাহ্নবেলা।

এইবারে মূল সত্য, শেষ সত্য।

আবার আসবে নব দুর্যোগ। ঐসব ক্লীব নপুংসকদের শবদেহেই সঞ্চারিত হবে
প্রেতাত্মা বেতাল। আবার আসবে দুঃখের তপস্যা। তাই জয়ধ্বনি করো :

দুঃখ সহ্য তপস্যাতেই

হোক বাঙালীর জয়।।

—আত্ম দিয়ে, ইজ্জৎ দিয়ে, ইমান দিয়ে—

পলাশির যুদ্ধের পর বাংলাদেশের জীবন-মরণ সঙ্কট আসে ২৫ মার্চ ১৯৭১-এ। তার
পূর্বের দু মাস—ফেব্রুয়ারি ও মার্চ ধরে—পূর্ব পশ্চিম উভয় পাকিস্তান যেন গ্রীক ট্রাজেডির
নিয়তির অলঙ্ঘ্য নির্দেশে দুর্বীর গতিতে ধাবমান হল কোন এক করাল অস্ত্রাচলের দিকে।
আবার সেই নিয়তিরই প্রসন্ন নির্দেশেই এক শুভ প্রভাতে জয়ধ্বনি উঠলো,

হোক, জয় হোক

নব অরুণোদয়।

পূর্ব দিগঞ্চল

হোক জ্যোতির্ময়।।

আর্য সভ্যতার পূর্বতম প্রান্ত, পূর্বাচল পূর্ব দিগঞ্চল বাংলাদেশ।

ভারতের জাতীয় সঙ্গীতের সর্বশেষ শ্লোকেও আছে :

রাত্রি প্রভাতিল,

উদিল রবিচ্ছবি

পূর্ব-উদয়গিরি বালে—

বাংলাদেশই পূর্ব উদয়গিরি। সে তার ভালে যে টিকা ঐক্কেছে সেটি “রবিচ্ছবি”, কবি রবির আঁকা ছবি, বাংলাদেশের জাতীয় সঙ্গীত—আমার সোনার বাংলা, আমি তোমায় ভালবাসি।

কবি আরো বলছেন, “ওরা বেরিয়ে পড়েছে; ওদের কপালে লেগেছে সকালের আলো, ওদের পারানির কড়ি এখনো ফুরোয় নি; ওদের জন্য পথের ধারের জানলায় জানলায় কালো চোখের করুণ কামনা অনিমেমে চেয়ে আছে : রাস্তা ওদের সামনে নিমন্ত্রণের রাঙা চিঠি খুলে ধরলে, বললে, ‘তোমাদের জন্য সব প্রস্তুত।’

ওদের হৃৎপিণ্ডের রক্তের তালে তালে জয়ভেরী বেজে উঠলো।”

আর পশ্চিম পাকিস্তান? তার জন্য নিয়তি কি নির্ধারিত করছেন? আমি তো দেখছি, তাদের সম্মুখে অন্ধকার। বিপাকের বিভীষিকা রক্তনীর পরে ওদের জন্য কোনো শুভ উষার শুকতারা আমি তো দেখতে পাচ্ছি নে।

কবি যেন ওদের ভবিষ্যৎ সম্বন্ধে ইঙ্গিত দিচ্ছেন মাত্র :—

“এখানে সবাই ধূসর আলোয় দিনের শেষে পাছশালার আভিনায় কাঁথা বিছিয়েছে; কেউ বা একলা, কারো বা সঙ্গী ক্লাস্ত; সামনে পথে কী আছে অন্ধকারে দেখা গেল না, পিছনের পথে কী ছিল কানে কানে বলাবলি করছে; বলতে বলতে কথা বেধে যায়, তার পরে চূপ করে থাকে।”

সেই দুমাসের কাহিনী; জানুয়ারী ২৯ থেকে মার্চ ২৫।

২৯-১-৭১ ভুট্টো ঢাকা থেকে বিদায় নেবার সময় “গুডবাই” “ফেয়ার-ওয়েল” না বলে যে ইচ্ছা প্রকাশ করলেন সেটাকে ফরাসিতে বলা হয় “ও-রভোয়া” অর্থাৎ “আবার দেখা হবে”। আরো বললেন, “আমাদের ডিফিকাল্টিজ আছে বই কি? ২৩ বৎসরের সমস্যাগুলো তো তিন দিনে সমাধান করা যায় না। তাই বলে আলোচনার দ্বার তো বন্ধ হয়ে যায়নি। যখন প্রয়োজন হবে আমি আলাপ আলোচনা চালিয়ে যাবার জন্য আবার আসবো।”

সাংবাদিক শুধোলেন, শেখ মুজীব যে এসেমব্লির তারিখ ১৫ ফেব্রুয়ারির জন্য প্রস্তাব করেছেন সে সম্বন্ধে তাঁর বক্তব্য কি? উত্তরে তিনি সোজাসুজি রামগঙ্গা কোনো কিছু না বলে (রিমেনড নন-কমিটল) মন্তব্য করলেন, “অন্তত ফেব্রুয়ারির শেষ পর্যন্ত যদি আমাদের সময় লাগে তবে তাতেও তো কোনো দোষ নেই।”

এবং বললেন, “সংবিধান বাবদে সব কিছু আগেভাগে ফেসালা করে নিয়ে তারপর সংবিধান এসেমব্লিতে প্রবেশ করবো তার তো কোনো প্রয়োজন নেই। এসেমব্লির বৈঠক চালু থাকাকালীনও ওই নিয়ে আলোচনা (নিগোসিয়েশন) চলতে পারে।”

প্রশ্ন : “আপনি কি এসেমব্লির বৈঠক-তারিখ পিছিয়ে দিতে চান?”

উত্তর : “না।”

সাংবাদিকদের আরো বিস্তার প্রশ্নের বিস্তার “উত্তর” দিয়ে আরেকটি মোক্ষম কথা কইলেন রাজনৈতিক ভুট্টো।

“শেখ আমার দৃষ্টিবিন্দু বুঝতে পেরেছেন, আমিও তাঁর দৃষ্টিবিন্দু বুঝতে পেরেছি।”

ভুট্টো যে বুঝতে পেরেছিলেন সে বিষয়ে কোনো সন্দেহ নেই। ভুট্টো কেন, উভয় পাকের সবাই জানতো শেখ এবং আওয়ামি লীগ কি চান এবং আজও সেটা পড়ে শোনাতে স্কুল বয়ও সেটা বুঝতে পারে। কিন্তু প্রশ্ন, শেখ তাজ/নজর কি বুঝতে

পেটেছিলেন ভুট্টোর দৃষ্টিবিন্দু কি? কারণ পাকা ‘পোকার’ জুয়াড়ির মত তিনি তাঁর তাস চেপে ধরে রেখেছিলেন তাঁর টাইয়ের উপর। আর সঙ্গে সঙ্গে ছয় দফার এটা ওটা সেটার মূল তাৎপর্য কি, এটা মানলে ওটার সঙ্গে যে তার দ্বন্দ্ব বাধে, ঐ যে আরেকটা, সেটা—সেটা কি পশ্চিম পাকের লোক মানবে ইত্যাদি ইত্যাদি দুনিয়ার কুস্তি হাবিজাবি প্রণাতে আনুষ্ঠানিক যত প্রকারের সেই সনাতন হাইপোথটিকাল মার্কি অবাস্তব আকাশকুসুম সওয়ালা!

কিন্তু তিনি একবারের তরেও তাঁর আপন দৃষ্টিবিন্দুর একটি মলিকুলও এক লহমার তরেও দেখতে দেননি। অন্য জনের বোঝা তো দূরের কথা! শেষের ঝানু ঝানু বিচক্ষণ জনেরা বার বার—যখনই ভুট্টো কোনো আপত্তি তুলেছেন তখনই—ভালো করে আগাপাস্তলা বুঝিয়ে দিয়ে শুধিয়েছেন, বার বার শুধিয়েছেন, “আচ্ছা এতেও যদি আপনার মনে ধোঁকা থাকে, এটা গ্রহণ করতে যদি আপনার কোনো আপত্তি থাকে তবে আপনি বলুন আপনি কি চান, আপনার প্রস্তাব কি? আমাদের ছদ্মফা কাঠামোর ভিতর আমরা তো সর্বদাই রদবদল করতে প্রস্তুত আছি। নইলে আপনিই বা এত তকলীফ বরদাস্ত করে আসবেন কেন এখানে আর আমরাই বা বসতে যাবো কেন বৈঠকের পর বৈঠকে?”

একদম হক কথা।

আওয়ামি লীগের ছদ্মফা কর্মসূচী কেনার তরে লারখানার তালুকমুলুক ডকে তুলতে হয় না এবং সেগুলো বোঝার জন্যে খানমণ্ডীর গুরুগৃহে প্রবেশ করতঃ চতুর্দশ বর্ষব্যাপী কঠোর আত্মসংযমসহ ব্রহ্মচর্য পালনও করতে হয় না।

আলোচনার সময় নিতান্ত কোণঠাসা হয়ে গেলে হরবকতই মি. ভুট্টোর পেটেন্ট উত্তর ছিল, “হেঁ হেঁ হেঁ, বিলক্ষণ বিলক্ষণ! আমি দেশে ফিরে গিয়ে পার্টি মেম্বারদের সঙ্গে সলাপরামর্শ না করে পাকা উত্তর দি কি করে?”

সেন্ট পীটারের স্বর্গ আর শয়তানের নরকের মধ্যখানে ছিল একটি এজমালি পাঁচিল। চুক্তি ছিল পাঁচিল এ বছর সারাবেন ইনি ও-বছর সারাবেন শয়তান। ঐ মাফিক পীটার তো সারালেন প্রথম বছর পাঁচিলটা, তারপর এক বছর নেই নেই করে ঝাড়া তিনটি বছর শয়তানের আর দেখা নেই। পীটার তো শয়তানকে খুঁজে খুঁজে হয়রান। শেষটায় হঠাৎ একদিন পশ্চিমধ্যে উভয়ের কলিশন। পীটার তো শয়তানকে চেপে ধরলেন, “পাকা কথা দাও, পাঁচিল মেরামত করবে কবে?” শয়তান দণ্ডাধিককাল ঘাড় চুলকে শেষটায় বললে, “তা-তা-তা আমি ঝটপট উত্তর দি কি প্রকারে? আমি নরকে ফিরে যাই, আমার উকিলদের সঙ্গে পরামর্শ করি, তবেই না পাকা উত্তর দিতে পারি।”

দীর্ঘনিঃশ্বাস ফেলে পীটার খেদোক্তি করলেন, “এখানেই তো তুই ব্যাটা মেরেছিস আমাকে। সাকুল্যে স-কটাই যে পেয়ে গেছিস তুই।”

উকিলরা আমার উপর গোসসা করবেন না। আমি মুর্শিদমুখে যে-ভাবে আপু বাক্যটি গুনেছি হুবহু সে-ভাবেই নিবেদন করলুম।...ভুট্টো যদিও স্বয়ং উকিল তবু তাঁরও তো একসপার্ট অগ্নিনিয়ন্ত্রণের দরকার। মূর্দফরাস মরে গেলে থোড়াই আপন লাশ টানে।

কিন্তু মোদ্দা কথা এই যে বুট্টো নানাবিধ কীর্জন গাইলেন, “পূর্ব পাক-এর প্রতি অনেক অবিচার করা হয়েছে সে-বিষয়ে কোনো সন্দেহ নেই, নীতিগতভাবে আমি শেষের অধিকাংশ দফাই মেনে নিচ্ছি, বাদবাকীগুলো দেশে ফিরে গিয়ে আলোচনা করে ফের

আসবো, আমাদের সলাপরামর্শের দোর তো আর বন্ধ হয়ে যায়নি (নো ডেডলক!)। তাবৎ বাতের ফৈসালা করে ধোপদুরন্ত একটা রেডিমেড সংবিধান বাটম-হোলে না পরে যে সংবিধান-মনজিলে প্রবেশ করবো না—এমন মাথার দিবি্য তো কেউ দেয়নি, এসেমব্লির বৈঠক চলাকালীনও তো লবি-তে আমরা বিস্তর কাচা কাপড় ইস্ত্রি করে নিতে পারবো—রাঁধে মেয়ে কি চুল বাঁধে না—এসেমব্লির বৈঠক কবে শুরু হবে? সে তো এমন কোনো একটা বড় কথা নয়। হতে হতে ধরো, এই ফেরয়ারির আখের তকই যদি হয়ে যায় তাতেই বা দোষ কি?”—এগুলোর কতখানি আওয়ামি লীগের কর্তারা বিশ্বাস করেছিলেন? কারণ হয় মানতে হয়, তাঁরা ভুট্টোর ধূর্তামি ধরতে পেরেছিলেন এবং সেই অনুযায়ী এমন সব কর্মপন্থা অবলম্বন করেছিলেন যাতে করে ম্যাজিসিয়ান ভুট্টো শেষমুহুর্তে যেন তাঁর হ্যাট থেকে এমন কোনো মারাত্মক পিচেশ না বের করতে পারেন যার বিষ্ঠা নিক্ষেপে এসেমব্লি সংবিধান নির্মাণ, স্বৈরতন্ত্র থেকে গণতন্ত্রে ক্ষমতা হস্তান্তর সবকিছু রসাতলে যায়। নয় বিশ্বাস করতে হয়, জেনারেল কল-এর রোগ-নির্ণয়ই ঠিক : ইয়েহিয়া এবং মজীব যখন ক্ষমতা হস্তান্তর সম্বন্ধে একমত হচ্ছিলেন তখন তাঁদের কেউই মি. ভুট্টোর নষ্টামি (মিসচিফ) করার দক্ষতাটা হিসেবে নেন নি। বাংলাদেশের এক অতিশয় উচ্চপদস্থ ফৌজী অফিসারও আমাকে সংক্ষেপে বলেন, তিনি বিশ্বাস করেন ইয়েহিয়া গোড়ার দিকে সত্যিই গণতন্ত্র প্রবর্তন করতে চেয়েছিলেন। এই অফিসারও কল-এর মত টিক্কা, পীরজাদা গয়রহ মিলিটারি হনুমানদের ব্যক্তিগতভাবে উত্তমরূপেই চেনেন।

এস্থলে আগামী কালের সন্দেহপিচেশ ঐতিহাসিক হয়তো বলবেন, “ইয়েহিয়া মিলিটারির গণ্যমান্য ব্যক্তি। কল ও উপরে উল্লেখিত বাংলাদেশের ফৌজী অফিসার দুজনাই আর্মির লোক। তাঁরা যে মিলিটারি রাষ্ট্রপতি ইয়েহিয়ার কলঙ্কভার যতখানি পারেন কমাতে চেষ্টা করবেন সেটাই তো স্বাভাবিক।”

নিরপেক্ষ হরিপদ কেরানী তার স্বভাবজাত সরলতাসহ বলবে, “পশ্চিমপাকের মিলিটারি কলঙ্কভার লাঘব করা কি আদৌ সম্ভব? হিটলারের ফৌজী জাঁদরেলরা বর্বরতায় ইয়েহিয়া ও তার পাশবাদের তুলনায় ‘দানো মলি’ শিশুখাদ্য। এবং তাঁর পূর্বেকার, স্বনামধন্য না বলে স্বনির্বাচিত স্বউপাধি “ফিল্ড মার্শাল” প্রাপ্ত। আইয়ুব, যিনি মার্শাল ল চালিয়ে হলেন ফিল্ড মার্শাল, তিনি তো একটা আস্ত চোর। ককোট্ টাকা জমিয়েছেন তার খোঁজ নিতে এক কাকের ভাই আরেক কাক ইয়েহিয়া কিছুতেই রাজী হল না। পশ্চিম পাকিস্তানের আর্মি সম্বন্ধে যত কম কথা কওয়া যায় ততই বুদ্ধ পাঠান-বেলুচ সেপাইদের ভক্তি তাদের প্রতি বাড়বে।”

এসব কেলেকারি ধূর্তামি ভণ্ডামির পাঁক কে খাঁটতে চায় অথচ না ঘেঁটেও উপায় নেই। হিমালয়ের বর্ণনা দিতে হলে শুধু গৌরীশঙ্কর আর কাঞ্চনজঙ্ঘার অগ্রংলিহ সৌন্দর্য বর্ণনা করলে চলে না, তার গভীর উপত্যকা এমন কি কন্টকাকীর্ণ গুহাগহুর খানাখন্দেরও বয়ান দিতে হয়।

এ দুমাসের বয়ান দফে দফে না দিলে কোনো বাঙলার পাঠকই সম্যক হৃদয়ঙ্গম করতে পারবেন না, পূর্ব বাঙলার নেতারা ছাত্রসমাজ-বেঙ্গল রেজিমেন্ট-পাকিস্তান রাইফলস্ পুলিশ সরকারি কর্মচারীদের মধ্যে চিন্তাশীলজন কতখানি ধৈর্য ধারণ করে অতি সন্তুর্পণে অগ্রসর হয়েছিলেন।

তাদের মোকাবেলা করতে হয়েছে মৌলানা ভাসানীর মত প্রাচীন তথা জনপ্রিয় নেতার সঙ্গে। এঁরা কোনো প্রকারের ঢাকঢাক গুড়গুড় না করে সরাসরি যা বলতেন তার সার্থক এই, “১৯১৯। ১৯২০ থেকে আমরা ধৃত ইংরেজের বিরুদ্ধে লড়েছি কংগ্রেস-খিলাফতের সঙ্গে যোগ দিয়ে। সেই সময় থেকেই আমরা পরোক্ষভাবে পাঞ্জাবী সিন্ধী বেলুচ পাঠানকে চিনতে শিখেছি। আদর্শ এক হওয়া সত্ত্বেও হিন্দু মহাসভার সঙ্গে আমাদের মতানৈক্য ঘটেছে, এদের এবং কম্যুনিষ্টদের সঙ্গে কখনো দোস্তী কখনো বা দুশমনী হয়েছে এবং সর্বশেষে চিনেছি, হাড়ে হাড়ে চিনেছি আইয়ুবের আমল থেকে পাঞ্জাবী মিলিটারি জুন্টাকে। এদের মত পাঞ্জীর পা-ঝাড়া হাড়েটক হা—জা ইহসংসারে নেই। এদের সঙ্গে কম্মিনকালেও জয়গুরু দিয়েও রফারফি করতে পারবে না। কবে প্যাদানো ছাড়া এদের জন্য অন্য কোনো ওষুধ নেই। এবং যত তুরনং সেটা নির্মমতমভাবে প্রয়োগ করা যায় ততই মঙ্গল। খুদ পশ্চিম পাকেই সুপ্রচলিত প্রবাদ আছে, একই গুহায় তুমি যদি দৈবাৎ সঙ্গ পাও এক ব্যাটা পাঞ্জাবী আর একটা গোখরোর, তবে ক্ষণতরে চিন্তা না করে প্রথম গলা কাটবে পাঞ্জাবীটার তারপর ধীরেসুস্থে মারবে গোখরোটাকে।”

পাঠান্তর : গোখরোটাকে ছেড়ে দিলে দিতেও পারো।

এবং লীগের মধ্যেই ছিল একদল ফায়ার-ঈটিং ছাত্রছাত্রী যারা কালবিলম্ব না করে চেয়েছিল সম্মুখসংগ্রাম। বিশেষ করে ছাত্রীদের যেন কেউ না ভোলে। গত সংগ্রামে স্বাধীনতার জন্য যে চরম মূল্য এরা দিয়েছে তার তুলনা পৃথিবীর সভ্য অসভ্য প্রাচীন অর্বাচীন কোনো দেশে কোনো সমাজে পাবেন না। একমাত্র তারাই এখনো শব্দার্থে রক্তবিন্দু ক্ষরিয়ে ক্ষরিয়ে সে মূল্য শোধ করে যাচ্ছে—লোকচক্ষুর অন্তরালে, নির্বাসনে কোন্ দানবের অশোকবনে—কি ভাবে?

বন্ধন পীড়ন দুঃখ অসম্মান মাঝে ভয়াবহ অত্যাচারে জর্জরিতা জীবনমৃত্যুদের যেন দিব্যদৃষ্টি দিয়ে দেখতে পেয়ে ব্যথিত কবিগুরু নির্দেশ দিচ্ছেন কি দিয়ে তারা চরম মূল্য শোধ করছে সে উত্তর আসছে কোথা থেকে :

“শ্মশান থেকে মশান থেকে ঝোড়ো হাওয়ায় হাহা করে উত্তর আসছে আক্র দিয়ে ইজ্জৎ দিয়ে ইমান দিয়ে, বুকের রক্ত দিয়েও।”

না, ইমান তাদের আছে। আর সবকিছু দিয়ে ইমান তারা বাঁচিয়েছে!

রক্ষী বনাম নর্তকী

বিশ্বস্তসূত্রে জানা যায়, ফেব্রুয়ারি ১৯৭১ সালে যখন পূর্ব পশ্চিম উভয় পাকিস্তানের নেতাদের মধ্যে কি পদ্ধতিতে পার্লামেন্টকেন্দ্রিক গণতন্ত্র স্থাপিত হবে সেই নিয়ে আলাপ আলোচনা হচ্ছিল ঐ সময় একদিন তিনটি বাজপাখি দুম দুম করে ঢুকলো প্রেসিডেন্ট ইয়েহিয়ার খাস কামরায়। এই শিকরে পাখিগুলো পাকিস্তানি ফৌজের পয়লা কাতারের জাঁদরেলের পাল। লেফটেনেন্ট জেনরেল পীরজাদা, কার্যত পাকিস্তানের প্রধানমন্ত্রী, লেফটেনেন্ট জেনরেল গুল হাसन এবং মেজর জেনরেল আববর খান। টেবিল খাবড়াতে খাবড়াতে তাঁরা দাবী জানালেন, “৩রা মার্চ ১৯৭১ সালে ইয়েহিয়া যে ঘোষণা দ্বারা

ঢাকাতে পরিষদের অধিবেশন আহ্বান করেছেন সেটা অ-নি-র্দি-ষ্ট কালের জন্য মূলতুবি করে দিতে হবে।”

লিখেছেন জেনরেল কল জুলাই ১৯৭১ সালে তাঁর “কনফ্রন্টেশন উইদ পাকিস্তান” পুস্তকে।

এবং এর পর কল যে মন্তব্যটি করেছেন, পাকিস্তানের পঁচিশ বৎসরের ইতিহাসে সেইটে সবচেয়ে গুরুত্ববাহক ভাগ্য পরিবর্তন নিয়ে।

“এবং তিনটে শিকরেই ইয়েহিয়াকে বাধ্য করালে পূব বাংলার গণতান্ত্রিক আন্দোলনের কঠোরোধ করার জন্য কঠোরতম ব্যবস্থা মেনে নিতে।”

নিঃসন্দেহে বলা যেতে পারে ঐ দিনই

আকাশে বিদ্যুৎ বহি

অভিশাপ গেল লেখি—

ঐ দিনই মিলিটারি জুন্টা স্থির করলেন পূববাংলাকে এমনই একটা শিক্ষা দিতে হবে, যে-শিক্ষা আন্তিলা, চেঙ্গিস, নাদির, এ-যুগের হিটলার কেউই কখনো বাংলার যে কটা “মানুষের নামে পশু” বেঁচে থাকবে তারা যেন “এক হাজার বৎসরের ভিতর” মাথা তুলে খাড়া না হতে পারে। কারণ জুন্টার মুনিব বলুন, চাকর বলুন, শিখন্তী বলুন মি. ভুট্টো একাধিক বার বলেছেন, তিনি এক হাজার বৎসর ধরে ভারতের সঙ্গে লড়াই করে যাবেন। কিন্তু ঐ পূববাংলাটার কোনো প্রকারের রাজনৈতিক অস্তিত্ব যদি বজায় থাকে তবে “বাঙালরা” নিশ্চয়ই সেই ভারত বিজয়ে বাধা দেবে, বিশেষ করে তাদের ছদফা দাবী নামঞ্জুর করার পর।

এ-স্থলে ভবিষ্যৎ কালের ঐতিহাসিক প্রশ্ন তুলবেন, বাংলাদেশের সর্বনাশ সাধনের সিদ্ধান্ত গ্রহণের জন্য কি একমাত্র মিলিটারি জুন্টাই দায়ী?

আপাতদৃষ্টিতে আশ্চর্যজনক বলে মনে হতে পারে, কিন্তু একথা তবুও সত্য যে বাংলাদেশের সাধারণজন আজ আর এ-সব বিষয়ে বিশেষ কৌতূহলী নয়। এটা আদৌ অস্বাভাবিক নয়। দ্বিতীয় বিশ্বযুদ্ধের শেষে আমার ইতালির তথা জার্মান বন্ধুদের বিস্তার খুঁচিয়ে খুঁচিয়ে ডিকটেক্টরদ্বয় সম্বন্ধে খবর বের করতে হয়। ওরা কেটে যাওয়া দুঃস্বপ্নের প্রসঙ্গ তুলতে চাইত না। তবু বাংলাদেশের খবরের কাগজ মাঝে মাঝে যে-সব রহস্য পশ্চিম পাকে উদ্ঘাটিত হচ্ছে তার খবর দেয়।

জেনরেল কল প্রভৃতি বিশেষজ্ঞরা যে প্রকৃত সত্যের অনেকখানি সন্ধান দেবেন এ তো জানা কথা, কিন্তু যখন কোনো নর্তকীও নিতান্ত বাধ্য হয়ে নিঃস্বার্থ সে সব সত্যের সমর্থন জানায় তখন সত্য নিরূপণ অনেকখানি সহজ ও বিশ্বাসযোগ্য হয়ে যায়।

গত ১৫।২০ বছর ধরে পশ্চিম পাকিস্তানের সর্বোচ্চ সরকারী বেসরকারী নেতারা এমনই বর্বর পন্থাচারে লিপ্ত থাকাকালীন দেশের ভাগ্য নিয়ন্ত্রণ করতেন যে সে-সব পুরীষাবর্তের নিকটবর্তী হতে কোনো ঐতিহাসিক বা সত্যান্বেষীজন সহজে রাজী হবেন না। পৃথিবীর ইতিহাসে নারীজাতি অনেক ক্ষেত্রেই যবনিকান্তরালে শিবাশিব রাজনৈতিক কর্ম সমাধান করেছেন। তাঁদের মধ্যে মাদাম পঁপাদুর, লোলা মনতে (জ) বিদম্বা রোমান্টিক রমণী। এঁদের ললাটে পঙ্কতিলকের লাঞ্ছন আছে বটে কিন্তু সেখানে অশ্লীলতার নোংরামি নগণ্য। এঁদের বুদ্ধিমত্তা রাজনৈতিক মতবাদ পর্যবেক্ষণ করে ঐতিহাসিক অনেক ক্ষেত্রেই উপকৃত হন ও শুদ্ধ ইতিহাস কিঞ্চিৎ সরস হয়ে ওঠে।

কিন্তু পশ্চিম পাকে নিছক নোংরামি। তাই সংক্ষেপে সারছি।

ইয়েহিয়া সিপাহ-সলার, প্রেসিডেন্ট হওয়ার বহু আগের থেকেই নর্তকী আকলীম আখতারকে রক্ষিতারূপে গ্রহণ করেছিলেন। তাঁকে তিনি বেসরকারী “জেনারেল” উপাধি দেন ও তিনি সূরে সিদ্ধ পাঞ্জাবে “জেনারেল রাণী” রূপে সুপরিচিতা ছিলেন। সম্প্রতি লাহোরের শব্দার্থে ইন্টারকন্টিনেন্টাল হোটেলে পুলিশ তাঁকে গ্রেফতার করে। কিন্তু অল্প পরেই লাহোরের দায়রা জজ তাঁর জামিন মঞ্জুর করেছেন—মি. ভুট্টোর শাসন যে নিরঙ্কনয় একথাটা এ-স্থলে সম্পূর্ণ অবাস্তব নয়। আখতার সাংবাদিকদের বলেন, ইয়েহিয়ার উত্থান পতন সম্বন্ধে একখানি পুস্তক রচনা করার জন্য তিনি এক প্রকাশকের সঙ্গে মৌখিক চুক্তি করেছেন; তিনি যে-পুস্তকে পাকিস্তান দ্বিখণ্ডিত হওয়ার প্রকৃত কারণ উল্লেখ করবেন। তিনি আরো বলেন দ্বিখণ্ডিত হওয়ার জন্য সামরিক জুট্টারাই একমাত্র দায়ী নয়, এর পিছনে বর্তমানে ক্ষমতায় অধিষ্ঠিত কতিপয় ব্যক্তির ষড়যন্ত্র আছে; তাঁর কাছে এ ষড়যন্ত্রের প্রমাণ আছে।

প্রেসিডেন্ট ভুট্টো সম্বন্ধে মন্তব্য উহা রেখে তিনি বলেন, তাঁকে গ্রেফতার করার প্রকৃত তাৎপর্য এই যে সর্বোচ্চ সরকারী ক্ষমতায় আসীন কয়েকজনের আতঙ্ক ও ভয়ের জন্যই তাঁকে গ্রেফতার করা হয়েছে। কারণ তাঁরা মনে করেন, তাঁর কাছে তাঁদের অপকীর্তি ও গোপন কার্যকলাপের এমন সব তথ্য-প্রমাণ ও ছবি আছে যা প্রকাশিত হলে তাঁদের সুনাম নষ্ট হবে এবং দেশে তাঁদের প্রকৃত স্বরূপ উদঘাটিত হবে।

উপসংহারে তিনি বলেন, “কিন্তু আমি কথা দিচ্ছি যে, আমি তা প্রকাশ করবো না। কারণ তা প্রকাশিত হলে দেশের সম্মান বলতে আর কিছুই থাকবে না।”

এরপর মহিলাটি—আমি ইচ্ছে করেই “মহিলা” বলছি, কারণ পাকিস্তানের অতিশয় অল্প “ভদ্র” পুরুষও এ-তত্ত্ব বলতে সাহস ধরেন, যা এ নর্তকী বলেছে—

“এমনিতেই দেশের সম্মানের আজ যা অবনতি ঘটেছে তাই যথেষ্ট।”

মি. ভুট্টো যে বেইমানি করেছিলেন তার ফল পরে শাপে বর হয়েছিল। বাংলাদেশ দূশো বছর পর পুনরায় স্বাধীন হল। কিন্তু সে-স্বাধীনতা পাওয়ার জন্য তার যে রক্ত ক্ষয় হল, “আর দিয়ে ইজ্জত দিয়ে” কোনো গতিকে ইমান বাঁচালো তারা, তার জন্য দায়ী কে? সে অনুসন্ধান আমাকে খুঁটিয়ে খুঁটিয়ে করতেই হবে। আমি মনে করি এটা আমার কর্তব্য। পাঠক যদি অতিষ্ঠ হয়ে ওঠেন তবে আমি নাচার। আমি আমার আইমমানকে চাই-ই চাই!

মি. ভুট্টো বিলক্ষণ অবগত ছিলেন বাংলাদেশে পশ্চিম পাকের শোচনীয় পরাজয়ের জন্য তাঁর আপন দেশের লোক একদিন তাঁকে দায়ী করবে। বিশেষ করে এই কারণে যে, ডিসেম্বর ১৯৭০-এর গণ-নির্বাচনে তিনি পশ্চিম পাকে সবচেয়ে বেশী ভোট পাওয়ার গৌরবে দুহাত দিয়ে কিং কং-এর মত সর্বত্র বুক দাবড়ে প্রচার করে বেড়াচ্ছিলেন, তিনি তাবৎ পশ্চিম পাকের প্রতিভূ—ফরাসি রাজার মত “লোতা সে মোওয়া (আমি যা, রাষ্ট্রও তা)।” পূর্ব বাঙলায় পরাজয়ের পর তিনি হঠাৎ করে চটসে পালাবেন কি করে? তাই তিনি স্থির করলেন, এখন আমি প্রেসিডেন্ট, এই বেলা একটা অনুসন্ধান কমিটি বসিয়ে আমি সর্বদোষ চাপাবো ইয়েহিয়ার স্বন্ধে। দরকার হলে মিলিটারি জুট্টাকেও তার সঙ্গে জড়াবো।

সতেরো বছরের স্বৈরাচারের পর দিনকে রাত, রাতকে দিন করা সবকিছুই সম্ভব। কিন্তু সতেরো বছর বলি কেন? পাকিস্তানের জন্মদিন থেকেই তো স্বৈরতন্ত্র। ক-ইদ-ই আজম মুহম্মদ আলী ভাই ঝিভাডাই (জিন্নাহ) পাকিস্তানের প্রথম রাষ্ট্রপতি। তিনি ছিলেন সর্বত্র বিরাজমান, সর্বশক্তির আধার। তাঁর বর্ণনা দিতে গিয়ে ইংরেজ ক্যামবেল-জনসন বলেছেন, “এখানে এইখানে পশ্য, পশ্য, পাকিস্তানের রাজাধিরাজ ক্যান্টারবেরির আর্চবিশপ একাধারে পার্লামেন্টের সভাপতি তথা প্রধানমন্ত্রী—সর্ব ভিন্ন ভিন্ন সম্রাট এক কেন্দ্রে সম্মিলিত করে বিরাটকার এই ক্বাইদ-ই-আজম।” “Here indeed is Pakistan’s King Emperor, Archbishop of Canterbury, Speaker and Prime Minister concentrated into one formidable Quaid-i-Azam.” পাকিস্তানের জন্মকালে ও মরহুম জিন্নার জীবিতাবস্থায় কোনো প্রকারের পার্লামেন্ট “বিরোধী দল” ছিল না, থাকলে অতি অবশ্যই তিনি আরও বড় নেতা হতেন।

সেই শুভ ঐতিহ্যের গোড়াপত্তন থেকে সর্ব-মরহুম কি লিয়াকত আলী, কি ইসকন্দার মির্জা সবাই ছিলেন এক একটি চোটো হিটলার। এমন কি আইয়ুবের ন্যাজ, পূর্ব পাকের গবর্নর মোনাম্মেদ খান পর্যন্ত সার্কাসের ক্লাউনের মত মুনিবের কীর্তিকলাপের ভড়ং করে যেতেন রাত দুটো তিনটে অবধি—তাঁর ছিল অনিদ্রা রোগ। আশ্চর্য! দুই প্রত্যন্ত—একসঙ্গে কি জানি কি করে দোহাদুহ হয়ে যায়—হিটলারের ছিল ইনসমনিয়া, দুজনারই ছিল মদ্যে অনীহা।

এদের তুলনায় ভুট্টো কম যান কিসে?

বস্তুত তিনি প্রথম রাউন্ড তাঁরই আদেশমত করিয়ে নিয়েছেন। পূর্বোক্ত কমিশন অগস্টের মাঝামাঝি নির্দেশ দিয়েছেন—অবশ্য প্রভু ভুট্টোর অনুমোদন সাপেক্ষে—ইয়েহিয়াকে আসামীরূপে মিলিটারি ট্রাইবুনালের সমুখে দাঁড়াতে হবে।

মিলিটারি ট্রাইবুনালের কাজকারবার হয় সাতিশয় গোপনে। জনসমাজে যেটুকু মি. ভুট্টোর ফেবারে যায় মাত্র ঐটুকুই প্রকাশ পাবে।

কিন্তু ভয় নেই পাঠক, আমরা আখেরে সবকিছুই জানতে পাবো। মূল তত্ত্বগুলো ‘নিশ্চয়ই বহুকাল’ ধরে জানি। অবশ্য নর্তকী জানেন অনেক বেশী।

মুজিব আউট।

ভুট্টোর স্বগতোক্তি

যেথা যাই সকলেই
বলে, “রাজা হবে?”
“রাজা হবে?”—এ বড়ো
আশ্চর্য কাণ্ড। একা
বসে থাকি, তবু শুনি
কে যেন বলিছে—
রাজা হবে? রাজা হবে?
দুই কানে যেন
বাসা করিয়াছে দুই
টিয়ে পাখি, এক

বুলি জানে শুধু—

রাজা হবে। রাজা হবে।

সেই ভালো বাপু, তাই হব।

কবিগুরুর “বিসর্জন” থেকে। হ্যাঁ, বিসর্জন বই কি? এর তিন পক্ষ পরেই আইনানুযায়ী প্রতিষ্ঠিত পাকিস্তান সরকার বিসর্জন দিল সর্ব আইন, জলাঞ্জলি দিল সর্ব ধর্মচার, ন্যায়বিচার।

এস্থলে অবশ্য দুটি নিরীহ টিয়ে নয়। এখানে তিনটে ঘৃণ্য গৃধ্র—পীরজাদা, গুল আর আকবর। তাঁরা ভুট্টোকে বললেন, “তুমিই রাজা হবে।”

এই ‘ই’টার অর্থ কি?

অর্থ এই : ইয়েহিয়া যখন সব রকমের রাজনৈতিক ক্ষমতা মুজিবকে হাতে তুলে দেবেন বলে স্থির করেছিলেন তার বিগলিতার্থ এই, তিনি ডিক্টেটর রূপে অখণ্ড ক্ষমতার অধিকারী হয়ে দোদগ্ধ প্রতাপে রাজত্ব করতে চান না। তিনি চান সুদূরাত্ম দুটি জিনিস—মদ্য এবং মৈথুন। এবং পাকেচক্রে নিতান্তই যখন ডিক্টেটর হয়েই গিয়েছেন তখন অন্ততপক্ষে তিনি প্রেসিডেন্টরূপে বিরাজ করতে চাইবেন বই কি। কিন্তু ক্ষমতালোভী যখন নন তখন রাষ্ট্রচালনার ভার মুজিবকে দেওয়া যা তোমাকে দেওয়াও তা।

অতএব “তুমিই রাজা হবে”।

জেনারেল কল-এর ভাষ্যে যাঁরা বিশ্বাস করেন তাঁরা স্বচ্ছন্দে মেনে নিতে পারেন যে উপরের সব কটি যুক্তিই দ্ব্যর্থহীন সত্য। বাদশা জাহাঙ্গীর একাধিকবার বলেছেন, আমার কয়েক পাত্র মদ্য আর কটি-মাংস মিলেই ব্যাস,—রাজত্ব চালান না মহারানী নূরজ্জাহা। বিস্তরে বিস্তরে এ-হেন দৃষ্টান্ত আছে। বস্তুত আমি জনৈক পাকিস্তানীর মুখে শুনেছি, ১৯৬৮-৬৯-এ আইয়ুব যখন যমের (আজরাইলের) সঙ্গে যুদ্ধে তখন জাঁদরেলকুল ইয়েহিয়ার সমুখে প্রস্তাব করেন, তিনি যেন তদদণ্ডেই রাজ্যভার গ্রহণ করেন, পাছে আইয়ুব হঠাৎ গত হলে কোনো সিভিলিয়ান না প্রেসিডেন্ট হয়ে পুনরায় গণতন্ত্রের প্রতিষ্ঠা করে মিলিটারি শাসনের অবসান ঘটায়, তখন ইয়েহিয়া স্রেফ কবুল জবাব দেন। ...তাই বলে পাঠক অবশ্য অন্য একসদ্বীর্ঘে গিয়ে ভাববেন না যে রাষ্ট্রপতি হওয়ার লোভ তাঁর আদৌ ছিল না। নিশ্চয়ই ছিল। আর কিছু না হোক, ঐ পদে অধিষ্ঠিত হলে তাঁর যে দুটো জিনিসে শখ সেগুলো তিনি নির্ভাবনায় পর্যাণ্ড পরিমাণে আমৃত্যু উপভোগ করতে পারবেন।

১১/১২ ফেব্রুয়ারি ভুট্টো পিণ্ডিতে উড়ে এসে ইয়েহিয়ার সঙ্গে কয়েক ঘণ্টা ধরে দীর্ঘ আলোচনা করেন। বিবেচনা করি তাঁকে বোঝাবার শেষ চেষ্টা দিলেন মুজিবকে তার প্রস্তাবমত সবকিছু যদি দিয়ে দাও তবে তোমার, আমার, পাকিস্তানের সর্বনাশ হবে। খুব সম্ভব এ প্রস্তাবও করেছিলেন, টাল-বাহনা দিয়ে অ্যাসেমব্লিটা অন্তত মূলতুবি রাখো।

অনুমান করা যেতে পারে ইয়েহিয়া তখন ভুট্টোকে কোনো পাকা কথা দেননি।

ভুট্টো নিশ্চয় তখন তাঁর নিষ্ফলতার কাহিনী মিলিটারি জুন্টার পীরজাদা গুল ইত্যাদিকে বলেছিলেন।

১৩।২।৭২—ইয়েহিয়া ঘোষণা করলেন, ৩রা মার্চ অ্যাসেমব্লির অধিবেশন হবে। সরকারি বিশেষ বিজ্ঞপ্তি বেরুল,

“The President, General A.M. Yahya Khan, has been pleased to summon the National Assembly of Pakistan to meet on Wednesday, March 3, 1971, at 9 a.m. in the Provincial Assembly Building, Dacca, for the purpose of forming a Constitution for Pakistan.”

অনুমান করি এদিনই জুন্টা গিয়ে থাবড়ালেন ইয়েহিয়ার টেবিল। দাবি করলেন অনিদিষ্ট কালের জন্য অ্যাসেমব্লি মূলতুবি রাখতে হবে। ইয়েহিয়াকে সম্মতি দিতে হল বাধ্য হয়ে। কিন্তু প্রেসিডেন্ট তো ঝটপট সে মত-পরিবর্তন আরেকটা গেজেট একসট্রা-অরডিনারিতে রাতারাতি প্রকাশ করতে পারে না। তাই সে-কর্ম করা হল ঠিক এক পক্ষ পরে।

সেই দিনই বিজয়গর্বে উৎফুল্ল জুন্টা মি. ভুট্টোকে জানালেন,

“তুমি রাজা হবে।”

অর্থাৎ “মুজিব আর লীগের নেতাদের জেলে পুরবো। লীগ পার্টিকে বে-আইনী বলে ঘোষণা করার ফলে তোমার পার্টিই হবে সংখ্যাগুরু। তুমিই হবে প্রধানমন্ত্রী।”

ভুট্টো উল্লাসে নৃত্য করতে করতে ফ্লাই করলেন পেশোয়ারবাগে। এবারে পশ্চিম পাকের বাকি পার্টিগুলোকে বশে আনা যাবে অতি সহজে। তাঁর কেবিনেটে তিনি নেবেন অন্য পার্টি থেকে কিছু মন্ত্রী, উপমন্ত্রী গয়রহ, গয়রহ। সেই প্রলোভনই যথেষ্ট।

১৩।২।৭১—১৪।২।৭১ টেবিল থাবানোর দিন সন্ধ্যাবেলা পেশওয়ারের বিশ্ববিদ্যালয় নগরীর এক বাঙালোতে বসলো জমজমাট জাঁদরেল ককটেল পার্টি। তিনি যে অখণ্ড পাকিস্তানের রাজা হতে চললেন সে-সুসমাচার তিনি কি অত সহজে চেপে যাবেন—অতি অবশ্যই দু-চারজন অন্তরঙ্গ বন্ধুকে সে আনন্দের হিসেদার করেছিলেন। কিন্তু অল্পে সুখ কোথায়? সুখ ভূমাতে। ইতিমধ্যে পিপলস পার্টির রাজা হয়ে গিয়েছেন ককটেল পার্টির রাজা। পাকিস্তানের পলিটিক্যাল পার্টি এবং ককটেল পার্টিতে অবশ্য কোনো কালেই বিশেষ কোনো পার্থক্য ছিল না এমন উপবাসের মাস রমজানের দিনে (!), লাঞ্চ পার্টিতেও না।

প্রখ্যাত সাংবাদিক এন্টনি বলেছেন, গেলাস—পাঠক, নিষুপানির গেলাস ভেবে আপন কল্পনাশক্তিকে বিব্বিত করো না—হাতে করে সে-ককটেল পার্টির চক্রবর্তী হবু-রাজা মি. ভুট্টো রসে নিমজ্জ সর্বজনকে ইলেকট্রিফাই করলেন মাত্র কয়েকটি ঐতিহাসিক লবজা মারফৎ “ভুট্টো আবার ঘোড়ার জিনে সোয়ার। এ-ঘটনা ঘটলো যারা শক্তিদর তাদেরই স্ৰীমাংসা দ্বারা। মুজিব আউট (মুজিব ইজ আউট!)! আমি প্রধানমন্ত্রী হব।”

মুজিব আউট! লেট বিফোর উইকেট? সেইটেই তো খাঙ্গার হেডাপিস। ইয়েস, অ্যান্ড নো। টসে (গণনির্বাচনে) জিতেছিলেন লীগের ক্যাপটেন শেখজী। তিনিই ওপনিং বেটসমেন। কি এ ক্রিকেট খেলাতে কুদরতে কী খেল! ফার্স্ট ইনিংসে নামবার পূর্বে পেভিলিয়নে যখন শেখ লেগিং পরছেন তখনই তিনি “লেগ বিফোর উইকেট, ইন দি পেভিলিয়ন”।

বাকি খেলোয়াড়দের যে কটিকে আমপায়ার—বুচারের দু আঁসলা বেটা টিক্সা পাকড়াতে পেরেছিলেন তাদের নিয়ে সেই টিক্সা-এলেভন হানড্রেড-হানড্রেডের ব্লাডি ইনিংস-এ আমরা এখনো পৌছইনি।

প্রেসিডেন্ট ইয়েহিয়া, জুন্টা আর ভুট্টোতে ফেব্রুয়ারি ১৯৭১-এর মাঝামাঝি থেকে আর কোনো মতভেদ রইল না—ভুট্টো সামলাবেন সিভিলিয়ান দিক অর্থাৎ পশ্চিম পাকের যে-কটা রাজনৈতিক দল আছে তার যে-কজন লীডারকে তিনি পারেন আপন দলে টানবেন, প্রলোভন দেখিয়ে।

পলিটিশিয়ান আর স্টেটসমেনে তফাত কি? পলিটিশিয়ান জনগণকে একত্র করে পার্টি বানিয়ে তাদের চালায় আর স্টেটসম্যান সেই ব্যক্তি যে ভিন্ন ভিন্ন মতবাদের ভিন্ন ভিন্ন পলিটিশিয়ানকে একজোট করে রাষ্ট্র নির্মাণ কর্মে অগ্রসর হয়। কাঠরসিকরা বলেন, পলিটিশিয়ান ম্যাস (জনগণকে) বুদ্ধ বানায় আর স্টেটসম্যান পলিটিশিয়ানদের বুদ্ধ বানায়।

এইবারে পালটিশিয়ান ভুট্টো পরলেন স্টেটসম্যানের মুখোশ। সেটা যে কতখানি বোমানান বদখদ বেচপ হল সেটা জানেন মি. ভুট্টো সবচেয়ে বেশী। যাকে পশ্চিমপাকের জনগণ ডিকটের আইয়ুবের ডেমোক্রাটিক ন্যাজ খেতাব বহু পূর্বেই দিয়ে তাঁকে সম্মানিত করেছে, যার কাজ—পূর্বেই উল্লেখ করেছি, দীর্ঘ আঠারো মাস ধরে ছিল পর্দার আড়ালে গুড়িগুড়ি হামাগুড়ি দিতে দিতে একে ভজা ওকে প্যার করা, মাঝে মাঝে চিত্রিতা গর্দভীর ন্যায় ক্ষণতরে আত্মপ্রকাশ করা, সে রাতারাতি পেয়ে গেল ডবল প্রমোশন (এদানির ঢাকার অটোপ্রমোশনের চেয়ে দু কাঠি সরেস); পলিটিশিয়ান না হয়েই সরাসরি স্টেটসমেন!

দ্বিধ্বজ্যে বেরুবার সঙ্গে সঙ্গেই পয়লা মনজিলেই খেলেন পয়লা খান্না।

প্যাভিলিয়নে বসে বসেই মুজিব এলবি ডাবলু হওয়ার ইলেকট্রিক শকসদেধ দেওয়ার পরদিন বীর ভুট্টো গেলেন ফ্রন্টিয়ার নেতা খান ওয়ালি খানের কাছে। তাঁকে খবর দিলেন, “পাকিস্তান টাট্টর পিঠে ভুট্টো আসওয়ার। এসো, ভাই, দুই বেরাদরে মিলে লক্কাটা ভাগ করে নি।” ঘণ্টার পর ঘণ্টা ঝাপু সিদ্ধু-পাণ্ডা ভুট্টো পোশতুভাষীর সঙ্গে কুশতি লড়লেন জুড়োর সর্ব প্যাচ চালিয়ে কিন্তু ওয়ালি খালি এক কথা বলে “না”। পলিটিকস ব্যাপারটা ধোয়া তুলসী পাতা নয় সে-তন্তুটা পেশাওয়ারেও অজানা নয়, কিন্তু এতখানি হীন হবার মত পাঠান ওয়ালি খান নন। শেষটায় ভুট্টো সস্তোপনে ওয়ালিকে জানালেন, এসেমব্লি অধিবেশনে আমি ঢাকা যাবো না। আমার এ সিদ্ধান্ত আমার পার্টি মেম্বাররা পর্যন্ত জানে না। এটা ১৪ ফেব্রুয়ারির কথা।

তার পরদিন ১৫/২-এ সর্বজনসমক্ষে বম ফটালেন মি. ভুট্টো—ভাবার্থে। এরই ফলে ঠিক চল্লিশ দিন পরে হাজার হাজার বম ফটালে ঢাকাতে সশব্দে, শব্দার্থে রাত এগারোটায়। এ বমটা তিনি কেন ফটালেন, কার নির্দেশে ফটালেন তার আলোচনা হবে ১ মার্চের পরিপ্রেক্ষিতে যেদিন ইয়েহিয়া জুন্টার আদেশ মাফিক ন্যাশনাল অ্যাসেমব্লি অনির্দিষ্ট কালের জন্য মূলভূমি করে দিলেন।

পনরো তারিখের তাঁর সেই দীর্ঘ বিবৃতি এতই পরস্পরবিরোধী, দ্ব্যর্থসূচক, ঝাপসা এবং ইংরিজিতে যাকে বলে বীটিং এবাউট দি বুষ যে তার সারমর্ম দেওয়া আমার পক্ষে অসম্ভব। এতে আমার লজ্জিত হওয়া উচিত, কিন্তু যখন দেখি, পাকিস্তান ডেমোক্রাটিক

পার্টির (এর কার্যকলাপ পশ্চিম পাকিস্তানেই ছিল বেশী) নসরুন্না খান মি. ভুট্টোর বম মারার দু দিন পর নিম্নের বিবৃতিটি দিচ্ছেন তখন মন সাব্বনা মানে :—

মি. ভুট্টোর পরিষদ বয়কট করার সিদ্ধান্ত যে গণতন্ত্রবিরোধী সে মন্তব্য করার পর খান সাহেব বলেছেন : “মি. ভুট্টোর পরিষদ বয়কট করার সিদ্ধান্তের উপর নির্ভর করে ভবিষ্যতে (এর ফলস্বরূপ—লেখক) কি হবে সে সম্বন্ধে কোনো কিছু একটা বলা শক্ত। কারণ পিপলস্ পার্টির চেয়ারম্যানের স্বভাবই হচ্ছে অতিশয় দ্রুতবেগে তাঁর মনঃভূমি পরিবর্তন করা (চেনজিং হিঞ্জ স্ট্যানস, উইদ গ্রেট রেপিডিটি। মাত্র কয়েক দিন আগে তিনি বলেছিলেন যে, পরিষদ অধিবেশনে সভা মধ্যে তিনি আওয়ামি লীগের সঙ্গে বোঝাপড়া করবেন।”

পাঠকের স্মরণ থাকতে পারে আমরা ২রা সেপ্টেম্বরের ‘দেশ’ পত্রিকায় মি. ভুট্টোর একটি বিবৃতি থেকে তার সারাংশ উদ্ধৃত করি। তিনি তখন (১৯।১।৭১) বলেছিলেন, “ইট ইজ নট নেসাসারি টু এনটার ইনটু দি কনসটিচুয়েন্ট এসেমব্লি উইদ অ্যান এগ্রিমেন্ট অন ডিফারেন্স ইস্যুজ, বিকজ নিগোসিয়েশনস কুড কন্টিন্যু ইভন হোয়েন দি হাউস ইজ ইন সেশন।”

তা হলে এক পক্ষকাল সময় যেতে না যেতে আজ (১৫-২-৭১) হঠাৎ ভুট্টোজী এ বোমাটা ফাটালেন কেন?—যে, আমার সঙ্গে আগেভাগে সমঝোতা না করলে আমরা এসেমব্লি করতে ঢাকা যাবো না।

ঠিক এই প্রমুখিই শুধোলেন নসরুন্নার সঙ্গে সঙ্গে ভুট্টো-বিবৃতি পাঠমাত্র পশ্চিম পাকের নেতা সলাহ উদ্দীন খান, “ভুট্টো এসেমব্লি বয়কটের ঘোষণা করার জন্য যে সময়টা বেছে নিলেন সেটা ভারি হেয়ালিভরা (ভেরি ইনট্রিগিং)। তিনি ঢাকাতে যখন শেখ মুজীবের সঙ্গে দফে দফে চুলচেরা (থ্রেডবেয়ার) আলোচনা করেছিলেন তখনই তো শেখের মতিগতি তিনি অতি অবশ্যই বুঝে নিয়েছিলেন। কারণ শেখ তো তখন তাঁর সাকুল্যে তাস টেবিলের উপর রেখে সর্বসংশয় নিরসন করেছিলেন।”

এটা তো প্রহেলিকা (ব্যাফলিং) যে, মি. ভুট্টো সেই সময়ই তাঁর আপন মনের গতি বুঝিয়ে বলেননি কেন?

এই এক পক্ষকাল মধ্যে তো আওয়ামি লীগ তার প্রোগ্রামে কণামাত্র রদবদল, কাটাই-ছাঁটাই, ডলাই-মলাই কিছুই করেননি তবে কেন আজ মঙ্গুরার মুখে যেন নবান্নের বিস্মে-ধানের খই ফুটতে আরম্ভ করল?

কিছু না। সেই টেবিল-থাবানোর ফলশ্রুতি যেন জুন্টা কর্তৃক মি. ভুট্টোর পিঠ থাবড়ানোর সামিল। যেন পিতামহ ভীষ্ম শঙ্খধ্বনি ফুকলেন—দুর্যোধনের মন থেকে সর্ব দ্বিধা অন্তর্ধান করেছে—কার সৈন্য পর্যাণ্ড, কারই বা অপর্যাণ্ড, কে নেয় তার খবর!

জনাব ভুট্টোর বক্তব্য এতই দীর্ঘ যে, যে-ছেলে তার প্রেসি লিখতে পারবে সে হেসে খেলে বি, এ, এম, এ-তে ফার্স্ট হবে। সংক্ষেপে যতখানি পারি তারই নিষ্ফল চেষ্টা দেব। না করে উপায় নেই। কারণ হিটলারের মত মি. ভুট্টো ইতিহাসের বিচার-সিদ্ধান্তে বিশ্বাস করেন। মি. ভুট্টোর কেতাবে আছে—“একদা শেখ মুজীব আমাকে ঈশিয়ার করে বলেন, আমি যেন মিলিটারিকে বিশ্বাস না করি। শেখ বলেন, মিলিটারি যদি তাঁকে (মুজীবকে)

প্রথম বিনষ্ট করে তবে আমাকেও তারা বিনষ্ট করবে (১)। আমি বললাম, মিলিটারি বরফ আমাকে বিনষ্ট করে করুক, কিন্তু ইতিহাসের হাতে আমি বিনষ্ট হতে চাইনে।”

উপস্থিত তিনি যতখানি পারেন ইতিহাস বিনষ্ট করছেন। অন্তত বিকৃত করছেন তাঁর আপন তাঁবেতে ‘নিরপেক্ষ’ কমিশন বসিয়ে। এ কর্মে তিনি “বুচার অব বেঙ্গল”-এর পরিপূর্ণ সহায়তা পাবেন। তিনি এখন পাকিস্তানের জঙ্গীলাট। কুলোকে বলে, যে টিকা প্রভু ইয়েহিয়ার আদেশে বাংলাদেশ দহন-ধ্বংস করলেন তাঁকে খাস করে জঙ্গীলাট বানালেন মি. ভুট্টো, ওকীবহাল টিকা একস-প্রভুর সর্বাস্থে যেন উত্তমরূপে কর্ম লেপন করতে পারেন।

তা তাঁরা ইতিহাস নিয়ে যা খুশী করুন, প্রামাণিক সমসাময়িক ইতিহাস বললেন :—

() মুজীব আমার সঙ্গে সমঝোতা না করলে আমার পার্টি ঢাকা যাবে না।

সাংবাদিকের প্রশ্ন : আপনি কি তবে এসেমব্লি বয়কট করছেন?

ভুট্টো : (দৃঢ়কণ্ঠে) না।

এ ঘটনার আটমাস পরে মি. ভুট্টো অক্টোবর ১৯৭১-এ আপন পুস্তিকা “দি গ্রেট ট্র্যাডেজিটে” লিখেছেন, তিনি এসেমব্লিতে যাবার পূর্বে যে শর্ত দিয়েছেন সেটা না মানা হলে তিনি ঢাকা যাবেন না, জানালে পর, “ছয়েন আকুড বাই কবেরসপনডেনটস ছয়েদার পিপলস পার্টি উয়োজ বয়কটিং দি এসেমব্লি আই কেটেগরিক্যালি ডিনাইড ইট।” (২)

পাঠক চিন্তা করে নিজেই মনস্থির করে নিন, এটাকে বয়কট না করলে বয়কট বলে কাকে?

এ-তথ্য কি বলার প্রয়োজন আছে যে পূর্ব-পশ্চিম উভয় পাকের রাজনীতিক নেতারা—মি. ভুট্টোর দোস্ত দূশমন দুইই—ভুট্টোর এই আচরণকে ‘বয়কট’ নাম দেন, কেউ কেউ এটাকে ‘ব্ল্যাকমেল’ও বলেন।

কট্টর মুসলিম অখণ্ড পাকিস্তান বিশ্বাসী জমাৎ-ই-ইসলামীর আমির (খলিফা) মৌলানা সৈয়দ আবুল আলা মওদুদী কড়া ভাষায় ভুট্টোর এই মনোভাবকে অসংগত আচরণ বলে নিন্দা করেন। এমন কি এসেমব্লির বাইরে ভুট্টো মুজিবে সংবিধান বাবদে সমঝোতা করার প্রচেষ্টাকেও তিনি নিন্দনীয় মনে করেন। যা-কিছু হবার তা হোক এসেমব্লির ভিতরে—এই তাঁর সূচিস্তিত মত।

অথচ এর দু-তিন দিন পূর্বেই স্বয়ং ভুট্টোই এই মওলানার সঙ্গে সাক্ষাৎ করে

(১) ১২।১২।৭১ নাগাদ শ্রীভুট্টো আমেরিকায় নিরাপত্তা পরিষদে বক্তৃতা দেন। ইয়েহিয়া তাঁকে আমেরিকা পাঠাবার পূর্বে হুকুম দিয়েছিলেন তিনি যেন ফেরার পথে গ্লেনে করে প্রথম কাবুল আসেন। সেখানে থেকে মোটরে করে পেশাওয়ার। ইয়েহিয়ার গ্ল্যান ছিল পথমধ্যে ভুট্টোকে গুমখুন করা, কারণ ইয়েহিয়ার সিংহাসন তখন টলমল। তিনি “বিশ্বস্তসূত্রে” অবগত হয়েছিলেন, দেশে ফিরে ভুট্টা তাঁকে আসন থেকে সরাবেন।...কিন্তু ভুট্টোকে ডেকে নিয়ে নিকসন তাঁকে বলেন, ইয়েহিয়াকে দিয়ে আর কিছু হবে না। তিনি (নিকসন) হুকুম দিয়েছেন, ইয়েহিয়া যেন বিনাবাধায় ভুট্টোকে আসন ছেড়ে দেন। ভুট্টো তাই সরাসরি করাচি পৌঁছন। যাঁরা ভুট্টোর মহানুভবতায় পঞ্চমুখ তাঁরা শুনে বেজার হবেন, নিকসনের হুকুম মাফিক মি. ভুট্টো বঙ্গবন্ধুকে মুক্তি দেন।

(২) দি গ্রেট ট্র্যাডেজি, পৃঃ ২৮।

সর্বজনসম্মত সংবিধান নির্মাণ করতে চেয়েছিলেন!

মওলানা ছাড়া পশ্চিম পাকের অন্যান্য নেতারাও একবাক্যে এই বয়কট-এ প্রতিবাদ নিন্দা অসম্মতি জানান—নিতান্ত সরকারের ধামাধরা কাইয়ুম জাতীয় দুটি দল ছাড়া। আর ‘পূর্ব পাকের’ আওয়ামী লীগবিরোধী নেতারাও ভূট্টোর সিদ্ধান্ত পাকিস্তানের পক্ষে ক্ষতিকর বলে দৃঢ়মত প্রকাশ করেন।

পাকিস্তান-প্রেসিডেন্ট ভূট্টোর বর্তমান ভাইস-প্রেসিডেন্ট ‘পূর্ব পাকের’ ভূতপূর্ব মুখ্যমন্ত্রী বাঙালী নুরুল আমিন (৩) ভূট্টোর আচরণ ‘হেস্টি’ এবং ‘আনহেলপফুল’ আখ্যা দিয়ে পূর্ব বাঙলার প্রতি ভূট্টোর আচরণের নিন্দা করেন। তথা ভূতপূর্ব মুখ্যমন্ত্রী আতাউর রহমান খান বলেন, ভূট্টো এসেমরি বর্জন করার সিদ্ধান্ত গ্রহণ করেছেন পাকিস্তানকে দুখণ্ডে বিভক্ত করার জন্য।

এখনো মাঝে মাঝে কানে আসে ভূট্টোর স্তুতিগান—তিনি চেয়েছিলেন অখণ্ড পাকিস্তান! তা হলে বলতে হয়, আওয়ামী লীগ থেকে আরম্ভ করে ওয়ালি খান, নসরুল্লা, সলাহ উদ্দীন, চোর উল আমিন এস্টেক মোলানা মওদুদী—সবাইই সবাই লিপ্ত হয়েছিলেন গভীর এক ষড়যন্ত্রে, পাকিস্তানকে কি প্রকারে দ্বিখণ্ডিত করা যায়! সামনে উজ্জ্বল উদাহরণ, নেট জিন্নাহ ভারতকে দ্বিখণ্ডিত করেন।

“সাত জর্মন
এক জগাই
তবু জগাই লড়ে!”

গয়নার নৌকা চেনে না কে? বিশেষ করে পূর্ব বাঙলায়। বারোইয়ারি নৌকা পাঁচো ইয়ারে ভাড়া করে গুটিসুখ অনুভব করতে করতে যে যার আপন মনজিলে নেমে যান। অবশ্য পাঁচো ইয়ার নৌকো ইশটিশন ঘাটে পৌঁছনো মাত্রই হুড়মুড়িয়ে একে অন্যের ঘাড়ে পড়ে চড়ে, নৌকোর ভেতর ঢোকেন—নৌকোর গর্ভ থেকে আগের যাত্রীদের নামবার পূর্বেই। অবশ্য তখনো তারা পাঁচো ইয়ার নয়, বরঞ্চ পঞ্চভূত বলতে পারেন। জায়গা দখল করার তরে তখন ভূতের নৃত্য। তারপর ধীরেসুস্থে জিরিয়ে-জুরিয়ে জিজ্ঞাসাবাদ আরম্ভ হয়। যথা :

“মহাশয়ের নাম?”

“এস্তে, নেতাই হালদার। মহাশয়ের?”

“এস্তে, হরিপদ পাল।...এ যে কস্তা, আপনার?”

“আমার নাম? নেপালচন্দ্র গুণ।”

তারপর নানাবিধ অভিজ্ঞান জিজ্ঞাসা। এমন সময় একজনের খেয়াল গেল, ছইয়ের

(৩) অধুনা যে কয়েকজন বাঙালী পাকিস্তান থেকে কাবুল হয়ে পালিয়ে আসতে সক্ষম হয়েছেন তাঁরা কাগজে প্রকাশ করেছেন, তন্মধ্যে আমার এক আত্মীয় আমাকে বলেছেন, নূর মিঞা বন্দী বাঙালীদের জন্য কড়ে আঙ্গুলটি পর্যন্ত তো তুলছেনই না, তদুপরি বাঙালীরা যাতে করে দেশে ফিরতে না পারে সে ব্যাপারে ‘দারুণ’ উৎসাহী। বস ভূট্টো সমীপে আপন কিমৎকদর বাড়াবার জন্য। ফোনে বাংলা শুনেলো আঁতকে ওঠেন।

বাইরের ঐ ঠা ঠা রোদ্দুরে একটা লোক উদাস মুখে বসে আছে। চাষাভূষা হবে। এর তো পরিচয় নেওয়া হয় নি। উনিই গলা চড়িয়ে মুকুবি মেকদারে জিজ্ঞাসিলেন, “তোমার পরিচয়টা তো জানা হল না হে।” অতি বিনয়নশ্রকণ্ঠে লোকটি, “আইগা, আমার নাম আব্দুর রহিম বৈঠা।” গয়নার পাঁচো ইয়ার তাক্জব। তারপর কলরব। “বৈঠা! সে কি, হে? মুসলমানের এ পদবীও হয় নাকি?”

সবিনয় উত্তর : “আইগা, অয় না, অখন অইছে। ঠেকায় পইড়া আপনারা কেউ হালদার, কেউ পাল, কেউ গুণ। বেবাক গুলাইন যদি ছইয়ের মধ্যে বইয়া থাকেন তয় নাও চলবো কেমতে? তাই আমি ‘বৈঠা’ অইয়া একলা একলা নাও বাহিতেছি।”

তা সে একা একাই ‘নাও বাইয়া যাউক’ কোনো আপত্তি নেই, কারণ কবিগুরুও গেয়েছেন,

‘হেরো নিদ্রাহারা শনী

ষণ্ণ পারাবারের খেয়া

একলা চালায় বসি।’

তবে কিনা আব্দুর রহিম বৈঠা না হয়ে লোকটার নাম জুলফিকার (দুলফিকার) আলী বৈঠা হলেই ১৫।১৬।৭১ ফেব্রুয়ারির হালটা বিবিত্ত হয়ে মানাতো ভালো।

এই সুবাদে “জুলফিকার” দূর্ভাগ্যমাসটির কিঞ্চিৎ অর্থনিরূপণ করলে সেটাকে বহু পাঠক দীর্ঘসূত্রতারূপে অগ্রাহ্য করবেন না। কারণ যঁত দিন যাচ্ছে, ততই দেখতে পাচ্ছি, বহু হিন্দু প্রতিবেশী মুসলমানদের কায়দা-কানুন রীতিরেওয়াজ সম্বন্ধে কৌতূহলী হয়ে উঠেছেন। কেচ্ছা-সাহিত্যে আছে,

আলীর হিম্মৎ দেখ্যা

নবী চমৎকার।

আদরে দিলাইন তানে

তেজী জুলফিকার।।

হজরৎ আলীর দস্তে

ঠাটা(১) তলওয়ার।

আসমানে বিজুলি পারা

নাচে চারিধার।।

পয়গম্বর হজরৎ আলীকে যে জুলফিকার নামক তরবারি দেন সেটি খুব সম্ভব সিরিয়া দেশের দিমিশকে (ডামাস্কাস নগরে) তৈরী। কিন্তু অতখানি এলেম আমার পেটে নেই যে তার পাকা খবর সবজ্ঞাস্তা পাঠকের পাতে দিতে পারি।

তা সে যাই হোক, ১৫।১৬।১৭ ফেব্রুয়ারি তারিখে জুলফিকার আলী বৈঠা সগর্বে তথা সঙ্করুণ কণ্ঠে প্রচার করলেন, পশ্চিম পাকিস্তান থেকে ঢাকার নেশনেল এসেমব্লি অধিবেশনে যে যাক সে যাক, তিনি যাবেন না, তিনি জুলফিকার আলী বৈঠা নিমজ্জমান পশ্চিম পাকিস্তানের তরনী একাই বৈঠা চালিয়ে অগ্রগামী হবেন। কারণ তিনি পাকা খবর পেয়েছেন, উত্তর কাশ্মীরের হিন্দুকুশ থেকে আরম্ভ করে কচ্ছের রান অবধি দূশমান ইন্ডিয়া সৈন্য সমাবেশ করছে এবং সেটা “বেইমান” ইন্ডিয়ানরা এমনই সুচতুরতাসহ

সমাধান করছে যে অতি অল্প লোকই তার খবর রাখে। এখানে বরঞ্চ সুচতুর ভুট্টো এমন একটা সুস্থ ইঙ্গিত দিলেন যার ভাবার্থ “তোমাদের কেউ কেউ তো অন্তত জানো, মিলিটারির সঙ্গে আমার কিঞ্চিৎ দোস্তী হেঁ হেঁ—হেঁ হেঁ” অর্থাৎ তিনি, ভুট্টো, খবরটা পেয়েছেন নিতান্তই মিলিটারি প্রসাদাৎ। কিন্তু প্রশ্ন, ইন্ডিয়া ঠিক এই সময়ই সৈন্য সমাবেশ করছে কেন? কারণ ধুরন্ধর ইন্ডিয়া জানে, পশ্চিম পাকের বিস্তার রাজনৈতিক নেতা মার্চের পয়লা সপ্তাহে ঢাকা গিয়ে জড়ো হচ্ছেন। সেই সুযোগে ইন্ডিয়া পাকিস্তান আক্রমণ করলে তাঁরা সবাই আটকা পড়ে যাবেন ঢাকায়। দেশের জনগণকে লীডারশিপ দিয়ে মাতৃভূমি রক্ষার্থে “জিহাদ” লড়বার জন্য অনুপ্রাণিত করতে পারবেন না।

এই ইন্ডিয়া জুজুর বিভীষিকা দেখানো—যখন তখন, মোকা বেমোকায়—এটাই মি. জুলফিকার আলী ভুট্টোর জুলফিকার তলওয়ার। তাঁর সম্মানিত নামে (ইসমে শারীফে) “আলী” যখন রয়েছে তখন এই জুলফিকার তলওয়ারে তাঁরই হক সর্বাধিক। এই বেতাল-অসিতে ভানুমতী মন্ত্র আউড়ে ইন্দ্রজাল-রাজ ভুট্টো দিবা দ্বিপ্রহরে প্রাণসম্ভার করতে সক্ষম।

সাতিশয় মনস্তাপের বিষয়, এই পোড়ার সংসারে আর যে অভাব থাক থাক, সন্দেহপিণাচের অভাব হয় না। তাদেরই দু'একজন মৃদুকণ্ঠে আপত্তি জানালে পর ভুট্টো যে উত্তর দিলেন সেটি পরশুরাম ক্লাসিকস পর্য্যায়ে তুলে লিপিবদ্ধ করে গেছেন :

“তারিণী (স্যান, কবরেজ)। প্রাতিঙ্কালে বোমি হয়?

নন্দ। আঞ্জে না।

তারিণী। হয়, ঐনতি পার না।”

কিন্তু এহ বাহ্য।

এরপর মি. ভুট্টো যে ভয় দেখালেন সেটা আরো প্রাণঘাতী। তিনি বললেন, “আমি আমার পার্টি সদস্যদের ঢাকা পাঠিয়ে সেখানে ওদেরকে ডবল হস্টেজে পরিণত করতে পারিনে।” এক দিকে তাঁরা পশ্চিম পাকে ফিরতে পারবেন না (ইন্ডিয়া ফিরতে দেবে না)—অতএব তাঁরা হয়ে যাবেন ইন্ডিয়ার হস্টেজ, এবং তাঁরা আওয়ামি লীগের ছদ্মফা মানতে পারবেন না বলে তাঁরা হয়ে যাবেন লীগেরও হস্টেজ। অর্থাৎ ইন্ডিয়া যুদ্ধঘোষণা করে কতকগুলো অপমানজনক দাবী তুলবে পাকিস্তানের কাছে এবং সেগুলো না মানা পর্যন্ত সেই “আমানতী” সদস্যদের জলপথে, শূন্যমার্গে পশ্চিমপাকে ফিরতে দেবে না। আর আওয়ামি লীগও তাদের পূর্ব পাক থেকে বেরুতে দেবে না।

সর্বনাশ! তাহলে এই দুধের ছাওয়ালদের হালটা হবে কি?

সব জেনেশুনে সদস্যরা যদি ঢাকা যান তবে, তবে কি আর হবে—এসেমগ্রি হল কসাইখানাতে (মি. ভুট্টোর আপন জবানীতে ‘স্লটার হাউস’—এ) পরিবর্তিত হবে!

সাংবাদিকরা যে সাতিশয় বিদম্বাস্ত (হার্ড বয়েলড এগস্) সে তত্ত্বটি বিশ্বজন সম্ব্যকরূপে অবগত আছে। তথাপি তাঁরাও নাকি আঁতকে উঠেছিলেন। শকটা সামলে নিয়ে সমস্বরে তাঁরা নানান প্রশ্ন শুধালেন। কিন্তু মি. ভুট্টো চুপ মেরে গেলেন। “হি ডিড নট এলাবরেট অন দিস পয়েন্ট”—সবিস্তর স্বপ্রকাশ হতে সম্মত হলেন না।

কি জানি? কে জানে? হয়তো তিনি তখন বৃহত্তর ব্যাপকতর স্লটার-ভূমির স্বপ্ন দেখছিলেন।

ঢাকা শহরের সৌন্দর্য আর মাধুর্য শুধু এ-শহরের আপনজনই হৃদয় দিয়ে গ্রহণ করতে পারে। ঢাকার আবহাওয়ার সঙ্গে, ধরুন বর্ধমানের কণামাত্র সাদৃশ্য নেই—যদিও দুটিই বিশাল বঙ্গের দুই নগর। বর্ধমান বীরভূমের সৌন্দর্যে রুদ্রের প্রচণ্ড প্রখরতা—ঢাকার সৌন্দর্য তার লাষণে।

ঢাকা, মৈমনসিং, সিলেট খাঁটি বাংলা কিন্তু তার আস বাঁশ তার আমজাম তার রিম থিম বারিপাত তার একান্ত নিজস্ব। অথচ এও জানি এ দেশের লতা-পাতা ফল-ফুল পশু-পক্ষী কেমন যেন মণিপুর, আরাকান, বর্মার সঙ্গে সম্পর্ক ধরে বেশী। এসব দেশের সঙ্গে ঢাকা চাটগাঁর পরিচয় বহুদিনের কিন্তু আমার মনে হয় মাত্র এক শতাব্দী হয় কি না হয় ঢাকার শৌখিন লোকের খেয়াল গেল, বর্মা মালয় থেকে অচেনা গাছপালা, তরুলতা এনে এখানে বাঁচানো যায় কিনা। কারণ এতদিন এরা পশ্চিম থেকেই এনেছে এসব, এবং এদেশের বড় বেশী সঁয়াতসঁতে আবহাওয়াতে সেগুলোর অনেকেই মারা যেত কিংবা মূর্মূরুপে মানুষের হৃদয়ে করুণা জাগাতো মাত্র। পক্ষান্তরে আশ্চর্য সুফল পেল ঢাকার তরুবিলাসীজন বর্মা মালয়ের সঙ্গে যোগসূত্র স্থাপনা করে। তারপর এল আরো নানান দেশ থেকে নানান রকমের গাছ।

বসন্তকাল। মিটফোর্ড পাড়ার বারান্দায় বসে আছি সঙ্কেবেলা। বাঁশের ফ্রেমে লতিয়ে উঠেছে পল্লবজাল। স্নান গোধূলিটি অন্ধকারে গা-ঢাকা দিতে না দিতেই অচেনা এক মৃদু গন্ধ যেন ভীষ্ম মাধবীর মত “আসিবে কি থামিবে কি” করে করে হঠাৎ সমস্ত বারান্দাটায় যেন জোয়ার লাগিয়ে দিলে। হায়, আমি বটানির কিছুই জানিনে। গৃহলক্ষ্মী ক্ষণতরে বাইরে এসেছিলেন। নামটা বললেন। সঙ্গে সঙ্গে ভুলে গেলুম।

অন্ধকার ঘনিয়ে এল। বুড়ীগঙ্গার জল আর দেখা যাচ্ছে না। ওপারে একটি দুটি তারাও ফুটতে আরম্ভ করেছে—যেন সমস্ত রাত ধরে এপারের ফুলকে সঙ্গ দেবে বলে। একমাত্র ওই তারাগুলিই তো সব দেশের উপর দিয়ে প্রতি রাতে আকাশের এক প্রান্ত থেকে আরেক প্রান্ত অবধি পাড়ি দেয়। তারা চেনে সব ফুল, সব গাছ, সব মানুষ। মনে পড়ল, একদা বহু বহু বৎসর পূর্বে কাবুলের এক পাদুশালায় ঘুম ভেঙে গিয়েছিল প্রায় প্রথম আলোর চরণধ্বনির সঙ্গে, একবুক অচেনা ফুলের গন্ধ নিয়ে ঝাপসা ঝাপসা দেখেছিলুম অচেনা গাছ, অজানা পল্লব, বিচিত্র ভঙ্গীর ভবন অলিন্দ, সম্পূর্ণ অপরিচিত পাখির কুহ কেকার অনুকরণ। আমার অধঃচেতন একাধিক ইন্দ্রিয়ের উপর অচেনার এই আকস্মিক অভিযান যেন বিহ্বল বিকল করে দিয়েছিল আমাকে। দেশের কথা মায়ের কথা সঙ্গে সঙ্গে মনে এল। ঠিক এই সময়ে দেশের বাড়িতে ঘুম ভাঙলে শুনতে পেতুম মা আঙ্গিনায় গোলাপ ঝাড়ের নিচে জলচৌকিতে বসে বদনার পানি ঢেলে ঢেলে ওজু করছে। কখনো সখনো চুড়ির ঝুঁংঝুঁং শুনছি। একেবারে অবশ হয়ে গেল সমস্ত দেহমন।

এমন সময় আল্লার মেহেরবাণীতে চোখ দুটি গেল উর্ধ্বাকাশের দিকে। দেখি, অবাক হয়ে দেখি, সেই পরিচিত অতি পরিচিত এ-জীবনে আমার প্রথম কৈশোরের প্রথম পরিচয়ের নক্ষত্রপুঞ্জ—কুন্তিকা। সেটা কিন্তু তোলা নাম। তার আটপৌরে ডাকনাম সাতভাই চম্পা। একমাত্র রবীন্দ্রনাথের কাব্যেই পেয়েছি সে জনপদবধূর প্রিয় নাম,

“—ওরে, এতক্ষণে বুঝি
তারা ঝরা নির্ঝরের স্রোতঃপথে
পথ খুঁজি খুঁজি
গেছে সাত ভাই চম্পা”—

সাত ভাই চম্পা চলেছে ছায়াপথ বা আকাশগঙ্গার পিছে পিছে—তারই উল্লেখ করলেন কবি “তারা ঝরা নির্ঝরের স্রোতঃপথ” বর্ণনা দিয়ে। আর এই যে দেশে এসেছি গ্রহ তারকার যোগাযোগে, সে দেশের রাজা আমানুল্লাহর রানীর নাম সুরাইয়া, কৃন্তিকার আরবী নাম। তাঁকে ধরবে বলে পিছনে ছুটেছে রোহিণী, আরবদের জ্যোতিষশাস্ত্রে আল-দাবরান। কাবুলে সে দেখা দিল দু বৎসর পরে।

সাত ভাই চম্পা আমাকে চেনে আর বুড়ীগঙ্গার পারে নির্বাসিতা ওই বিদেশী ফুলকেও চেনে।

না, ভুল করেছি। দু একটি তারা যে নড়তেচড়তে আরম্ভ করেছে। এগুলো ওপারের নৌকার আলো। অথচ ওই আলোগুলোর একটু উপরের দিকে তাকালেই দেখি, আকাশের তারা। অন্ধকার এত নিবিড় যে ওই মাটির আলো আর আকাশের আলোর মিতালী ছাড়া আর-কিছু চোখে পড়ে না।

এ-পাড় থেকে মাঝে মাঝে কানে আসছে কে যেন কাকে ডাকছে। সাড়াও পাচ্ছে। রাত ঘনিয়ে আসছে। হাটবাজার শেষ হতে চললো। এইবারে বাড়ি ফেরার পালা। চারদিকে গভীর নৈস্তব্ধ্য।

“দিনের কোলাহলে
ঢাকা সে যে রইবে
হৃদয়তলে।”

কবি এখানে “ঢাকা” অন্য অর্থে ব্যবহার করেছেন, কিন্তু নগর অর্থে নিলেও কোনো আপত্তি নেই। কারণ তার পরই কবির কথামত।

“রাতের তারা উঠবে যবে
সূরের মালা বদল হবে”

ওই তো হচ্ছে, ঐ ওপারে, তারা প্রদীপের মালার বদল। স্বর্গের দেয়ালীর গন্ধে পৃথিবীর দেয়ালীতে মিলে আলোক শিখীর আলিম্পন।

নিবিড় অন্ধকারে যখন মানুষ ভরা চোখ টাটিয়েও কিছুই দেখতে পায় না, এমন কি পাকা মাঝির ছুঁচের মত ধারালো চোখও হার মানে, তখন নদীর ঘাটে-অঘাটে একে অন্যকে খুঁজে পাওয়ার জন্য ক্ষণে ক্ষণে যে ডাকাডাকি কানে আসে, সেটা ছেলেবেলা থেকেই আমার কাছে অত্যন্ত অকারণে অজানা রহস্যভরা রূপে ধরা দিত। তার সঙ্গে থাকতো কিছুটা অহেতুক ভীতির হেঁয়ালি। যদি এরা একে অন্যকে খুঁজে না পায়! ওই যে মাঝির গলা মিলিয়ে যাবার আগেই যেন কাতর এক নারীকণ্ঠ—তবে কি মা-তার ছেলেকে ডাকছে? তাকে যদি না পায়!

পরবর্তীকালে বুঝেছি ওই একই ডাক অন্যরূপে :

পথে যেতে ডেকেছিলে মোরে
পিছিয়ে পড়েছি আমি,
যাব যে কী করে ॥

এসেছে নিবিড় নিশি,
পথরেখা গেছে মিশি—
সাড়া দাও, সাড়া দাও
আঁধারের ঘোরে॥

এই তো বুড়ীগঙ্গার পাড়। এখানে জলরেখা গেছে মিশি। কতজন কাতর কণ্ঠে বার
বার মিনতি জানাচ্ছে, ‘সাড়া দাও, সাড়া দাও।’

তারপর এক দিন আসে যখন আর সে সাড়া দেয় না।

কতশত নিরীহ প্রাণী অকালে এই বুড়ীগঙ্গায় তলিয়ে গেল—মাত্র সেদিন।

এখনো কত শত পাগলিনী মাতা, “সাড়া দাও, সাড়া দাও” রবে ডাকছে।

আরো কত মাতা গৃহকোণে বসে আশায় আশায় আছে, একদিন সাড়া পাবে।

আমি খুব ভালো করেই জানি, কোন্ দিন কোন্ প্রহরে তাকে গুলি করে মেরে
বুড়ীগঙ্গার গভীরে তাকে জানাজার নামাজ না গুনিয়ে গোর দেয়।

কিন্তু কি করে সে-কথাটা তার মাকে বলি?

আর না বলে কি করে প্রতিদিন তার সাড়ার আশাটা মায়ের বন্ধ চোখে দেখি?

AMARBOI.COM